

## Tuhun Nyoo Cha Tyaa San Mateo

*Ñáyivi vachi ra Jesucristo tata  
(Lc. 3.23-38)*

<sup>1</sup> Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

<sup>2</sup> Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

<sup>3</sup> Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram.

<sup>4</sup> Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón.

<sup>5</sup> Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí.

<sup>6</sup> Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

<sup>7</sup> Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza.

<sup>8</sup> Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías.

<sup>9</sup> Sehe ra Uzías cuví chi ra Jotam, sutu ra Acáz. Ta sehe ra Acáz cuví chi ra Ezequías.

<sup>10</sup> Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías.

<sup>11</sup> Sehe ra Josías cuví chi ra Jeconías ta yañi ra. Cacacu ra quivi catiñ ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

<sup>12</sup> Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel.

<sup>13</sup> Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor.

<sup>14</sup> Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud.

<sup>15</sup> Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob.

<sup>16</sup> Ta ra Jacob cuví sutu ra José yíi cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyí cuví ra rey cuenda yo.

<sup>17</sup> Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quívi tñn ñu Babilonia chi ñu Israel. Ta nyacua nya quívi cuan chicoo uchi cumi ca tahan tata ñu nyacua nya quívi cacu ra Cristo.

### *Nu cacu ra Jesucristo (Lc. 2.1-7)*

<sup>18</sup> Tyehe caa cacu ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo.

<sup>19</sup> Ta ra José ra cua cuvi yíi ña, cuví ra noo ra vaha. Ta ña cuñí ra cuhva ra tñcahan nuu chi ña, yucuan chaha tyaa ra cuhva cha sandoo xehe ra chi ña.

<sup>20</sup> Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuvi ña ñasihun, vatyí sehe ña cha cua cacu, cuenda Tatyí Ii Nyoo cuví.

<sup>21</sup> Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyí cusacacu ra chi ñáyiví chihin cuatyí ñu.

<sup>22</sup> Tandihí ihya cuví tacuhva nachino cava tuhun cha cahán Sutu Mañi yo chihin yuhu ra cacuví profeta ra ta cha naha, ra cachahá cuenda tuhun cahán ra.

<sup>23</sup> Ta catyí ra tyehe caa:

Ñaha tyivaa cha ta coo ca rayí chi, cucohon sehe ña.

Ta coo noo sehe ña. Ta cunañi cue: Emanuel. Ta sívii cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

<sup>24</sup> Cuhva cha nducachí iñi ra José, sacuví ra tari kuhva catyí ángel cuan chi ra. Ta quehen ra chi cu María vatyí cuvi ña ñasihí ra.

<sup>25</sup> Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

## 2

### *Nu cuahan coyo ra chiñi tuñi cua nyehe ra nu cacu ra Jesús*

<sup>1</sup> Cacú ra Jesús noo ñuu cha nañí Belén. Ta ñuu cuan nyaá chi nu cuví Judea. Ta rey Judea cuan nañí ra Herodes. Tyicuan ta chaá coyo suhva ra nya ñuu Jerusalén. Quichí coyo ra ityi nu caña ñanyii. Ta ra cachiñi tuñi xaan cacuví ra.

<sup>2</sup> Ta candacá tuhun ra chi ñáyiví tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiño cha chaha cuenda tyi cacu ra ityi ihya. Ta vachi ndi vachi sacahnu ndi chi ra —cacatyí ra.

<sup>3</sup> Ta quivi cha chito rey Herodes tuhun cuan cutyoño cuñi ra. Ta tyicuan caa tucu tandihí ñáyivi ñuu Jerusalén cuan.

<sup>4</sup> Tyicuan ta cana ra Herodes chi tandihí ra cacuví nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo.

<sup>5</sup> Ta canacahan ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

<sup>6</sup> Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende. Tyicuan caa catyí nu tutu Nyoo, —cacatyí ra cuan chi ra Herodes.

<sup>7</sup> Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáa cuhva ta ñáa quivi caña tiño cuan.

<sup>8</sup> Tyicuan ta tachí ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyi ndo chii, tacuhva vatyí cuhun tucu yuhu cusacahni chi cue —catyí ra Herodes chi ra.

<sup>9</sup> Cha yaha cachiñi ra chiñi tuñi cuan cha catyi ra Herodes, caquehen ra ityi ta cuahan coyo ra. Ta tiño cha canyehe ra ityi nu caña ñanyii cuan, cuahan ti ityi nuu ra. Ta chicuiñi ti maa maa siqui nu catuvi cha lee cuan.

<sup>10</sup> Ta cuhva cha canyehe ra chiñi tuñi cuan tyi chicuiñi tiño cuan, sii xaan cacuñi ra.

<sup>11</sup> Ta caquihvi ra chichi vehe nu catuvi cha lee cuan. Ta canyehe ra chi cue chihin cu María sihi cue. Ta chicuiñi chiti ra vatyi sacahnu ra chi cue. Tyicuan ta canuñā ra yuhu caja cha canyisō ra. Ta catava ra regalo cha cuvi xuhun cuan, ta cutu vixi chahán, ta ndutya vixi chahán cha nañi mirra. Ta cachaha ra chi cue.

<sup>12</sup> Yaha cuan ta catahan ra ñumahna ta cutuñi iñi ra vatyi ña tahn chi canayaha ra ityi nu nyaā ra Herodes, yucuan chaha sin ca ityi cuanuhu coyo ra.

### *Nu chino xehe ra José ta cu María chihin cha lee nya Egipto*

<sup>13</sup> Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tui nuu ra José chichi ñumahna. Ta catyi ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyi ra Herodes cunanducu ra chi cha lee ihya vatyi cahni ra chi cue.

<sup>14</sup> Tyicuan ta ndicuita ra José cha cuaa cuan. Ta quehen ra chi cha lee cuan ta chi sihi cue. Ta cuahan ñu nya Egipto.

<sup>15</sup> Ta yucuan chinyaa ñu nyacua nya cha chihi ra Herodes. Tyehe caa cuvi tacuhva na chino

cava tuhun cahán Nyoo cha tyaa ra profeta ta cha naha. Tyehe caa catyí ra: “Nya ñuu Egipto cane chi Sehi”, catyí ra.

*Nu tachí ra Herodes na cahñi ra chi ra cuatyaa*

<sup>16</sup> Cha tuví iñi ra Herodes vatyí ra cachiñi tuñi cuan sandavi ñaha ra chi ra, nduxaan vavaha ra. Ta tachí ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandihí, ra cuatyaa cha ni cacu nyacua nya cha uvi cuiya. Tyicuan caa sacuví ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra.

<sup>17</sup> Tyicuan caa chinq cava tuhun cahán Nyoo cha tyaa ra Jeremías profeta Nyoo ta cha naha, ta catyí ra tyehe caa:

<sup>18</sup> Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachihí sehe ñu, catyí chi nuu tutu Nyoo.

<sup>19</sup> Soco cha yahá cha chihí ra Herodes, tyicuan ta tuví tucu noo ángel cha tachí Sutu Mañi yo nuu ra José nu quixí ra ñuu Egipto. Ta catyí ra chi ra:

<sup>20</sup> —Ndícuíta ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihí ra nducú cahñi chi cue.

<sup>21</sup> Tyicuan ta ndícuíta ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

<sup>22</sup> Soco quívi chito ra José vatyí ra Arquelao cuví ra rey tyiño nuu sutu ra, ra Herodes, nya

Judea, nayuhvi ra ta ña cuñi ra cuhun ra yucuan. Ta vatyí sacotö Nyoo chi ra chichi ñumahna, yucuan chaha cuanuhu ñu nya Galilea.

<sup>23</sup> Cha chaá ñu yucuan, cuahan ñu nya ñuu Nazaret, cua coo ñu. Ta yucuan chiyo ñu. Tyehe caa cuvi tacuhva chino cava tuhun cha cahán Nyoo, cha catyaa ra profeta ta cha naha. Vatyí catyi ra tyi ra Jesús ra ñuu Nazaret cucunañi ra.

### 3

*Ra Juan ra sacondutyá chi ñáyivi cahán ra tuhun Nyoo chihin ñu*

*(Mt. 1.1-8; Lc. 3.1-9, 15-17; Jn. 1.19-28)*

<sup>1</sup> Quivi cuan ra Juan ra sacondutyá chi ñáyivi cuahan ra noo chiqui ndii ityi Judea. Ta quichaha cahan ra tuhun Nyoo chihin ñu.

<sup>2</sup> Ta catyi ra:

—Ndü uvi iñi ndo cuatyí ndo vatyí cha yatyin nyaá Nyoo ra cua cunyaca ñaha aña yo.

<sup>3</sup> Ican tuhun ra Juan ihya cuví cha tyaa ra Isaías ra cuvi profeta Nyoo ta cha naha. Tyehe caa tyaa ra:

Chiñi yo cha caná chaa noo ra noo nu chiqui ndii ta catyi ra:

“Tari sanduvahá ndo noo ityi, tyicuan caa sanduvaha ndo aña ndo, vatyí cua quichi Sutu Mañi yo.

Nuña ndo noo ityi ndoo chi ra naquihvi ra aña ndo.”

<sup>4</sup> Ta ra Juan ñihnó ra sahma chino chihin ixi camellu. Ta sincho ra, ñii cuví. Ta maa maa ri pinchi chachí ra ta tyañuñu cuhu chihí ra.

<sup>5</sup> Ñáyivi ñuu Jerusalén ta tandihi ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichi tyasoho ñu tuhun cahán ra.

<sup>6</sup> Ta cha yahá nahma ñu cuatyí ñu, ra Juan sacondutyá ra chi ñu yuvi cahnu Jordán cuan.

<sup>7</sup> Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichi coyo ra vatyí condutyá ra. Ta catyí ra chi ra:

—¡Nyoho, tari noo tata coo xaan cuví ndo! ¿Yóo cha sacotó chi ndo vatyí chihin cha condutyá ri ndo ta ma tachi tuñi ca Nyoo chi ndo? Ña ndicha.

<sup>8</sup> Coo ndo noo cha quetuví vaha tyi ndicha cha ndu uvi ñni ndo cuatyí ndo.

<sup>9</sup> Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyivi tata ra Abraham.

<sup>10</sup> Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyivi chi tun. Ta cahmi ñu chi tun. Tyicuan caa tucu nyoho, cahun ndo nu cayú ñuhu.

<sup>11</sup> Cha ndicha vatyí yuhu sacondutyé chi ñáyivi chihin ndutyá, tari noo seña vatyí cha ndu uvi ñni ñu cuatyí ñu. Soco cha yaha sacondutyá yuhu chihin ndutyá, vachi inga ra cusacondutyá chi ñáyivi chihin Tatyí Ii Nyoo ta chihin ñuhu ihñi. Iyó ca tunyee ñni chi maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra.

<sup>12</sup> Tari noo ra cha cua naquehen vaha trigo ta natyihí vaha ra chichi yaca ta mihin cahmi ra,

tyicuan caa cuví maa Sutu Mañi yo chihin yo. Tatu chinó iñi yo chi ra cunaquehen vaha ra chi yo. Ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhú cha ma ndahva ca maa —catyí ra Juan.

*Nu condutyá ra Jesús*  
(Mr. 1.9-11; Lc. 3.21-22)

<sup>13</sup> Tyicuan ta quitá ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutyá ra Juan chi ra.

<sup>14</sup> Cha xihna ri ña cuñí ra Juan sacondutyá ra chi ra, ta quichahá catyí ra chi ra Jesús tyehe caa:  
—Yoho cuñún cha sacondutyé chuun, soco ña tahán chi cha sacondutyá yuhu chuun. Maun tahán chi sacondutyon chii —catyí ra.

<sup>15</sup> Soco ra Jesús catyí ra chi ra:  
—Cha vityin, na cuvi chi cuhva catyí yuhu chuun. Vatyí cuñí chi cha sacuvi yo tandihí cha cuñí Nyoo —catyí ra chi ra Juan. Tyicuan ta ndoq ra Juan vaha.

<sup>16</sup> Cha yahá ri condutyá ra Jesús ta quitá ra chichi ndutyá. Ta nuña ri andivi, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chi siqui ra.

<sup>17</sup> Tyicuan ta tyacu noo ndusu ityi andivi, ta catyí chi tyehe caa:

—Ican ra ihya cuví Sehi, ra cuñí xain chi. Ta sii xaan cuñí chihin ra —catyí ndusu cuan.

## 4

*Nu nducú nyehe cuihna chi ra Jesús*  
(Mr. 1.12-13; Lc. 4.1-13)

<sup>1</sup> Tyicuan ta Tatyí li Nyoo chinyacá chi ra Jesús noo chiqui ndi, tacuhva nducu nyehé cuihna chi ra.

<sup>2</sup> Ña chachi ra uvi xico quivi ta uvi xico ñuu. Ta yaha cuan ta chaá soco chi ra.

<sup>3</sup> Tyicuan ta tuhva cuihna chi ra, vatyí cuñi ra nducu nyehé ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

<sup>4</sup> Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyivi ta conyito ñu. Conyito tucu ñima ñu chihin tuhun cahán Nyoo” —catyí ra Jesús chi cuihna cuan.

<sup>5</sup> Tyicuan ta chinyacá cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan.

<sup>6</sup> Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

<sup>7</sup> Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

<sup>8</sup> Tyicuan ta chinyacá tucu cuihna cuan chi ra noo yucu sucun. Ta sañaha cuan tandihí cha

cahnu cuví nu nyacá ñaha rey ta ra cuví tyiño chi ñáyivi iyó siqui ñuhu ñayivi.

<sup>9</sup> Ta catyí cuihna cuan chi ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chii —catyí cuan chi ra.

<sup>10</sup> Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

<sup>11</sup> Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyee ra chi ra.

*Nu quichaha saha tyiño ra Jesús ñuu cha nyicú ityi Galilea*  
(Mr. 1.14-15; Lc. 4.14-15)

<sup>12</sup> Quivi cha chito ra Jesús vatyí ra Juan ñohó ra vehe caa, cuahan ra nya Galilea.

<sup>13</sup> Soco ña ndoo ra ñuu Nazaret, nu chahnū ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

<sup>14</sup> Tyehe caa cuví tacuhva chino cava tuhun cha tyaá ra Isaías nu tutu Nyoo ta cha naha. Catyí chi tyehe caa:

<sup>15</sup> Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

<sup>16</sup> Chinyicu añima ñu nu ñaa ñni vatyí chinyaca ñaha ra ña vaha chi ñu chihin tuhun chihi,

soco sandundichín ñuhu Sutu Mañi yo  
 añima ñu nu nyicú ñu, catyí ra Isaías.

<sup>17</sup> Nyacua nya quivi cuan, ta quichaha cahan ra  
 Jesús tuhun Nyoo chihin ñáyivi, ta catyí ra chi ñu:

—Ndu uvi iñi ndo cuatyí ndo vatyí yatyin ri  
 nyaá Nyoo ra cua cunyaca ñaha añima ndo —catyí  
 ra Jesús chi ñáyivi.

*Nu cana ra Jesús chi cumi tahan ra catín tiyaca  
 (Mr. 1.16-20; Lc. 5.1-11)*

<sup>18</sup> Ra Jesús chicá noo ra yuhu miñi cha nañí  
 Tyañuhu Galilea cuan. Ta nanyehe ra chi uvi  
 tahan ra chihin yañi ra, ra Simón cha nañí tucu  
 Pedro, ta ra Andrés. Ra catín tiyaca cacuví ra. Ta  
 cacañi ra yuhva ra nu ndutyá.

<sup>19</sup> Tyicuan ta quichaha catyí ra Jesús chi  
 ninduvi ra tyehé caa:

—Cunyicon ndo chii. Ta yuhu cusacuví vatyí  
 tari ñihí ndo tiyaca, tyicuan caa cuñihi ndo anima  
 ñáyivi (ta cutava ndo chi ñu nu quiñi caa na  
 quihvi ñu cuenda Nyoo) —catyí ra Jesús chi ra.

<sup>20</sup> Caa cuhva ri cuan casandoo ra yuhva ra ta  
 cuahan coyo ra chihin ra Jesús.

<sup>21</sup> Chiin ri ca chicá ra Jesús ityi nuu ca ta  
 nanyehe ra chi uvi ca ra chihin yañi ra, ra Jacobo  
 ta ra Juan. Sehe ra Zebedeo cacuví chi ra.  
 Canyicú ra chichi noo canoa chihin sutu ra  
 canaquicú ra yuhva ra. Ta cana ra Jesús chi ra.

<sup>22</sup> Ta caa cuhva ri cuan casandoo ra canoa cuan  
 ta chi sutu ra, ta cuahan coyo ra chihin ra.

*Nu sañahá ra Jesús chi cuaha ñáyivi  
 (Lc. 6.17-19)*

<sup>23</sup> Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo aña yó. Ta sanduvahá ra chi ñu cuhví chihin tandihí ri nuu cuehe cha iyó chi ñu.

<sup>24</sup> Cachitó tandihí ñáyivi ñuu cha nyicú Siria tuhun ra Jesús. Ta quichí nyaca ñu tandihí ñu cuhví chi ra: tandihí ñu siin siin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvahá ra chi tandihí ñu.

<sup>25</sup> Cuaha xaan ñáyivi nyicón chi ra Jesús: ñáyivi iyó ñuu cha nyicú Galilea, ñáyivi iyó ndi uchi ñuu Decápolis, ñáyivi iyó ñuu cha nyicú Judea, ta ñáyivi iyó inga chiyo yuvi cahnu Jordán ñandihí.

## 5

### *Nu cahán ra Jesús nuu ñáyivi nu chiqui (Lc. 6.20-23)*

<sup>1</sup> Cuhva cha nyehe ra Jesús tyi cuaha xaan ñáyivi, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyicu ñu nicachico nu nyaá ra.

<sup>2</sup> Tyicuan ta quichahá sañaha ra Jesús chi ñu tyehe caa:

<sup>3</sup> —Tandihí ri ñu cha chitó vatyi chiñuhú Nyoo chi ñu, si xaan cucuvi chi ñu, vatyi tahán chi vatyi cunyaca ñaha Nyoo aña ñu.

<sup>4</sup> Ta tandihí ri ñu nducuihya iñi vityin cha catyi cuatyí ñu, si xaan cucuvi chi ñu. Vatyi cusanaa Nyoo cha cuihya iñi ñu.

<sup>5</sup> 'Tandih̄i ri ñu cha ña cahnu sahá chi, s̄i xaan cucuvi chi ñu, vatyí cuquehen cuenda ñu ñuhu ñayiv̄i cha catyí Nyoo tyi cuhva ra chi ñu.

<sup>6</sup> 'Ta tandih̄i ri ñu cuñí xaan sacuvi cuhva catyí Nyoo, s̄i xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

<sup>7</sup> 'Ta tandih̄i ri ñu cha iyó tucahnu iñi chi, s̄i xaan cucuvi chi ñu, vatyí Nyoo, cucoo t̄cahnu iñi chi ra chihin ñu.

<sup>8</sup> 'Ta tandih̄i maa ñu ndund̄i añima saha Nyoo, s̄i xaan cucuvi chi ñu, vatyí ñu cuan, cunyehe ñu chi Nyoo.

<sup>9</sup> 'Ta ñu nducú cuhva cha coo taxi ri ñáyiv̄i chihin Nyoo s̄i xaan cucuvi chi ñu, vatyí Nyoo, cucatyí ra tyi sehe ra cuví chi ñu.

<sup>10</sup> 'Ta tandih̄i ñu cha tasi cuñí nyehe ñáyiv̄i chi ñu cha catyí cha sacuví ñu tari cuhva catyí Nyoo, s̄i xaan cuvi chi ñu, vatyí nyacá ñaha Nyoo añima ñu.

<sup>11</sup> 'Na cus̄i cuñi ndo tatu cahán ña vaha ñáyiv̄i siqūi ndo. Ta sanyehé ñu tindoho chi ndo. Ta tavá ñu cuaha cuendu siqūi ndo cha catyí yuhu.

<sup>12</sup> Na cus̄i cuñi ndo vatyí tatu tyehe caa sacuví ñu chihin ndo, s̄i xaan cucuvi chi ndo, vatyí cahnu xaan ta tyaqūi xaan cha cutahan chi chi ndo, nachaa ndo andiv̄i. Vatyí suri tyicuan caa chinyacuv̄i tucu ñu cha ña vaha chihin ra cacuví profeta cuenda Nyoo ta cha naha.

*Tatu sandih̄i yo cha chinó iñi yo chi Nyoo cuví yo tari ñ̄i cha ndih̄i cha uhva (Mr. 9.50; Lc. 14.34-35)*

<sup>13</sup> 'Nyoho cha chinó iñi ndo chii, tari ñ̄i vaha cuví ndo. Soco tatu ñ̄i, ta ndih̄i cha uhva, ma sacu

uhva ca chi cha cachi yo. Ña vaha ca ñi cuan.  
Tyicuan ta sacuita yo. Ta cuañi ñáyivi siqui chi.

*Tatu vaha quichahá yo tuhun cahán Nyoo, cuví yo  
tari ñuhú cha sandundichín nu cuahan ñáyivi nu ñaa  
iñi*

<sup>14</sup> Nyoho cuví ndo tari ñuhú cha sandundichín  
nu cuahan ñáyivi. Noo ñuu cha nyaá xiñi noo  
yucu, ma cuví quihí xehe. Tyicuan caa tahán chi  
cuví ndo.

<sup>15</sup> Ta yori yo cha tyaa yo noo ñuhú tima, ta  
tixehe yo chichi noo caja. Soco tyiso yo noo nu  
sucun vatyí sandichin chi chichí vehe tatu cua  
quihví ñáyivi, soco ndichin.

<sup>16</sup> Ta tyicuan caa tahán chi sandundichin tucu  
nyoho chihin ñuhú Nyoo cha iyó añima ndo nu  
cuahan ñáyivi. Tyicuan ta nanyehe ñu cha vaha  
cha nyacuví ndo, ta sacahnu ñu chi Sutu yo Nyoo  
ra nyaá andivi.

*Sañahá ra Jesús vatyí ñiñi xaan sacuvi yo ta sañaha  
yo tandihí tuhun cha tachí Nyoo chi yo*

<sup>17</sup> Ma cuñi ndo vatyí yuhu vachi sanai ley cha  
tachí Nyoo chi ra Moisés vatyí tyaa ra. Ta ni ri ña  
vachi sanai tuhun cha tyaa ra cacuví profeta  
cuenda Nyoo ta cha naha. Yuhu ña vachi vatyí  
sanai yucuan. Soco vachi quichahi tandihí cha  
catyí tuhun cuan, ta sañahí ñáá cha cuñí chi catyí.

<sup>18</sup> Cha ndicha catyí chi ndo vatyí cha ni ri ca  
cha iyó ca andivi chihin ñuhu ñáyivi ma naa ni  
chiin cha tyaa ra Moisés ta ra cacuví profeta Nyoo  
ta cha naha, nyacua nya yaha cuvi tandihí tari  
cuhva nyaá cha catyaa ra.

19 Yucuan chaha, tatu ña quichahá ñáyiví tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyiví, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chi inga ñáyiví. Ican ñu cuan cahnu xaan cucuvi ñu nu nyacá ñaha Nyoo.

20 Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuvi quihví ndo nu nyacá ñaha Nyoo.

### *Nu sañahá ra Jesús chi yo vatyí ma cuxaan yo chi ñáyiví*

21 'Nyoho cha cuaha chaha chiñí ndo tuhun cha catyí Nyoo chi ñu chiyó ta cha naha. Catyí ra: "Ma cahñi ndo chi ñáyiví, vatyí tatu cahñi ndo ñáyiví, tahán chi cutuñi chi ndo."

22 Soco yuhu, catyí chi ndo, vatyí vasi cha cuxaan ri ndo chi noo ñáyiví, o vasi cha cahán uhvi ri ndo chi ñáyiví, o vasi cha cahán nyaa ri ndo chi ñáyiví, tahán chi cutuñi chi ndo. Ta sñin ri saha cuenda ndo chi ndo coto cuhun ndo anyaya chihin cuatyí cuan.

23 'Ta yucuan chaha quiví cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nichon iñun vatyí ña vaha iyó noo yañun chuhun.

24 Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

*Sañahá ra Jesús vatyí cacan yo ticahnu iñi cuatyí yo coto cuhun yo anyaya (Lc. 12.57-59)*

<sup>25</sup> Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chi policía. Ta policía cuan cutyihi ra chuun vehe caa.

<sup>26</sup> Soco catyí chuun vatyí ma cuvi quiton vehe caa cuan nyacua nya tyiyahvun tandihí cha tahán chi tyiyahvun.

*Sañahá ra Jesús vatyí ni cha ndichi xiñi yo cha coo nonga ñusihí, o nonga ray# chi yo, ta ña vaha*

<sup>27</sup> Nyoho chiñi ndo tuhun vatyí catyí Nyoo ta cha naha vatyí nyoho cha iyó ñasihí ndo, ma coo inga ñusihí chi ndo.

<sup>28</sup> Soco yuhu catyí chi ndo, vatyí nya nyoho cha nyehé ndo chi noo ñusihí ta quihví iñi ndo chi ñu, catyí chi ndo vatyí chihin yucuan ri ta cha chicoo cuatyí ndo.

<sup>29-30</sup> Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhú chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhú chichi anyaya.

*Nu sañahá ra Jesús siqui ra sandoo ñasihí  
(Mt. 19.9; Mr. 10.11-12; Lc. 16.18)*

<sup>31</sup> Ta suri catyí tucu Nyoo chi ñáyiví chiyo ta cha naha vatyí yóo ra sandoo ñasihí, cuñí chi cuhva ra noo tutu cuenda cha sandoo ra chi ña.

<sup>32</sup> Soco catyí yuhu chi ndo, ñahri ityí iyó chi noo ra cha sandoo ra chi ñasihí ra tatu ña natuví ña chihin inga rayíi. Vatyí tatu sandoo ra chi ña, ta ñima cha catyí cuatyí cuan, chicoo cuatyí ra nuu Nyoo. Ta sñin ri saccoo ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

*Ma catyí yo “chito vaha maa Nyoo” tacuhva chino  
iñi ñáyiví vatyí ndicha cha cahán yo*

<sup>33</sup> Ta chiñi tucu ndo, vatyí catyí tucu Nyoo chi ñu chiyo ta cha naha tyehe caa: “Tatu tyanaha ndo Nyoo tyi cusacuví ndo noo cha cusacuví ndo, tahan chi cha sacuví ndo.”

<sup>34</sup> Soco yuhu catyí chi ndo vatyí ma tyanaha ndo Nyoo tacuhva chino iñi ñáyiví vatyí ndicha cha cahán ndo. Ta ma tyanaha ndo ni tuhun andiví, vatyí yucuan nu nyaá maa Nyoo cuví.

<sup>35</sup> Ta ni ri tuhun ñuhu ñayiví ihya ma tyanaha ndo, vatyí yucuan cuví nu chañí Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca.

<sup>36</sup> Ta ni ri tuhun xiñi ndo, ta ma tyanaha ndo, vatyí ma cuvi sanducuichin ndo ni noo ixi xiñi ndo. Ta ni ma cuvi sandutoon tucu ndo.

<sup>37</sup> “Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyí ra ña vaha tyiyuhú chi ndo cuví cuan.

*Nu sañahá ra Jesús vatyí tatu sacuvi ñáyivi cha ña vaha chihin yo, na sacuvi yo cha vaha chihin ñu (Lc. 6.29-30)*

<sup>38</sup> Ta chiñi tucu ndo cha catyí tuhun cha tyaa ra Moisés ta cha naha: “Vatyí tatu noo ñáyivi cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahan chi vatyí sañicuehe tucu ñáyivi chi maa ñu, tari cuhva cha sañicuehe ñu chi ndo.”

<sup>39</sup> Soco yuhu catyí chi ndo, vatyí ma nasacuvi ndo cha ña vaha cha nyacuvi ñu tasi iñi chi ndo. Vatyí tatu yóo cha cañi ñn chiyo xitín ndo, ma nduxaan ndo chi ñu. Soco cuhva tucu ndo inga chiyo xitín ndo na cañi ñu.

<sup>40</sup> O tatu chicán ñu cuatyí chaha ndo, ta cuñi ñu tinyaa ñu noo camisa ndo, ma cuxaan ndo chi ñu. Soco cuhva ndihi ndo chaqueta ndo chi ñu.

<sup>41</sup> O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro.

<sup>42</sup> Tatu yóo ñu chicán tumañi iñi chi ndo, cuhva ndo chi ñu. Ma catyí ndo cha ma saha ndo tumañi iñi cuan.

*Na cuñi yo chi ñu xaan iñi chi yo (Lc. 6.27-28, 32-36)*

<sup>43</sup> Ta chiñi tucu ndo tuhun cha catyí ñu chiyo ta cha naha vatyí cuñi ndo chi ra tahan ndo. Ta chi ra xaan iñi chi ndo quíhi tisihi iñi ndo chi ra.

<sup>44</sup> Soco yuhu catyí chi ndo, cuñi ndo chi ñáyivi xaan iñi chi ndo. Ta sacuvi ndo cha vaha chihin ñáyivi cahan chi ndo, ta chi ñu ña cuñi nyehe chi ndo. Ta çacan tahvi ndo chaha ñu quiñi nyacuvi chihin ndo ta sanyehé tindoho chi ndo.

<sup>45</sup> Ta tyicuan caa sacuvi ndo tacuhva coto ñáyivi vatyí cuví ndo sehe Sutu yo ra nyaá andivi. Vatyí maa ra sacañá ra ñanyii, ta sacoon ra savi siqui tyiño sahá ñáyivi vaha ta ñáyivi ña vaha ñandihi.

<sup>46</sup> Tatu nyoho ta cuñí ndo chi ñáyivi cha vaha iyó chihin ndo ta ña cuñí nyehe ndo chi ñáyivi xaan iñi chi ndo, ñahri cha vaha cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñí maa ndo.

<sup>47</sup> O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyivi ña ñohó nuu Nyoo.

<sup>48</sup> Tari Sutu yo cha nyaá andivi maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

## 6

### *Nu sañahá ra Jesús yoso caa sacuvi yo tumañi iñi*

<sup>1</sup> Saha ndo cuenda ta ma cuyaa ndo ñáá tumañi iñi sacuvi ndo chi ñáyivi. Vatyí tatu cuyaa ndo nuu ñáyivi, ñahri cuñihi ndo nuu Sutu yo ra nyaá andivi.

<sup>2</sup> Cuhva cha sahá ndo tumañi iñi, ma sacoto ndo chi inga ñáyivi vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyi ñáyivi vatyí vaha xaan ñáyivi cuví ra. Soco yucuan ri ñihí ra cuan ta ñahri ca cuñihi ra nuu Nyoo.

<sup>3</sup> Soco nya quivi sahá ndo tumañi iñi chi ñu ndahvi, ma sacoto ndo ni chi ra tahan cahnu ndo.

<sup>4</sup> Xehe ri sacuvi ndo, tacuhva cha ma coto ñáyivi. Tyicuan ta Sutu yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

*Nu sañahá ra Jesús yoso caa cahan yo chihin Sutu yo Nyoo*  
(Lc. 11.2-4)

<sup>5</sup> Ta cuhva cha chicán tahvi ndo chi Nyoo, ma cacan tahvi ndo tari cuhva sacuví ñu savahá chii. Vatyí ñu cuan tahán iñi ñu cacan tahvi ñu chi Nyoo nu tuvi ñáyivi, tacuhva catyi ñáyivi vatyí vaha xaan ñáyivi cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu.

<sup>6</sup> Soco nyoho ñáá quívi cacan tahvi ndo chi Nyoo, ma cacan tahvi ndo tacuhva nyehe ri ñáyivi chi ndo. Soco quíhvi ndo chichi vehe ndo ta nacasi ndo yuvehe ta cacan tahvi ndo chihin tandihi añima ndo. Ta noo tuhun ri maa Nyoo Sutu yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyivi. Ta cuaha ca cha vaha cucuhva ra chi ndo.

<sup>7</sup> Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá añima. Cuñí maa ñu vatyí tyicuan caa ta cuñi Nyoo cha cahán ñu. Vatyí cuaha xaan chaha cahán ñu susuri maa tuhun cuan.

<sup>8</sup> Ma sacuvi ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacan ndo chi ra.

<sup>9</sup> Yucuan chaha nyoho, tatu cua cacan tahvi ndo chi Nyoo, tyehe caa catyi ndo:

Sutu Mañi yuhu, yoho cha nyaún andivi. Sacahnú xaan ndi chuun.

<sup>10</sup> Na quichi quivi cha nyaca ñahun ihya siqui ñuhu ñayivi, tari nyacá ñahun andivi.

Na sacuvi ñáyivi ihya siqui ñuhu ñayivi tandihi cuhva cuñi maun, tari cuhva cuví gloria.

<sup>11</sup> Cuhva cha cachi ndi tacuhva cha yaha ndi noo noo quivi.

<sup>12</sup> Saha tucahnu iñi chi ndi ñáá ndihi cha ña vaha nyacuví ndi, tari maa ndi sahá ndi tìcahnu iñi chi ñu sataśi iñi chi ndi.

<sup>13</sup> Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandihi. Ta maun cuaha xaan ca tunyee iñi iyó chuun. Ta tahán chi vatyí sacahnu tandihi ñáyivi chuun tyicuan ri maa. Ta na cuví chi tyicuan caa.

Tyicuan caa cuhva tahán chi cacan tahvi ndo chi Nyoo.

<sup>14</sup> Vatyí tatu nyoho ta sahá ndo tìcahnu iñi chi ñu nyacuví cha ña vaha chihin ndo, tyicuan caa ta Sutú yo ra nyaá andivi, cusaha ra tìcahnu iñi chi maa ndo.

<sup>15</sup> Vatyí tatu ma saha ndo tìcahnu iñi chi ñu nyacuví cha ña vaha chihin ndo, tyicuan caa tucu Sutú yo, ma saha ra tìcahnu iñi cuatyí maa ndo —catyí ra Jesús.

*Ñáa quívi ña chachí yo ta nanducú yo chi Nyoo, ma sacoto yo chi inga ñáyivi*

<sup>16</sup> Ta catyí tucu ra Jesús chi ñu chicá noo chihin ra:

—Quívi cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñáyivi vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo.

<sup>17</sup> Soco tatu nya quívi ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo,

<sup>18</sup> tacuhva vatyí ma tuvi iñi ñáyivi vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo cha xehe ri cuan. Ta cuaha ca cha vaha cua cuhva ra chi ndo chihin nuu ñáyivi.

*Nu sañahá ra Jesus vatyí ma sacaya yo cha iyó siqui ñuhu ñáyivi  
(Lc. 12.33-34)*

<sup>19</sup> Ma sacaya ndo cha tyayí ihya ñáyivi. Vatyí coto tiví cha tyayí cuan. O cuví tucu quívi ra suhu, ta suhu ra tandíhi cha tyayí ndo.

<sup>20</sup> Vaha taxin ca sacaya ndo cha vaha chi ndo nu nyaá Nyoo gloria. Vatyí nuu Nyoo ña ndíhi cha vaha cuan. Vatyí ni ri ra suhu, ni quíti, yori cha sativí iyó yucuan.

<sup>21</sup> Ta catyí chi ndo vatyí nu nyaá cha tyayí ndo, yucuan cuví nu nyaá xiñi ndo. Ta yucuan cunyaa añima ndo.

*Tari sandichín chiti nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añaima yo (Lc. 11.34-36)*

<sup>22</sup> Chiti nuu ndo noo cha sandundichin ityi cuahan ndo cuví. Ta tyicuan caa tucu añaima ndo, tatu iyó cha ndichin Nyoo, vaha ñáyivi cuví ndo.

<sup>23</sup> Soco tatu ña vaha chiti nuu ndo, ña ndichin nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichin Nyoo nyaá añaima ndo, tari noo ra cuaa cuví ndo. Ña cuví nyehe ndo ityi vaha cha cuahan nu nyaá Nyoo.

*Sañahá ra Jesús vatyi ma cuvi quichaha yo chi Nyoo tatu cuñi xaan ca yo cha tyayii (Lc. 16.13)*

<sup>24</sup> Noo musu ma cuvi coo uvi chitoho ra. Vatyi musu cuan cuñi ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuvi cuñi ndo chi Nyoo, ta suri kuhva cuan cuñi ndo cha tyayii.

*Sañahá ra Jesús vatyi ma caca xaan iñi yo ñáá ndihi cha chiñuhú chi yo (Lc. 12.22-31)*

<sup>25</sup> Yucuan chaha catyí chi ndo vatyi ma caca xaan iñi ndo yoso caa ñihi ndo cha cachi ndo ta cha coho ndo. Ni ma caca iñi ndo ñáá cha cuihno ndo. Vatyi yahvi ca nyaá añaima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyi maa ra chahá ra ñayivi coo ndo.

Ta ña y<sup>ii</sup> cuhva ra inga cha chiñuhú chi ndo ñandihí.

<sup>26</sup> Saha ndo cuenda chi saa. Ña savahá ti itu. Ta ña sahá tyiño ti. Ni ri ña naquehén vaha ti tyiño sahá ti chichi yaca. Soco Sutu yo Nyoo chahá ra cha cachi ti. ¿Atu ña yahvi ca nyaá nyoho nuu Nyoo ta ñima ca saa cuan?

<sup>27</sup> Ni ri maa chicá xaan xiñi ndo ma cuvi sandusucun ndo ni chiin ca chi ndo.

<sup>28</sup> Ta tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiqui. Vatyí ña taví tun. Ta ni ña conó tun isa.

<sup>29</sup> Soco catyí chi ndo vatyí ni rey Salomón cha tyay<sup>ii</sup> xaan cuví ra, soco ña cuví cuihno ra cha tyaqui, tari cha sacuihnó Nyoo chi tu ita cuan.

<sup>30</sup> Ta tu ita cuan tyaqui xaan ñihno tun suhva ri quivi ta yaha cuan ta cuna ityi tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra.

<sup>31</sup> Yucuan chaha ma caca xaan xiñi ndo ta catyí ndo: “¿Ñáá cha cachi ndi, o ñáá cha coho ndi, o ñáá cha cuihno ndi?”

<sup>32</sup> Vatyí ñáyivi cha ñahri tuhun Nyoo caá aña, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andivi. Ta chitó ra ñáá ndihí cha chiñuhu chi ndo.

<sup>33</sup> Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra aña ndo. Ta sacuvi ndo tari cuhva cuñí maa ra. Ta tyicuan caa ñihi ndo tandihí cuí maa cha chiñuhú chi ndo.

<sup>34</sup> Tandihí quivi ta iyó tindoho chi ndo. Ma caca

xiñi ndo tuhun t̄ndoho cha vachi. Vatyí Nyoo nyaá ra chihin ndo.

## 7

*Ma cahan yo cha caá inga ñáyivi  
(Lc. 6.37-38, 41-42)*

<sup>1</sup>Ma cahan ndo cha caá inga ñáyivi. Tyicuan caa ta ma t̄in Nyoo cuenda cha caá ndo.

<sup>2</sup>Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo.

<sup>3</sup>¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun?

<sup>4</sup>Tatu chit̄i nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chit̄i nuun”?

<sup>5</sup>Yoho cha savahún chuun, t̄ava xihna vitu cahnu cha yihí chit̄i nuu maun, tyicuan ta cuví nyehe vahun mihin lee cha cutavon chit̄i nuu ra yañun.

<sup>6</sup>Ma sañihi ndo cahan ndo tuhun Nyoo chihin ñu ña cuñí coto, vatyí coto cañi ñu chi ndo. Tari ina cha t̄in vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

*Ma cundihñi yo cacan yo chi Nyoo, tyicuan ta  
cuhva ra chi yo  
(Lc. 11.9-13; 6.31)*

<sup>7</sup>Caçan ndo cha chiñuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Saçachan ndo yuvehe, ta nuña.

<sup>8</sup> Vatyí tandihí ndo cha chicán ndo, ñihí ndo. Tatu nanducú ndo, nañihí ndo. Ta tatu sacachán ndo yuvehe, cunuña yuvehe.

<sup>9</sup> Tyicuan caa tucu nyoho cha iyó sehe ndo. Chahá ndo cha vaha chi sehe ndo. Ña tuhvá ndo chaha ndo noo yuu chi sehe ndo, tatu chicán ndotyín pan chí ndo.

<sup>10</sup> Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chí ndo.

<sup>11</sup> Nyoho cha quiñi iyó ndo soco chitó ndo yoso caa cuhva ndo cha vaha chí sehe ndo. Ta vihi ca Sutu yo, ra nyaá andívi. Cuaha ca cha vaha cuhva ra chí ndo tatu cacán ndo chí ra.

<sup>12</sup> Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaa ra Moisés ta ra cacuvi profeta Nyoo ta cha naha.

*Tihin yuvehe ta cuiñi ityi cha cuahan nu nyaá Nyoo (Lc. 13.24)*

<sup>13</sup> Nducú ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan.

<sup>14</sup> Soco tihin yuvehe ta cuiñi ityi cha cuahan ñáyivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

*Chihin cha sacuvi ri ñáyivi, ta nichón nuu yo chí ñu tatu ñu vaha o ñu ña vaha cuvi ñu (Lc. 6.43-44)*

<sup>15</sup> Saha ndo cuenda chí ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu

nyicú ndo. Sahá ra tyi ra vaha cacuví ra. Soco tari noo ñaña xaan cacuví ra.

<sup>16</sup> Nyoho cuví nicohón nuu ndo chi ra chihin cha nyacuví ra. Tari noo yutun ña vaha, tyicuan caa cacuví ra. Vatyí noo tuñiyaca ma cuhva tun mango, ta ni ri noo iñu nduhva ma cuvi cuhva chi tichaha ndivi.

<sup>17</sup> Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha.

<sup>18</sup> Ta yutun vaha, ma cuvi cuhva tun chiti ña vaha. Ta ni ri yutun ña vaha ma cuvi cuhva tun chiti vaha.

<sup>19</sup> Ta tandihí yutun cha ña chahá chiti vaha, cahnya yo chi tun. Ta cahmi yo chi tun.

<sup>20</sup> Ta tyicuan caa, chihin cha nyacuví ñáyivi cuví nicohon nuu ndo chi ñu tatu ñu vaha cuví ñu, o ñu ña vaha cuví ñu.

*Nu catyí ra Jesús vatyí ña tandihí ñáyivi quihví ñu nu nyacá ñaha Nyoo (Lc. 13.25-27)*

<sup>21</sup> Ma tandihí ñu cha catyí chii: “Sutu Mañi yuhu, Sutu Mañi yuhu”, cuquihvi ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ícan ñu cuan cuquihvi nu nyacá ñaha ra.

<sup>22</sup> Quivi cha cucutuñi chi ñáyivi, cuaha xaan ñu cucatyí ñu chii tyehe caa: “Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí añima ñáyivi. Ta cuaha xaan milagru savahí chihin sivun”, cucatyí ñu chii.

<sup>23</sup> Tyicuan ta yuhu cucatyí chi ñu: “Ña ñohó nui chi nyoho. Canyaha ndo nu nyaí. Vatyí nyoho sacuví ndo maa maa ri cha ña vaha.”

*Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra*

*(Lc. 6.47-49; Mr. 1.22)*

<sup>24</sup> Ihya catyí chi ndo, yóo cha chiñí tuhun cahín ta sacuví tari cuhva catyí; cuví ra tari noo ra chiñí tuñi cha savahá ra vehe ra siqui cava.

<sup>25</sup> Ta quichahá coon savi. Ta cama xaan yuvi ndutya yahá. Ta ñihi xaan caa tatyí. Soco ña cuví sanduva chi vehe cuan. Vatyí ñihi nanyaá siqui cava cuan.

<sup>26</sup> Soco yóo cha chiñí tuhun cahín, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti.

<sup>27</sup> Ta chaá savi. Ta cama xaan yuvi ndutya yahá. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

<sup>28</sup> Cuhva cha ndihí cahan ra Jesús chihin ñáyivi, iyo xaan cuñi ñu tuhun cha sañahá ra.

<sup>29</sup> Vatyí sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

## 8

*Nu sanduvahá ra Jesús chi noo ra cuhví cha tyahyú coño*

*(Mr. 1.40-45; Lc. 5.12-16)*

<sup>1</sup> Cuhva cha noo ra Jesús yucu cuan, cuaha ñáyivi nyicón chi ra.

<sup>2</sup> Ta chaá noo ra cha tyahyú coño, ta chicuiñi chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chíi —catyí ra chi ra.

<sup>3</sup> Tyicuan ta sanacaá ra Jesús ndaha ra ta tiin ra chi ra, ta catyí ra:

—Cuñí sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvaha nu tyahyu cuan.

<sup>4</sup> Tyicuan ta quichaha catyí ra Jesús chi ra:

—Nyehé, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyí tacuhva coto ñu vatyí cha nduvahun.

*Nu sanduvahá ra Jesús chi musu noo ra capitán (Lc. 7.1-10)*

<sup>5</sup> Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra,

<sup>6</sup> ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyí ñihi xaan tahán ra.

<sup>7</sup> Ta catyí ra Jesús chi ra:

—Cuhun mai ta cusanduvahi chi ra —catyí ra chí ra.

<sup>8</sup> Nacahan capitán cuan ta catyí ra:

—Sutu Mañi yuhu, ña nañé cha cahun vehi; soco tacuhva catyí run, ta musi nduvaha ra.

<sup>9</sup> Vatyí suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cahun ra. Ta tatu cane chi inga

ra, quichi ra. Ta tatu cha tave tyiño chi musi, sacuvi ra.

<sup>10</sup> Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyí ñuu cha nyicú nicañu Israel, ta nañihi que ni noo ñáyivi cha chinó xaan iñi ñu tari chinó iñi ra ihya.

<sup>11</sup> Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi.

<sup>12</sup> Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

<sup>13</sup> Tyicuan ta quichaha catyí ra chi capitán cuan tyehe caa:

—Cuahan, ta na cuvi chi tari cuhva catyūn vatyí chinó xaan iñun chii —catyí ra.

Ta suri cuhva cuan nduvaha musu ra.

*Nu sanduvaha ra Jesús chi maha tyiso ra Pedro (Mr. 1.29-31; Lc. 4.38-39)*

<sup>14</sup> Ta cha yaha cuan, chaā ra Jesús vehe ra Pedro. Ta nanyehē ra chi maha tyiso ra Pedro, catuví ña nu chito chihin cahñi.

<sup>15</sup> Ta tñn ra ndaha ña, ta quita cahñi cuan chi ña. Ta ndicuita ña, ta quichaha tyiñuhu ña chi ra.

*Nu sanduvaha ra Jesús cuaha ñu cuhvi (Mr. 1.32-34; Lc. 4.40-41)*

<sup>16</sup> Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tava ñehe

ra chi tatyí ña vaha cuan, ta sanduvaha ra chi tandihí ñu cuhví.

<sup>17</sup> Tyicuan caa cuví tacuhva vatyí na chino cava tari cuhva catyí ra profeta Isaías, quívi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

*¿Yoso chiquihí chi yo tatu cuñí yo cunyicon yo chi ra Jesús?*

*(Lc. 9.57-62)*

<sup>18</sup> Tyicuan ta nyehe ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi.

<sup>19</sup> Tyicuan ta chaa noo ra sacuaaha ley vehe ñuhu ta catyí ra chi ra:

—Maestro, cuñí cunyiquen chuun tandihí ri ityí nu cuhun —catyí ra.

<sup>20</sup> Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayí cha quichi nya gloria, ñahri vehi ta ni ri nu cava xiñi ta ñahri —catyí ra.

<sup>21</sup> Inga tucu ra chicá noo chihin ra catyí ra chi ra:

—Tata, cuhva na cuhun xihne cutyihí chi suti chichi ñuhú, tyicuan ta quichi ta cunyiquen chuun —catyí ra.

<sup>22</sup> Ta catyí ra Jesús chi ra:

—Ñaha yoho vatyí cunyicon chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

*Nu sacutaxín ra Jesús tatyí xaan*  
*(Mr. 4.35-41; Lc. 8.22-25)*

<sup>23</sup> Tyicuan ta quihv<sub>i</sub> ra chichi canoa, ta ra cachicá noo chihin ra, cuahan coyo ra chihin ra.

<sup>24</sup> Ta chaq noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra.

<sup>25</sup> Ta ra cachicá noo chihin ra sandoy<sub>o</sub> ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñí cunaa yo!

<sup>26</sup> Ta catyí ra Jesús chi ra:

—¿Ñáá tuhun cha yuhví xaan ndo? ¡Nyoho chiin xaan chinó iñi ndo chii!

Tyicuan ta nacand<sub>a</sub> ra ta sacutax<sub>i</sub>n ra tatyí nu miñi cuan, ta tandih<sub>i</sub> cutax<sub>i</sub>n.

<sup>27</sup> Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

*Nu nduvah<sub>q</sub> uvi ra ñuu Gadara ra cayih<sub>i</sub> tatyí ña vaha chi*

*(Mr. 5.1-20; Lc. 8.26-39)*

<sup>28</sup> Tyicuan ta chaq coyo ra inga chiyo miñi cha nyaá ñuhú cha nañí Gadara. Ta chaq coyo uvi tahan ra yihí tatyí ña vaha chii. Ta nu ñaña caquit<sub>a</sub> coyo ra cuan. Xaan vavaha ra, ta yori maa cuví yaha ityi cuan.

<sup>29</sup> Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindocho chi ndi cha ni cumañi ca cha quiv<sub>i</sub>? —cacatyí ra cuan.

<sup>30</sup> Ta yatyin ri cuan nyicú cuaha quini cachachí ti.

<sup>31</sup> Ta catyí tatyí ña vaha cuan chi ra Jesús:

—Tatu cuatava ñehun chi ndi, cūhva cha quihví ndi chichi quini cuan —cacatyí tatyí ña vaha cuan.

<sup>32</sup> —Vaha. Quihví ndo —catyí ra Jesús.

Ta caquita coyo tatyí ña vaha cuan, ta quihví coyo chichi tandihí quini canyicú cuan. Ta tandihí quini cuan cachinō ti ta canacoyo ti noo xahva yuhu miñi cuan, ta chihí ti chihin ndutya cuan.

<sup>33</sup> Tyicuan ta ra casahā cumi chi ti cuan, cachinó vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi.

<sup>34</sup> Ta tandihí ñáyiví ñuu, chahan ñu chinyehé ñu chi ra Jesús, ta chacū ndahví ñu nuu ra na quita ra yucuan.

## 9

*Nu sanduvahá ra Jesús chi noo ra cuhví cha ña cuví nacanda*

*(Mr. 2.1-12; Lc. 5.17-26)*

<sup>1</sup> Tyicuan ta quihví ra Jesús chichi canoa ta yahā sava ra inga chiyo miñi, ta nachaā ra nya ñuu nu iyó ra.

<sup>2</sup> Nu nyaá ra yucuan chinyacā ñáyiví chi noo ra cuhví cha ña cuví nacanda catuví ra nu chito. Ta cha nyehē ra Jesús vatyi chinó xaan iñi ñu chi ra, quichahā catyí ra chi ra cuhví cuan:

—Saní iñun, suti vatyi cha chicoō ticahnu iñi cuatyun —catyí ra chi ra.

<sup>3</sup> Tyicuan ta quichahā chica xiñi suhva ra sacuahá ley vehe ñuhu cha nyicú yucuan tyehe

caa: “Ra ihya chicoꝝ cuatyí ra nu Nyoo chihin tuhun cahán ra”, cachicá xiñi ra.

<sup>4</sup> Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo?

<sup>5</sup> Vatyí ¿nya cha yí ca catyí yo: atu yí ca catyí yo “Cuatyun cha yaha ndachi”, o yí ca catyí yo: “Ndícuita ta cacon”?

<sup>6</sup> Vaha. Cuasañahi chi ndo vatyí yuhu Rayí cha quichi nya gloria, iyó ityi chii síqui ñuhu ñáyiví ihya vatyí sahi ticahnu iñi cuatyí —catyí ra Jesús.

Tyicuan ta catyí ra chi ra cuhví cuan:

—Ndícuita, naquehen chiton ta cuanuhu nya vehun —catyí ra.

<sup>7</sup> Tyicuan ta ndícuita ra cuhví cuan ta cuanuhu ra nya vehe ra.

<sup>8</sup> Cuhva cha nyehe ñáyiví tuhun ihya, canayuhví ñu. Ta casacahnú ñu chi Nyoo vatyí chaha ra tunyee iñi cuan chi ñáyiví.

*Nu caná ra Jesús chi ra Mateo  
(Mr. 2.13-17; Lc. 5.27-32)*

<sup>9</sup> Quita ra Jesús yucuan, ta nanyehé ra chi noo ra cha nañí Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndícuita ra Mateo ta tyinyicon ra chi ra.

<sup>10</sup> Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú

tucu ra yucuan nu mesa #n ri chihin ra Jesús ta ra cachicá noo chihin ra.

<sup>11</sup> Soco cha canyehe ra fariseo cha tyicuan caa, candacā tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

<sup>12</sup> Chiñi ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra.

<sup>13</sup> Cuahan ndo ta cutuhva ndo cha cuñí chi catyí nu tutu Nyoo, nu catyí ra tyehe caa: “Yuhu cuñí vatyí cundahvi cuñi ndo chi ñáyiví, ta ñima ca cha cahñi ndo quiti ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

*Nu catyí ra Jesús vatyí cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar*

*(Mr. 2.18-20; Lc. 5.33-35)*

<sup>14</sup> Tyicuan ta ra canyicón chi ra Juan, ra sacondutya chi ñáyiví, catuhva ra chi ra Jesús ta candacā tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

<sup>15</sup> Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyí cucuachiyo ra nu nyicú ñu, tyicuan ndicha ta cusavaha ñu ayuno.

*Nu sañahá ra Jesús vatyí ña chachí tahan tuhun chahnu cha iyó ñu chihin tuhun chaa cha sañahá ra chi ñu*  
(Mr. 2.21-22; Lc. 5.36-39)

<sup>16</sup> Yori naquicú noo vestido chahnu chihin noo sahma chaa vatyí coto cundiyo nu naquicu ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca.

<sup>17</sup> Ta ni ña tyihí yo vinu chaa chichi ñi chahnu vatyí tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñi chi tyihi yo vinu chaa chichi ñi chaa, ta tyicuan ta ninduvi ta cusaha cuenda chi chi tahan chi.

*Sehe ra Jairo, ta ñaha cha tñn sahma ra Jesús*  
(Mr. 5.21-43; Lc. 8.40-56)

<sup>18</sup> Cha ni ri ca cha catyí ra Jesús tuhun ihya, chaa noo ra cuví nuu chi ñu Judea ta chicuñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

<sup>19</sup> Ndicuita ra Jesús ta cuahan ra in ri chihin ra ta ra cachicá noo chihin ra ñandihi.

<sup>20</sup> Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tñn ña yuhu sahma ra,

<sup>21</sup> vatyi tyehe caa chicá xiñi ña: “Ma chihin cha tñn ri sahma ra ta nduvahi”, chicá xiñi ña.

<sup>22</sup> Soco ra Jesús nanyocavā ra nanyehe ra chi ña, ta catyi ra chi ña:

—Ndunñi iñun sihi, cha nduvahun vatyi chinó iñun —catyí ra.

Ta caa cuhva ri cuan ta nduvahā ña.

<sup>23</sup> Yahā cuan ta chaā ra Jesús vehe ra cuví nuu cuan, ta nyehe ra vatyi ra música canyatú tuhva ra cha cuhun coyo ra nu quihvi cue chichi ñuhú. Ta ñáyivi cha nyicú cuan chacú chaa ñu.

<sup>24</sup> Ta catyí ra chi ñu:

—Quita ndo ihya. Ñaha tyivaa ihya, ña chihñi ña, soco quixí ña —catyí ra.

Ta chacú cuehe ri ñáyivi nyehe ñu chi ra.

<sup>25</sup> Soco ra Jesús tavā ra chi ñu ityi chata vehe, tyicuan ta quihvi ra ta tñn ra ndaha ñaha tyivaa cuan, ta maa ña ndicuitā ña.

<sup>26</sup> Ta tandihñi ityi cuan chityā tuhun cha cuví yucuan.

### *Nu sanduvahā ra Jesús chi uvi ra cuaa*

<sup>27</sup> Cuhva cha quitā ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—¡Cundahvi cuñi chi ndi, yoho ra vachi tata ra David! —cacatyí ra.

<sup>28</sup> Ta cuhva cha quihvi ra Jesús chichi vehe, ra cuaa cuan, catuhvā ra chi ra, ta maa ra Jesús quichaha ndacā tuhun ra chi ra:

—¿Atu chinó iñi nyoho vatyi cuví sanduvahi chi ndo? —catyí ra.

Ta canacahān ra ta catyí ra:

—Ay, chinó iñi ndi chuun, Sutu Mañi yuhu  
—cacatyí ra.

<sup>29</sup> Tyicuan ta t̄ijn ra Jesús chiti nuu ra ta catyí ra  
chi ra:

—Na cuvi maa yoso cuhva chinó iñi ndo —catyí  
ra.

<sup>30</sup> Ta canduvah̄a chiti nuu ra. Ta catyí vaha ra  
Jesús chi ra tyehe caa:

—Nd̄ucu ndo cuhva cha yori coto.

<sup>31</sup> Soco quit̄a coyo cuiri ra ta quichaha  
canacatyí ra cha sacuv̄i ra Jesús chihin ra chi  
ñáyivi tand̄ihi ityi yucuan.

### *Nu sanduvah̄a ra Jesús chi noo ra ñihí*

<sup>32</sup> Cha ni ri ca cha caquit̄a coyo ra cucuaa cuan,  
suhva ñáyivi quich̄i nyaca ñu chi noo ra ñihí cha  
yihí noo tatyí ña vaha chi nu nyaá ra Jesús.

<sup>33</sup> Ta caa cuhva ri cha tav̄a ñehe ra Jesús tatyí ña  
vaha cuan, quichah̄a cuvi cahan ra cuan. Ta iyo  
xaan cuñí ñáyivi, ta catyí ñu:

—Ni noo chaha ta cuvi ca cha tyehe caa Israel  
Ihya —catyí ñu.

<sup>34</sup> Soco ra cacuvi fariseo, cacatyí ra:

—Ra ihya tavá ñehe ra tatyí ña vaha chihin  
tunyeé iñi chi cuihna ra cuví nuu —catyí ra.

### *Nu catyí ra Jesús vatyi ña cuaha maa ñu sahá tyiño cuenda Nyoo iyó*

<sup>35</sup> Ra Jesús chahan ra tand̄ihi ñuu sañahá ra chi  
ñáyivi chichi vehe ñuhu tahan tahan ñuu. Cahán  
ra tuhun Nyoo yoso caa nyacá ñaha Nyoo añima  
ñáyivi. Ta sanduvahá ra tand̄ihi nuu cuehe cha  
yihí ñu.

<sup>36</sup> Ta cha nanyehé ra chi ñáyivi, cundahvi cuñí ra nyehé ra chi ñu, vatyi nyehé ñu tindocho ta cuihya cuñí ñu, tari mbee quiti cha yori sahá cumi chi.

<sup>37</sup> Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra.

<sup>38</sup> Yucuan chaha, çacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

## 10

*Nu cachí ra Jesús chi ndi uchi uvi ra caca tyiño ra (Mr. 3.13-19; Lc. 6.12-16)*

<sup>1</sup> Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chi ra vatyi tava ñehe ra chi tatyí ña vaha cha yihí añima ñáyivi, ta sanduvaha ra ndihi nuu cuehe ta cha uhvi ñandihí.

<sup>2</sup> Ican ihya cuví sivi ndi uchi uvi ra chicá tyiño ra: xihna ca, ra Simón, cha nañí tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuví chi ra;

<sup>3</sup> ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañí tucu Tadeo,

<sup>4</sup> ta ra Simón cha yihí cuenda ityi ra cacuñí cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

*Nu tachí ra Jesús chi ra cachicá noo chihin ra, na cucahan ra tuhun Nyoo (Mr. 6.7-13; Lc. 9.1-6)*

<sup>5</sup> Ta tyehe caa tachí ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuví, ta ni ma quihví ndo ñuu cha nyicú Samaria.

<sup>6</sup> Cuahan ndo, soco nu nyicú mbee cha cuanaa cha cuví ñu ñuu Israel.

<sup>7</sup> Cuahan ndo cuacahan ndo tuhun vatyí cha chaá cha cunyaca ñaha Nyoo añima ñáyívi.

<sup>8</sup> Sanduvaha ndo chi ñu cuhví ñu tyahyú coño, ta ñu yihí inga cuehe chii. Sanandoto ndo ndíyi, tava ñehe ndo chi tatyí ña vaha cha yihí chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyíño ndo soco ma quehen ndo yahvi.

<sup>9</sup> Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha.

<sup>10</sup> Ma cuiso ndo ni yono cha cuenda cha caca ityi ndo. Noo ri camisa cha ñihno ndo cuhun chihin ndo. Ta ma cuiso ndo inga ityi ndichan, ni yutun ma tuvi ndo, vatyí ra sahá tyíño, iyó ityi chi ra cha coo yahvi ra.

<sup>11</sup> Cuhva cha chaa ndo noo ñuu, nducu ndo noo ñáyívi cachi iyó, ta ndo ndo vehe ñu nyacua nya quita ndo ñuu cuan.

<sup>12</sup> Cuhva cha cua quihví ndo noo vehe, cuhva ndo nocumi chi ñáyívi iyó vehe cuan. Ta catyí ndo chi ñu: Na coo cha taxi Nyoo añima ndo, catyí ndo chi ñu.

<sup>13</sup> Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu.

Soco tatu ña nacotó ñu vatyí chiñuhú cuan chi ñu, ma ndoo cuan chihin ñu.

<sup>14</sup> Ta tatu ña cuñí ñu quehen cuenda ñu chi ndo, ta ni ña cuñí ñu cuiñi ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo.

<sup>15</sup> Cha ndicha catyí chi ndo vatyí quivi cutuñi chi ñáyivi, ñihi ca cutachi tuñi Nyoo chi ñu cuan, ta ñima ca ñáyivi ñuu Sodoma ta ñuu Gomorra.

*Nu sañahá chi ñáá ndihi tindoho cunyehe ñu chicá tyiño Nyoo*

<sup>16</sup> ¡Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma.

<sup>17</sup> Saha ndo cuenda chi ndo vatyí ñáyivi cucuhva cuenda ñu chi ndo chi ra cuví tyiño, ta chichi vehe ñuhu cucañi ñu chi ndo.

<sup>18</sup> Ta cha cuenda yuhu, nyacua cunyaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví.

<sup>19</sup> Soco tatu nacuhva cuenda ñu chi ndo chi ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo.

<sup>20</sup> Vatyí ñima maa ndo cucahan, soco maa Tatyí Ii Sutu yo Nyoo cusacahan chi ndo.

<sup>21</sup> 'Rayi cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe ra. Ta yihí ñáyivi cunanuhu ñu siqui sutu ñu ta sihi ñu, ta cusacuvi ñu, na cúvi ñu.

22 Tandihí ñáyiví, cucutasí cuñi nyehe ñu chi ndo cha catyi yuhu. Soco tatu ña ndu uvi iñi ndo chino iñi ndo chii, tyicuan ta cucacu añima ndo.

23 Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chi ndo ni cha ta ndihí ca cahan ndo tuhun Nyoo tandihí ñuu nu nyicu ñáyiví Israel ta yuhu Rayí cha quichi nya gloria cuquichi inga chaha.

24 'Ni noo ra cutuhvá, ña cahnu ca ra cuví ra ican saha ra sacuahá chi ra. Ta ni noo musu, ña cahnu ca cuví ra ican saha chitoho ra.

25 Ra cutuhva, cuñí chi ndoo ra vaha cha chaa ra cuví ra tari ra sacuahá chi ra, ta musu tari chitoho ra. Tatu yuhu ra cuví chitoho vehe, catyí ñu chii vatyí Beelzebú, cuihna ra cuví nuu, cuví, suri tyicuan caa cucatyí tucu ñu chi ñáyiví cuende.

### *Yóo chi tahán chi cuyuhvi yo (Lc. 12.2-7)*

26 'Yucuan chaha ma yuhvi ndo chi ñáyiví, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihí ñáyiví.

27 Tandihí cha catyí chi ndo nu ñaa iñi, catyí nyoho nu ndichin. Ta tandihí cha catyi chi ndo nu xehe, çana chaa ndo nya xiñi vehe, na coto tandihí ñáyiví.

28 Ma yuhvi ndo chi ñu चाह्नी coño ñuhu yo, vatyí ma cuví चाह्नी ñu añima yo. Soco yuhvi ndo chi ra cuví sanaa coño ñuhu yo ta añima yo chichi anyaya ñandihí.

<sup>29</sup> ¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo.

<sup>30</sup> Vatyí nyacua nya ixi xiñi nyoho ta chitó Nyoo yoso tahan nyaá.

<sup>31</sup> Ma yuhvi ndo. Nyoho, yahvi ca nyaá ndo ta ñima ca ticuítí saa.

*Ma yuhvi yo cahan yo tuhun ra Jesucristo nuu ñáyiví  
(Lc. 12.8-9)*

<sup>32</sup> Tandihí ñu cha cahán vaha tuhin nuu ñáyiví, yuhu tucu cucahan vahi cuenda ñu nuu Suti ra nyaá andiví.

<sup>33</sup> Soco ñu cahán nuu cahan tuhin, yuhu tucu ma cahin tuhun ñu nuu Suti ra nyaá andiví.

*Cha cuenda ra Jesús cusñin ñáyiví  
(Lc. 12.51-53; 14.26-27)*

<sup>34</sup> Ma cuñi ndo vatyí yuhu vachi cuhve cha taxi ri coo ndo siqui ñuhu ñayiví ihya. Ña vachi cuhve cha taxi ri, soco cha cañi tahan ñáyiví.

<sup>35</sup> Vatyí sasiñ chi ndo. Vatyí noo ra cuhun ra siqui sutu ra. Ta noo ña cuhun ña siqui sihi ña. Ta ñu cuví chono cucañi tahan ñu chihin tyiso ñu.

<sup>36</sup> Ta tyicuan caa suri ñáyiví chi ndo cucuvi ñu ñu xaan iñi chi ndo.

<sup>37</sup> Ñu cha cuñí ca chi sutu o chi sihi ican saha chi yuhu, ña tahán chi cuví ñu ñu cuende. Ta ñu cuñí ca chi sehe, ican saha chi yuhu, ña tahán chi cuví ñu ñu cuende.

<sup>38</sup> Ta ñu cha ña cuñí nyehe tindocho ta cunyicon ñu chii, ña tahán chi cuví ñu ñu cuende.

39 Vatyí ñu ña cuñí nyehe t̄indoho cha cuenda yuhu, cunyehe ñu t̄indoho anyaya, soco ñu nyehé t̄indoho ta chahá ñayiv̄i cha catyi yuhu, cucacu añima ñu.

*Yahvi cha tahán chi chi yo*  
(Mr. 9.41)

40 Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda ñu chi ra cha tach̄i chii.

41 Ñu quehén cuenda noo ra profeta Nyoo cha cuenda vatyí cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chi noo ra vaha cha cuenda tyi ra vaha cuví ra, suri tahán yahvi cha cuñihi ra vaha cuan cuñihi ñu.

42 Ta savahri ñu cha cuhva vasi noo vasu ndutya vichin coho ñu nyihi ihya cha cuenda cha nyicón ñu chii, cuñihi ñu cha cucuhva Nyoo chi ñu —catyi ra Jesús.

## 11

*Ra cha tach̄i ra Juan nu nyaá ra Jesús*  
(Lc. 7.18-35)

1 Ndihī chah̄a ra Jesús tuhun chi uchi uvi ra chicá noo chihin ra, tyicuan ta quit̄a ra yucuan, vatyí cucahan ra tuhun Nyoo chihin ñáyiv̄i cha iyó ñuu cha nyicú ityi cuan.

2 Ta ra Juan nu ñohó ra vehe caa, ñih̄i ra tuhun cha sacuví ra Cristo. Tyicuan ta tach̄i ra chi uvi ra nyicón chi ra, cundaca tuhun ra noo tuhun chi ra Jesús. Ta cachaā coyo ra nu nyaá ra

3 ta cacatyí ra chi ra:

—¿Atu yoho cuvún ra Cristo cha tahán chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

<sup>4</sup> Nacahan ra Jesús ta catyí ra:

—Cuahan ndo ta catyi ndo chi ra Juan cha nyehé ndo, ta cha chiñí ndo.

<sup>5</sup> Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra añima ñu.

<sup>6</sup> Siñ xaan cuñí ñu ña chicá uvi iñi nyicón chii.

<sup>7</sup> Cuhva cha cuahan coyo ra, ra Jesús quichaha cahan ra tuhun ra Juan chihin ñáyivi, ta catyí ra:

—¿Ñáá cha chahan nyoho chinyehe ndo chiqui ndiñi cuan? ¿Atu chinyehe ndo noo ndoo cha naquisí tatyí? ¿Ñáá cha nyehé ndo?

<sup>8</sup> ¿Atu nyehé ndo noo ra vaha ñihno? Ñima. Nyoho chitó ndo vatyí ra ñihno vaha, nyaá ra vehe rey.

<sup>9</sup> Tu tyicuan caa, ¿ñáá cha chahan ndo chi nyehé ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo.

<sup>10</sup> Vatyí ican ra Juan ihya, cuví cha cahán tuhun nu tutu Nyoo tyehe caa:

Yuhu cuví Nyoo ta tachí chi noo ra cahan tuhin ityi nuu nu cahun.

Vatyí cucahan ra tuhun chihin ñáyivi nanasama ñu cuhva iyo ñu ta cuatu tuhva ñu quivi quichun.

11 'Cha ndicha catyí chi ndo, vatyi chichi cha tandihi ñáyivi, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyivi. Soco ra cha nyacá ñaha Nyoo añima, vasi cuví ra noo ra luhlu ca, soco cahnu ca ra ta ñima ca ra Juan.

12 Nyacua nya quivi cha chaq̄ ra Juan ta nya vityin, cuaha ñu ndachan sahá chii nducú sativi ñu tuhun Nyoo, ña cuñí ñu cha cunyacá ñaha Nyoo añima ñáyivi.

13 Ra Moisés cahan ra tuhun yoso caa nyacá ñaha Nyoo añima ñáyivi, ta tyicuan caa tucu tandihi ra profeta nyacua nya quivi quichi ra Juan.

14 Ta tatu cuñí nyoho chino iñi ndo tuhun cahín, catyí chi ndo vatyi profeta Elías cha tahan chi quichi, ra Juan cuví ra.

15 Yóo ñu cha cutuñi iñi, na tyasoho ñu tuhun cahín.

16 ¿Yóo chihin sandu inuu ri chi ñáyivi cha iyó tyembu ihya? Tari ra cuatyaa cuví ñu, vatyi chicunyaa ndotyin nuyahvi nyasiqui ndotyin, ta canachaa ndotyin chi ra tahan ndotyin, ta catyí ndotyin tyehe caa:

17 "Tivi ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahan iñi ndo.

18 Vatyi quichi ra Juan, cha ña chachi ra ta ña chihí ra, ta nyoho catyí ndo vatyi noo tatyí ña vaha yihí chi ra.

19 Yahā cuan ta quichi tucu yuhu Rayi cha quichi nya gloria. Ta yuhu chachí ta chihí tandihi, ta catyí ndo tyi ra cuahyi ra tuhvá chihí cuví. Ta

ña tahán iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahin ta tuhun cahan ra Juan, ta maa ñu cusañaha chi ndo vatyí vaña cha chiñi tuñi Nyoo —catyí ra Jesús.

*Uvi ñuu nu ña tyasohó ñáyivi tuhun Nyoo  
(Lc. 10.13-15)*

<sup>20</sup> Tyicuan ta quichaha cahan ra Jesús chi ñu ñuu nu sacuví ra cuaha milagru, vatyí ñáyivi cuan ña canasama maa ñu cuhva iyó ñu, ta catyí ra:

<sup>21</sup> —¡Ndahvi nyoho, ñu ñuu Corazin! ¡Ndahvi nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehe ñu. Soco tyehe ta nyehe ñu nyatu cahnu quivi cuan tari cha nyehé nyoho vityin, tañi tyehe ri ndihvi noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

<sup>22</sup> Soco catyí chi ndo vatyí quivi cutuñi chi nyoho nuu Nyoo, cahnu ca cha uhvi cunyehe ndo ta ñima ca ñáyivi Tiro ta Sidón.

<sup>23</sup> Ta nyoho ñu ñuu Capernaum, cuñí maa ndo tyi cundaa ndo nya andivi, soco cunoo ndo nya nu nyicú ñu ndiyi. Vatyí tyehe ta cuví milagru ñuu Sodoma cuan, tahán cha cuví ñuu ndo, ñuu cuan coo ca nyacua nya vityin.

<sup>24</sup> Soco catyí chi ndo vatyí quiví cutuñi chi nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

*Cuhva ndo chi ndo chii, ta cuhve cha nyitatu ndo, catyí ra Jesucristo (Lc. 10.21-22)*

<sup>25</sup> Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andivi ta ñuhu ñayivi. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí.

<sup>26</sup> Ndicha Sutu Mañi yuhu, vatyí tyicuan caa cuñí maun.

<sup>27</sup> Tyicuan ta catyí tucu ra:

—Suti nacuhva cuenda ra tandihí chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñí mai cha cohon nuu chi ra, ican ñu cuan cua cohon nuu chi ra.

<sup>28</sup> Tandihí nyoho cha chitatu ndo cha sahá tyiño ndo, ta chihin carga cha nyisó ndo, quíchi ndo nu nyaí, ta yuhu cuhve cha nyitatu ndo.

<sup>29</sup> Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu añima ndo.

<sup>30</sup> Ña yíi cha cuhva ndo chi ndo cha cunyaca ñahi. Ta carga cha chahí chi ndo, ñahma.

## 12

*Nu tohón ra cachicá noo chihin ra Jesús yoco trigu  
quiṽi nyitatú ñáyivi  
(Mr. 2.23-28; Lc. 6.1-5)*

<sup>1</sup> Noo quiṽi nyitatú ñáyivi, yaha ra Jesús mahñu nu iyó cha tachí ñu. Ta chaḷ soco chí ra cachicá noo chihin ra. Ta quichaha catohon ra yoco trigu cuan ta quichaha cachachi ra chíti yoco cuan.

<sup>2</sup> Cuhva cha cananyehe ra fariseo cha tyicuan caa, cacatyí ra chí ra Jesús:

—Nyehé, ra cachicá noo chuhun sacuví ra noo cha ña tahán chí sacuví yo quiṽi nyitatú yo —catyí ra chí ra.

<sup>3</sup> Soco maa ra Jesús catyí ra chí ra:

—¿Atu ta sacuha ca nyoho cha sacuvi ra David chihin ra tahan ra quiṽi cha chisoco ra?

<sup>4</sup> Quihví ra chichi vehe Nyoo. Ta quehen ra pan ii cha cha yaha catuvi nuu Nyoo. Ta chachí ra ta ña tahán chí cachi ra, ni maa ra ni ra ndihí chihin ra, vatyi maa ri maa tata sutu tahán chí cachi pan cuan.

<sup>5</sup> ¿O ta sacuha ca ndo nu ley cha chaha Nyoo chí ra Moisés nu catyí chí vatyi ra cacuví sutu, ña canyitatú ra quiṽi nyitatú yo, soco sahá tyiño ra chichi vehe ñuhu? Yucuan nyehé yo vatyi ñima cuatyí cuví cuan.

<sup>6</sup> Ta catyí chí ndo, vatyi ihya nyaá yuhu cha cuví noo ra cahnu ca ican saha vehe ñuhu.

<sup>7</sup> Nyoho, ta cutuñi ca iñi ndo nu catyí chí tyehe caa nu tuhun Nyoo: “Cha cuñí yuhu, cha cundahvi cuñi ndo nyehe ndo chí tahan ndo, ta ñima ca cha cahñi ndo quiṽi ta cuhva cuenda ndo

chii.” Tyehe ta cutuñí ñni ndo tuhun ihya, ma tyaa ndo cuatyí siqui ñáyivi cha ñahri sacuvi.

<sup>8</sup> Yuhu cuví Rayi cha quichi nya gloria. Ta iyó ityi chii vatyí catyí chi noo noo ndo ñáa cha sacuvi ndo quivi nyitatú yo —catyí ra Jesús.

*Nu nduvaha ra cha ityi ndaha  
(Mr. 3.1-6; Lc. 6.6-11)*

<sup>9</sup> Tyicuan ta quita ra Jesús yucuan, ta cuahan ra vehe ñuhu.

<sup>10</sup> Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candaca tuhun ra chi ra ta catyí ra:

—¿Atu cuví sanduvaha yo chi noo ñu cuhví quivi nyitatú yo? —cacatyí ra chi ra Jesús.

<sup>11</sup> Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chi ti?

<sup>12</sup> Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahan chi sacuvi yo cha vaha quivi nyitatú yo —catyí ra.

<sup>13</sup> Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanaca ra, nduvaha ri ndaha ra tari inga chiyo cuan.

<sup>14</sup> Tyicuan ta caquita coyo ra fariseo cuandatumun tahan ra yoso caa cacahñi ra chi ra Jesús.

*Noo profeta, ra chahá cuenda tuhun cahán Nyoo,  
cahan ra tuhun ra Jesús cha ni cumañi ca cacu ra*

15 Cha chito ra Jesús tuhun tyi canducú ra chi ra, quitā ra yucuan ta cuaha ñáyiví chinyicon chi ra. Ta maa ra sanduvahā ra chi tandihí ñu cuhví.

16 Ta catyí ra chi ñu tyi ma cahan ñu tuhun vatyi ican ra sanduvahā chi ñu.

17 Tyicuan caa cuvī tacuhva nachino cava tuhun cha tyaa ra Isaías ra cuvī profeta Nyoo ta cha naha. Tyehe caa tyaa ra:

18 Ican ra ihya cuvī ra sacuvi tyiño nui, ra cha nacachi vahi.

Cuñí xain chi ra, ta sñi cuñí chihin ra.

Cusacuti chi ra chihin Tatyí Ii cha iyó chii.

Ta cusacoto ra chi ñáyiví cha ñima ñu Israel cuvī yoso caa sacuvahi chi ñu nui.

19 Ta ma xaan cahan ra ta ni ma cana chaa ra, ta ni yori cuiñí ndusu ra ityi cahnu.

20 Ta ni noo ndoo yacua, ta ma cahnu ndihí ra.

Ta ni ma ndahva ndihí ra mecha cha caña ñuhma. Nyacua nya cha sanicoo vaha ra chi ñáyiví chihin ra ta cunyaca ñaha vaha ra añima ñu.

21 Ta tandihí ñáyiví, ta chi ra cuquihí iñi ñu.

*Nu catyí ñáyiví vatyi ra Jesús, tunyee iñi ra ña vaha iyó chí ra*

*(Mr. 3.20-30; Lc. 11.14-23; 12.10)*

22 Tyicuan ta nu nyaá ra Jesús chinyacā ñu chi noo ra yihí tatyí ña vaha chi, cuaa ra ta ñihí ra. Ta ra Jesús sanduvahā ra chi ra. Ta cuvī nacahan ra, ta cuvī nanyehe ra.

23 Iyo xaan cuñí tandihí ñáyiví, ta catyí ñu:

—¿Vasi ra vachi tata rey David cuvī chi ra ihya?  
—catyí ñu.

24 Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

25 Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusiin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha canyacá ñaha ra. O tatu noo ñuu o tandihi ñáyivi noo vehe cacusiin ñu chihin tahan ñu, cutivi nu nyicú ñu.

26 Ta tyicuan caa tucu, tatu cuihna ta tava ra suri ra tahan maa ra, cuñi chi catyi vatyí ña in ri cacuví ra, ta cundihi fuerza cha iyó chi ra.

27 Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóo cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo.

28 Yucuan chaha catyí chi ndo, vatyí yuhu tave tatyí ña vaha chihin fuerza Tatyí Ii Nyoo. Ta cuñi chi catyi vatyí ndicha cuii Nyoo ra nyacá ñaha aña ñáyivi cha chaq ra nu canyicú ndo.

29 'Chichi vehe noo ra ñihi xaan, tari cuihna, ma cuví quihvi noo ra ta quehen ra tandihi cha chii ra, soco tatu cuhñi xihna ra chi ra tyicuan caa ta cuví tinyaa ra tandihi cha chii ra.

30 'Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyeé ndo chii cha cahán ndo tuhun nuu ñáyivi, cuñi chi catyí vatyí ña chahá ndo cha coto ñáyivi tuhun cahín.

<sup>31</sup> Yucuan chaha catyí chi ndo vatyi Nyoo sahá ra ticahnu iñi cuatyí ñáyivi, ta ñáá cha ña vaha cahán ñu ñandihí, soco cha cahan ña vaha ñu siqui Tatyí Ii Nyoo, yucuan ndicha, ma coo ticahnu iñi cha cuenda ñu.

<sup>32</sup> Ta yóo ri ñu cha cahán ña vaha siqui yuhu Rayí cha quichí nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí Ii Nyoo, ma coo maa ticahnu iñi chi ñu cha cuenda cuatyí cuan, niri ihya ñayivi, ta niri inga ñayivi ñandihí.

*Chihin cha sacuvi ri ñáyivi ta nicohon nuu ri yo chi ñu tatu ñu vaha o ñu ña vaha cuví ñu (Lc. 6.43-45)*

<sup>33</sup> Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuví tun chihin chiti cha chahá tun.

<sup>34</sup> ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyí cha quitá chichi añima yo ican cuan cahán yo.

<sup>35</sup> Noo ra vaha cahán ra tuhun vaha vatyi ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyi cha quiñi caa ñohó añima ra.

<sup>36</sup> Ta yuhu catyí chi ndo vatyi quivi cutuñi chi tandihí ñáyivi, cucuhva ñu cuenda tandihí tuhun cha ña saha ñu cuenda ta cahan ñu.

<sup>37</sup> Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

*Ñu quiñi iyó cuñi ñu nyehe ñu seña milagru  
(Mr. 8.12; Lc. 11.29-32)*

<sup>38</sup> Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñí ndi vatyí sacuvun noo seña milagru vatyí nyehe ndi.

<sup>39</sup> Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu.

<sup>40</sup> Vatyí tari ñohõ ra Jonás chichi tiyaca cahnu cuan uñi quiví ta uñi ñuu, tyicuan caa cucohon yuhu Rayi cha quichí nya gloria chichi ñuhú uñi quiví ta uñi ñuu.

<sup>41</sup> Ta quiví cucutuñi chi tandihí ñáyiví, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyiví cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quiví cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás.

<sup>42</sup> Vatyí tyicuan caa tucu ñaha cha cuví reina ityi Sur, cundicuita ña quiví cucutuñi chí ñáyiví ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco quichí ña, quichí tyasoho ña tuhun cha chiñi tuñi ra Salomón. Ta ihya cahnu ca cuví ra cha cahan chihin ndo vityin ta ñima ca ra Salomón.

*Yoso caa ndichi tucu tatyí ña vaha inga chaha  
añima ñáyivi tatu naa ñi ñu chi Nyoo  
(Lc. 11.24-26)*

<sup>43</sup> Tatu noo tatyí ña vaha quita chi añima noo rayii, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi:

<sup>44</sup> “Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehe chi vatyi ndii xaan, ta yori nyaá.

<sup>45</sup> Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandihi tatyí ña vaha cuan añima ra cuan. Yucuan chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

*Tari yañi ra Jesús ta tari sihi ra cuví chi ñáyivi  
sacuví cuhva catyí Nyoo  
(Mr. 3.31-35; Lc. 8.19-21)*

<sup>46</sup> Ni cahán ca ra Jesús chihin ñáyivi, ta chaq sihi ra ta yañi ra, ta ndoo ñu chata vehe, ta cuñí ñu cahan ñu chihin ra.

<sup>47</sup> Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

<sup>48</sup> Tyicuan ta nacahan ra Jesús ta catyí ra chi ñu:

—¿Yóó cha cuví sihi ta yañi? —catyí ra.

<sup>49</sup> Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

50 Vatyí tandihí ñáyiví cha sacuvi cuhva cuñí Suti ra nyaá andiví, ícan ñu cuan cuví yañi, ta cuhve, ta sihi —catyí ra Jesús.

## 13

*Tari noo ra chicá noo tachí, tyicuan caa cuví ra cahán tuhun Nyoo chihin ñáyiví (Mr. 4.1-9; Lc. 8.4-8)*

<sup>1</sup> Quiví cuan quitá ra Jesús vehe ra ta chicunyaá ra yuhu miñi.

<sup>2</sup> Ta chaha cha cuaha ñáyiví natacá nu nyaá ra, quihví ra chichi noo canoa ta chicunyaá ra. Ta tandihí ñáyiví ndoo ñu nyicú ñu nu ñiti cuan.

<sup>3</sup> Tyicuan ta cuaha ri cha quichaha sañahá ra chí ñu chihin noo cuhva ta catyí ra:

—Noo chaha quitá noo ra, tachí ra chiti trigu.

<sup>4</sup> Ta nu cuahan ra quití ra chiti cuan, canacoyo suhva chiti cuan yuhu ityi. Ta quichí coyo saa ta cachachí ti.

<sup>5</sup> Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyí ña cuaha ñuhú yihí chaha.

<sup>6</sup> Soco cuhva cha caña ñanyii ñn na ityi ri tun, vatyí ña cono yihí yoho tun.

<sup>7</sup> Suhva ca chiti canacoyo ticu iñu. Ta chahnu iñu cuan. Ta chasí chi nuu tun. Yucuan chaha ña chiyo chiti tun.

<sup>8</sup> Soco suhva ca canacoyo nu ñuhú vaha. Ta quiví cachahnu tun, vaha xaan cachahá tun chiti, vatyí yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chahá tun.

<sup>9</sup> ¡Tatu cutuñi iñi ndo, tyasoho ndo!

*Nu sacoto ra Jesús ñáá tuhun cha chihin cuhva ri cahan ra ta ña cahán cachi ra (Mr. 4.10-12; Lc. 8.9-10)*

<sup>10</sup> Tyicuan ta tuhva ra cachicá noo chihin ra Jesús, ta candacā tuhun ra chi ra, ta catyí ra:

—¿Ñáá tuhun cha chihin cuhva ri cahún chihin ñáyivi, ta ña cahán cachun chihin ñu? —cacatyí ra.

<sup>11</sup> Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu.

<sup>12</sup> Vatyí ñáyivi cutuñí iñi tuhun cahín ta sacuví ñu, cuaha ca cucutuñi iñi ñu. Ta ñáyivi cha chiin ri cutuñí iñi, ta ña cuñí ñu sacuvi ñu, cutinyaa ndihi cha cutuñí iñi ñu.

<sup>13</sup> Yucuan chaha vatyí chihin cuhva ri cahín chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan.

<sup>14</sup> Ta tyicuan caa ta chinó cava tuhun cha cahan ra Isaías ra profeta Nyoo ta cha naha, ta catyí ra: Cha ndicha vatyí nyoho cuiñi ndo tuhun, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

<sup>15</sup> Vatyí cha ndundavā añima ñáyivi ihya, ta ña cachi vaha chiñí ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin añima ñu.

Ta ni ma nanducu ñu chii, tacuhva sanduvahi chi ñu.

<sup>16</sup> Soco sii xaan cuví chi nyoho, vatyi nyehé ndo chihin chíti nuu ndo, ta chiñí ndo chihin soho ndo.

<sup>17</sup> Cha ndicha catyí chi ndo, vatyi cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

*Nu catyí ra Jesús ñáá cha cuñi chi catyi cuhva cha cahán ra*  
(Mr. 4.13-20; Lc. 8.11-15)

<sup>18</sup> Tyasoho ndo ñáá cha cuñi chi catyi noo cuhva cha catyi chí ndo tuhun ra cha tachí chíti trigu cuan:

<sup>19</sup> Ñáyivi cha chiñi tuhun yoso caa cuñi Nyoo cunyaca ñaha ra añima ñu, ta ña cutuñi iñi ñu, tari nu canacoyo chíti yuhu ityi, tyicuan caa cuví ñu. Vatyi quichi cuihna ta tava ra tuhun Nyoo cha caa añima ñu.

<sup>20</sup> Ta tari nu canacoyo chíti ticu yuu cuan, tyicuan caa cuví tucu ñáyivi cha chiñi tuhun Nyoo, ta sii xaan cuví chí ñu naquehen cuenda ñu noo ri cuhva.

<sup>21</sup> Vatyi nu caña chíti ticu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chí. Ta tyicuan caa ñu cuan. Suhva ri quivi chinó iñi ñu. Soco quivi cha quichaha nyehe ñu tindoho, ta satasi iñi ñáyivi chí ñu cha cuenda tuhun Nyoo ta sandihi ri ñu tuhun cha chinó iñi ñu.

<sup>22</sup> Ta tari nu canacoyo chíti chichi iñu cuan, tyicuan caa cuví tucu inga ñu cha chiñi tuhun Nyoo. Chiñi ñu, soco ña cuñi ñu sacuvi ñu tari

cuhva chiñí ñu. Vatyí nyaá xaan ca xiñí ñu tuhun t̄indoho ñayiv̄i ican saha tuhun Nyoo. Ta nyiyo ca iñi ñu cha tyaȳi. Ta tandih̄i tuhun cuan sayanga chi chi ñu, ta ña chahá nanducu vaha ñu chi Nyoo.

<sup>23</sup> Soco tari nu canacavā ch̄iti nu ñuhu vaha, tyicuan caa cuví ñu chiñí tuhun Nyoo, ta cutuñí iñi ñu, ta sacuví ñu tandih̄i tuhun cahán ra. Yihí ñu cuví ñu tari yutun cha chaha noo cientu ch̄iti, ta inga ñu tari yutun cha chaha uñi xico, o tari yutun cha chahá oco uchi ch̄iti noo noo tun.

*Nu catyí ra Jesús yoso caa cuahan tuhun trigu ta cuhu ña vaha*

<sup>24</sup> Ta chahá tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo añima ñáyiv̄i cuví chi tari noo ra cha tach̄i ch̄iti trigu nu noo ñuhú.

<sup>25</sup> Soco cuhva cha caquixí tandih̄i ra casahá tyiño cuan, quihv̄i noo ra xaan iñi chi ra, ta tach̄i ra ch̄iti cuhu ña vaha, ta cuahan ra.

<sup>26</sup> Ta quiv̄i cañā ch̄iti trigu cuan, ta cañā yoco chi, ta yucuan na tuvi tucu cuhu ña vaha cuan.

<sup>27</sup> Tyicuan ta ra cacuví musu, cachahan ra ch̄icatyí ra chi chitoho ra: “Tata, tatu maa maa ri maa ch̄iti trigu tach̄un, ¿nya quit̄a cuhu ña vaha cuan?” cacatyí ra.

<sup>28</sup> Ta nacahan ra cuan ta catyí ra: “Iyó noo ra xaan iñi chi yo tach̄i.” Tyicuan ta musu cuan, catyí ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?”

<sup>29</sup> Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndih̄i trigu cuan.

<sup>30</sup> Saña ndo, na cuahnu maa chi ñn ri chihin trigo cuan, tyicuan ta quiví cunicoñehi tyiño sahi, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

*Nu catyí ra Jesús vatyí tari chiti mostaza cuví cha nyacá ñaha Nyoo aña yoy*  
(Mr. 4.30-32; Lc. 13.18-19)

<sup>31</sup> Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo aña ñáyivi cuví chi tari noo chiti yutun cha nañi mostaza cha tachí noo ra nu ñuhú ra.

<sup>32</sup> Vatyí ican chiti cuan cuví cha luhlu ca ican saha tandihí ca chiti. Soco quiví chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

*Nu catyí ra Jesús vatyí tari yuchan iya cuví cha nyacá ñaha Nyoo aña ñáyivi*  
(Lc. 13.20-21)

<sup>33</sup> Ta catyí tucu ra Jesús inga cuhva ihya:

—Cha nyacá ñaha Nyoo aña ñáyivi cuví chi tari yuchan iya cha nasaca noo ñaha chihin uñi cuhva yutyí pan. Vatyí tari ndaa tandihí pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo aña —catyí ra.

*Yoso caa chotyíño ra Jesús noo cuhva cha cahán ra*  
(Mr. 4.33-34)

<sup>34</sup> Tandihí tuhun ihya cahan ra Jesús chihin ñáyivi chihin cuhva ri. Ta tandihí tuhun cha catyí ra chi ñu soco maa maa ri chihin noo cuhva ri.

<sup>35</sup> Tyehe caa sacuv̄i ra tacuhva chino cava tuhun cha cahán ra profeta ta cha naha ta tyaḷ ra tyehe caa:

Chihin cuhva ri cucahin chihin ñáyiv̄i.

Cucatyí chi ñu tuhun cha ñohó xehe nyata savaha Nyoo ñuhu ñáyiv̄i.

*Nu catyí ra Jesús ñáá cha cuñí chi catyí tuhun cuhu ña vaha cha cañá mahñu chiti trigu cuan*

<sup>36</sup> Tyicuan ta sacunuh̄u ra Jesús chi ñáyiv̄i, ta ndihv̄i ra chichi vehe. Ta catuhv̄a ra cachicá noo chihin ra chi ra, ta catyí ra chi ra:

—Nacatyí chi ndi ñáá cha cuñí chi catyí tuhun cha cañá cuhu ña vaha cuan nu ñuhu cuan.

<sup>37</sup> Tyicuan ta quichaha catyí ra Jesús chi ra:

—Ra cha tach̄i chiti trigu cuan ican cuví yuhu Raȳi cha quich̄i nya gloria.

<sup>38</sup> Ta ñuhú cuan, ican cuví aña ñáyiv̄i iyó siqui ñuhu ñáyiv̄i. Ta chiti trigu cuan ican cuñí chi catyí ñáyiv̄i cha nyicón chi Nyoo, ta chiti cuhu ña vaha cuan cuñí chi catyí ñáyiv̄i cha nyacuví cuhva cuñí ra ña vaha.

<sup>39</sup> Ra cha tach̄i cuhu ña vaha cuan, ican cuví cuhna ra xaan iñi chi Nyoo. Ta quiv̄i cunacoñehe ra tyiño saha ra, ican cuví quiv̄i cucunaa ñuhu ñáyiv̄i. Ta ra cha cunacoñehe chiti cuan, ican cuví ra cacuví ángel.

<sup>40</sup> Tari nasatac̄a ra cuhu ña vaha cuan vatyi cayu chi, tyicuan caa cucuví quiv̄i naa ñáyiv̄i.

<sup>41</sup> Yuhu Raȳi cha quichi nya gloria cutachi chi ángel cunasataca ra chi ñu sacoo cuatyí inga ñu, ta ñu cha sacuví cha ña vaha.

<sup>42</sup> Ta cutyih̄i ra chi ñu chichi horno nu cayú ñuhu. Ta cucuacu ñu ta cusacahñi ñu noho ñu.

<sup>43</sup> Ta ñu cha sacuvi cuhva cuñí Nyoo cutuvi ñu nuu Nyoo Sutu yo. Ta tari cha ndichin ñanyii, tyicuan caa cucuvi ñu. Tatu cutuñí iñi ndo, tyasoho ndo tuhun cahín.

*Noo xuhun cuaan cha ñohó xehe*

<sup>44</sup> Cha nyacá ñaha Nyoo añaïma ñáyivi cuví chi tari noo xuhun cuaan ñohó xehe chichi ñuhú. Ta noo ra nañihí xuhun cuaan cuan, soco natyihí xehe tucu ra inga chaha ta sií xaan cuñí ra cuanuhu ra ta xico ra tandihí cha iyó chi ra, ta satá ra ñuhu nu ñohó xehe xuhun cuaan cuan.

*Noo cuhva cha cahan ra Jesús cuenda noo perla cha yahvi xaan nyaá*

<sup>45</sup> Ta cha nyacá ñaha Nyoo añaïma ñáyivi, cuví tucu chi tari noo ra satá ta naxicó perla finu.

<sup>46</sup> Ta cuhva cha ñihí ra noo cha yahví vavaha nyaá, ta xico ra ndii maa cha cumí ra, ta satá ra perla vaha cuan.

*Nu sañahá ra Jesús noo cuhva cuenda tarraya*

<sup>47</sup> Ta suri cuví tucu cha nyacá ñaha Nyoo añaïma ñáyivi tari tarraya cha cañí ra nu tyañuhu, ta ñihi ra ndihí nuu tiyaca chihin.

<sup>48</sup> Ta cuhva cha chitú tarraya cuan chihin tiyaca, catavá ra ityi nu ñiti, ta yucuan canacachi ra chi ti, canaquehen vaha ra chi quití vaha chichi noo tica, ta sacuitá ra chi quití ña vaha cuan.

<sup>49</sup> Ta tyicuan caa cucuvi quivi naa ñayivi, cuquichi coyo ángel, quichi tava sin ra chi ñu vaha ta ñu ña vaha.

<sup>50</sup> Ta cutyihí ra chi ñu ña vaha cuan chichi anyaya nu cayú ñuhu, nu cucuacu ñu ta cusacahñi ñu noho ñu.

*Nu sañahá chi vatyí vaha tuhun chahnu ta tuhun chaa Nyoo*

<sup>51</sup> Tyicuan ta ra Jesús ndacá tuhun ra chi ra cachicá noo chihin ra, ta catyí ra:

—¿Atu cutuñí iñi ndo tandihí tuhun ihya?

Ta nacahan ra ta cacatyí ra:

—Ay, Sutu Mañi yuhu. Cutuñí iñi ndi.

<sup>52</sup> Tyicuan ta catyí ra Jesús chi ra:

—Tatu noo ra sacuahá cuenda ley vehe ñuhu, ta cutuhva ra tuhun yoso caa nyacá naha Nyoo añañi ñáyivi, cumí ra cha vaha tuhun chahnu Nyoo, ta cumí tucu ra tuhun chaa cha sañahí. Ta cuví ra tari noo ra cuví nuu, ra chitó ta sañahá ra tuhun chahnu ta tuhun chaa cha sañahí —catyí ra Jesús.

*Nu ñohó ra Jesús Nazaret ñuu nu chahnu ra (Mr. 6.1-6; Lc. 4.16-30)*

<sup>53</sup> Ndihi cahan ra Jesús cuhva ihya ta cuahan ra.

<sup>54</sup> Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñí ñáyivi ta catyí ñu:

—¿Nya maa maa cutuhva ra ihya cha chiñi tuñi xaan ra? ¿Ta yoso caa cuví sacuvi ra milagru?

<sup>55</sup> Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas.

<sup>56</sup> Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhva ra tandihí tuhun ihya? —catyí ñu.

<sup>57</sup> Ta yucuan chaha ña cuñí ñu quichaha ñu chi ra. Soco ra Jesús catyí ra chi ñu:

—Tandihí ñáyiví tandihí ri ityi sahá ñu ñáyiví chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyí ra.

<sup>58</sup> Ta ña cuaha milagru sacuví ra yucuan cha cuenda vatyí ña chinó iñi ñu chi ra.

## 14

*Nu catyí chi yoso caa chihí ra Juan ra sacondutyá (Mr. 6.14-29; Lc. 9.7-9)*

<sup>1</sup> Quiví cuan ra Herodes, ra cuví gobiernu nīcahnu nu cuví Galilea, ñihí ra tuhun ra Jesús.

<sup>2</sup> Ta catyí ra chi ra nyicú chihin ra:

—Ican ra cuan cuví ra Juan ra sacondutyá chi ñáyiví, ra cha chihí ta vityin nandoto ra. Yucuan chaha iyó tunyee iñi chi ra cha sacuví ra milagru.

<sup>3-4</sup> Tyicuan caa catyí ra vatyí suri maa ra tyihí tyiño ta catiñ ra chi ra Juan. Ta chahñi ra chi ra chihin cadena, ta tyihi ra chi ra vehe caa. Tyicuan caa sacuví ra tyi xaan cuñí ra tyi catyí ra Juan tyi ña vaha cha nyaá ra chihin cu Herodías cha cuví ña ñasihí yañi ra ra Felipe.

<sup>5</sup> Ta yucuan chaha, ra Herodes, cuñi ra cahñi ra chi ra Juan, soco yuhví ra chi ñáyiví, vatyí tandihí ñu chinó iñi ñu tyi ra Juan cuenda Nyoo cahán ra.

<sup>6</sup> Soco noo quiví cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahān xaan iñi ra Herodes.

<sup>7</sup> Ta tyaa ra cuhva vatyí cuhva ra ñáá ri cha cacān ñaha tyivaa cuan, ta ma nacahnu ra tuhun cahan ra.

<sup>8</sup> Tyicuan ta tyiyuhú sihi ña chi ña, na catyí ña chi ra Herodes tyehē caa:

—Cuhva xiñi ra Juan ra sacondutya ñáyiví chii nu noo coho —catyi ña.

<sup>9</sup> Cha chiñi rey Herodes tuhun cahan ña, nducuihya cuñi ra. Soco cha cuenda cha tyaa ra cuhva vatyí cuhva ra ñáá ri cha cacán ña nuu ñu canyicú víco cuan ta ma cuví nacahnu ra, yucuan chaha tachí ra nacuhva ra xiñi ra Juan chi ña.

<sup>10</sup> Ta tachí ra tyiño na cutahnya sucun ra Juan nu ñohó ra vehe caa.

<sup>11</sup> Tyicuan ta caquichí nyaca ra xiñi ra, yihí noo nu coho. Ta cachaha ra chí ñaha tyivaa cuan. Ta maa ña nacuhva cuenda ña chí síhi ña.

<sup>12</sup> Tyicuan ta chaá coyo ra canyicoñ chí ra Juan ta canaquehen ra coño ñuhu ra, ta catyihí ra chichi ñuhu. Ta yaha cuan ta chahan coyo ra chisacoto ra chí ra Jesús.

*Nu chahá ra Jesús cha cachi ohon mil rayi*  
(Mr. 6.30-44; Lc. 9.10-17; Jn. 6.1-14)

<sup>13</sup> Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyiví, ta quitá coyo ñu ñuu ñu, ta cuahan coyo ñu chata ra ityi nu ñuhú.

<sup>14</sup> Cha quitá ra Jesús chichi canoa cuan, nanyehe ra cuaha xaan ñáyiví. Ta cundahví xaan cuñi ra nyehé ra chí ñu. Ta sanduvaha ra chí ñu cuhví cha chaá chihin ñu.

<sup>15</sup> Ta vatyí cha cua cuaa, ra cachicá noo chihin ra Jesús chaa coyo ra, ta catyí ra chí ra:

—Cha iñi xaan, ta yori ñáyiví iyó yatyin ri ihya. Yucuan cuenda natachi chí ñáyiví ihya na cunuhu coyo ñu nya ñuu cusata ñu cha cachi ñu —cacatyí ra chí ra Jesús.

16 Ta ra Jesús catyí ra:

—Ña tahan chi cahun ñu. Cuhva maa ndo cha cachi ñu.

17 Ta nacahan ra ta cacatyí ra:

—Noo tuhun ohon tahan siin pan ta uvi tahan siin tiyaca cumí ndi.

18 Ta catyí ra Jesús:

—Nyaca ndo chii.

19 Tyicuan ta tachí ra tyiño na cunyicu ñáyivi nu huhu cuan. Yahá cuan ta quehen ra ohon tahan pan cuan, ta ni nduvi tiyaca cuan. Ta nanyehé ndaa ra andivi, ta nacuhva ra tyahvi nyoo chí Nyoo ta tahvi ra pan cuan. Ta chaha ra chí ra cachicá noo chihin ra, na casacha ra chí ñáyivi cuan.

20 Ta tandihí ñu cachachí ñu ta ndaha iñi ñu. Yahá cuan ta canasataca ra yiquin cha ndoo. Ta quitá uchi uvi tahan tica.

21 Ta cha tandihí ñu cachachí cuan, quitá ta cha ohon mil cha maa ri maa rayi. Ta ña quihvi cuenda ñusihí ni ra cuatyaa.

*Nu chicá ra Jesús nu ndutya  
(Mr. 6.45-52; Jn. 6.16-21)*

22 Ta cha yaha tuhun cuan ta catyí ra Jesús chí ra cachicá noo chihin ra, na quihvi coyo ra chichi canoa, vatyi cayaha sava ra miñi cuan ta cahun coyo ra inga chiyo. Ta niri ca cha cuahan coyo ra cuan, ra Jesús ndoo ra natachi ra chí ñáyivi na cahun coyo ñu.

23 Cha yahá cha natachí ra chí ñu cuan, ta ndaa ra yucu cuan cua cacan tahvi noo tuhun ri maa ra chí Nyoo. Ta yucuan ñohó ra ta cuaa ndihí.

24 Ta cha ni ri ca cha chicán tahvi ra cha cuahan vavaha canoa cuan nya mahñu miñi. Ta ndutya miñi cuan cañi chi chi canoa cuan cha cuenda vatyí ñihi xaan caá tatyí nu cuahan coyo ra.

25 Ta cuhva cha ñaa ca cuan cua tuhva ra Jesús nu cuahan coyo ra chihin canoa cuan suri chicá ra nu ndutya.

26 Ta cuhva cha cananyehe ra chi ra, chicá ra nu ndutya cuan, canayuhvi xaan ra. Ta cacana chaa vavaha ra, ta catyí ra:

—¡Noo cha sayuhvi cuví!

27 Soco nacahan ra Jesús chihin ra, ta catyí ra:

—¡Sanñi ndo iñi ndo, yuhu cuví, ma yuhvi ndo!  
—catyí ra.

28 Tyicuan ta nacahan ra Pedro ta catyí ra:

—Sutu Mañi yuhu, tatu icon cuvún, catyí na quichi yuhu nu ndutya chiña nyacua nya nu vachun.

29 Ta ra Jesús catyí ra chi ra:

—Ñaha.

Tyicuan ta noo ra Pedro nu canoa cuan, ta quichaha chica ra nu ndutya vatyí cuhun ra nu vachi ra Jesús.

30 Soco cuhva cha tuví iñi ra tyi ñihi xaan fuerza tatyí cuan, nayuhvi ra ta quichaha nducu nyee ra, ta quichaha cana chaa ra ta catyí ra:

—¡Sacacu chii, Sutu Mañi yuhu!

31 Ta caa cuhva ri cuan, ta tiñ ra Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáa tuhun cha nacaca uvi iñun? —catyí ra Jesús chi ra.

32 Ta cuhva cha ndaa coyo ra nu canoa cuan, cutaxin ri tatyí cuan.

<sup>33</sup> Tyicuan ta ra cañohó chichi canoa cuan cachicuiñi chiti ra nuu ra Jesús, ta cacatyí ra chi ra:

—Ndicha ndicha cuii vatyí Sehe Nyoo cuví chuun —cacatyí ra.

*Nu sanduvahá ra Jesús chi ñu cuhví ñuu cha nyicú nicacahnu Genesaret*  
(Mr. 6.53-56)

<sup>34</sup> Cha cayahá sava ra miñi cuan, cachaa coyo ra nu cuví Genesaret.

<sup>35</sup> Ta cuhva cha canicohon nuu ñáyivi iyó yucuan chi ra Jesús, sacoto ñu chi tandihí ñáyivi ityi cuan. Ta quichi nyaca ñu tandihí ñu cuhví nu nyaá ra.

<sup>36</sup> Ta chacú ndahvi ñu nuu ra, na cuhva ra tiin ñu vasi chiin sahma ra. Ta tandihí ñu tiin sahma ra, nduvahá ñu.

## 15

*Nu sañahá chi ñáá cha sativi chi ñáyivi*  
(Mr. 7.1-23)

<sup>1</sup> Tyicuan ta suhva ra cacuví fariseo ta ra casacuaha ley vehe ñuhu quitá coyo ra Jerusalén. Ta chaá coyo ra nu nyaá ra Jesús ta candacá tuhun ra chi ra, ta catyí ra:

<sup>2</sup> —¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

<sup>3</sup> Soco ndacá tuhun ra Jesús chi ra, ta catyí ra:  
—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo?

<sup>4</sup> Vatyí Nyoo catyí ra: “Saha ndo ñáyiví chi sutu ndo ta chi síhi ndo. Ta tandíhi ñu cha cahán ña vaha chi sutu o chi síhi, na cúvi ñu”, catyí Nyoo.

<sup>5</sup> Soco nyoho catyí ndo tyi noo ñáyiví cuví catyí ñu chi sutu ñu o chi síhi ñu tyehe caa: “Ma cuví tyinyei chuun vatyí tandíhi cha iyó chíi cha yaha chaha cuende chi Nyoo.”

<sup>6</sup> Ta tatu cha catyí ndo tyicuan caa, ña cuñí ca chi cha tyinyee ca ndo chi sutu ndo o chi síhi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñí ndo sacuvi maa ndo cuhva costumbre maa ndo.

<sup>7</sup> ¡Nyoho cha sahá ndo tyi vaha ndo! Ndicha vaha tuhun cha tyaa ra Isaías, ra profeta Nyoo ta cha naha nu catyí Nyoo tuhun ndo tyehe caa:

<sup>8</sup> Ñáyiví ihya, chihin yuhu ri ñu catyí ñu tyi cuñí ñu chíi.

Soco ñima chihin tandíhi añima ñu, tyi sñn nu nyaá xiñi ñu.

<sup>9</sup> Ta ñahri maa tuhun cha sacahnú ñu chíi.

Vatyí cha sañahá ñu maa maa ri cuhva sañahá ñáyiví ri cuví,

tyehe caa tyaa ra Isaías tuhun ndo, catyí ra Jesús.

<sup>10</sup> Tyicuan ta cana ra chi ñáyiví ta catyí ra chi ñu:

—Tyasoho ndo, ta cutuñi iñi ndo tuhun cahín.

<sup>11</sup> Vatyí cha quihví yuhu ñáyiví, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

<sup>12</sup> Tyicuan ta catuhva ra cachicá noo chihin ra Jesús ta candaca tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

13 Soco maa ra Jesús nacahan ra:

—Tandihí yutun cha ña tachí Suti, ra nyaá andívi, cucoyo tun nya yoho tun.

14 Saña ndo chí ra vatyí ra cuaa cacuví ra, ta casañahá ra ityi chí inga ra cuaa. Ta tatu noo ra cuaa ta sañahá ra ityi chí inga ra cuaa, ni nduvi ra cucanacoyo ra chichi noo yavi.

15 Tyicuan ta quichaha catyí ra Pedro chí ra Jesús:

—Nacatyí chí ndi ñáá cha cuñí chí catyí cuhva cha cahun cuan.

16 Tyicuan ta ra Jesús catyí ra chí ra:

—¿Atu ni nyoho ta ña cutuñi ñni ndo?

17 ¿Atu ña cutuñi ñni ndo vatyí cha quihvi ityi yuhu yo, chichi yo cuahan? Yahá cuan ta quita tucu.

18 Soco tuhun cha quitá yuhu yo, chichi añima yo quitá, ta ican cuan cuví cha sativí chí ñáyivi nuu Nyoo.

19 Vatyí nya chichi añima ñu quitá cha quiñi caá chicá xiñi ñu. Ta cuñun, cha chahñi ñu chí ñáyivi, cha quichi cuvi ñni ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyivi. O sandaví ñaha ñu. O cahán ndasi ñu.

20 Ican cuan cuví cha sativí chí ñáyivi. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chí ñu —catyí ra Jesús.

*Nu nachino ñni noo ñaha inga ñuu chí ra Jesús  
(Mr. 7.24-30)*

<sup>21</sup> Quita ra Jesús ñuu cuan ta cuahan ra ityi ñuu Tiro ta ñuu Sidón.

<sup>22</sup> Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña vaha chi ña, ta nyehé xaan ña tindoho —catyí ña.

<sup>23</sup> Soco ra Jesús ña nacañan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

<sup>24</sup> Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

<sup>25</sup> Soco ñaha cuan tuhva ña ta chicuiñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

<sup>26</sup> Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

<sup>27</sup> Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

<sup>28</sup> Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

*Nu sanduvaha ra Jesús cuaha ñu cuhvi*

<sup>29</sup> Quita ra Jesús yucuan ta yaha ra yuhu miñi Galilea, ta ndaa ra noo yucu ta chicunya ra yucuan.

<sup>30</sup> Ta cuaha ñáyivi cha coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu chi ñu nuu ra, ta maa ra sanduvaha ra chi ñu.

<sup>31</sup> Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

*Nu chahá ra Jesús cha cachi cumi mil rayi  
(Mr. 8.1-10)*

<sup>32</sup> Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coña ñu ityi cunuhu ñu —catyí ra Jesús.

<sup>33</sup> Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

<sup>34</sup> Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

<sup>35</sup> Tyicuan ta tachí ra na cunyicu ñáyivi cuan nu ñuhú.

<sup>36</sup> Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi.

<sup>37</sup> Tandihí ñu chachi ñu, ta chitu chichi ñu. Ta yaha cuan casacutu ra ucha tica chihin yiquin cha ndoo cuan.

<sup>38</sup> Cumi mil rayi cachachi, ta ña quihvi cuenda ñusihí ni ri ra cuatya.

<sup>39</sup> Yaha cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

## 16

*Ra fariseo ta ra saduceo cachicán ra chi ra Jesús na sacuvi ra noo milagru*  
(Mr. 8.11-13; Lc. 12.54-56)

<sup>1</sup> Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

<sup>2</sup> Soco nacaahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quivi tyaan, vatyí tyaqui xaan cuaha andivi.”

<sup>3</sup> Ta cha ñaha ri catyí ndo: “Vityin ña tyaqui maa cucuvi quivi vatyí cuaha ta iñi ñaa xaan andivi”, catyí ndo. Nyoho vaha xaan chitó ndo ¿yoso caa nacotó ndo tuhun vico andivi soco ña cuví nacoto ndo yoso caa cuahan tuhun cha sañahá Nyoo chi ndo vityin?

<sup>4</sup>Ñáyiví iyó vityin, quiñi iyó ñu ta ña chinó iñi ñu chi Nyoo. Cuñí ñu nyehe ñu noo cha iyo. Soco ma cuhve nyehe ñu vatyí cha yahá sañahá Nyoo cha iyó cha sacuví ra chihin ra Jonás —catyí ra Jesús chi ra, ta sandoq ra chi ra, ta cuahan ra.

*Tuhun cahán ra fariseo cuví chi tari yuchan iya (Mr. 8.14-21)*

<sup>5</sup>Cuhva cha cayahá ra cachicá noo chihin ra Jesús inga chiyo miñi cuan, canaa iñi ra cacuiso ra pan.

<sup>6</sup>Tyicuan ta catyí ra Jesús chi ra:  
—Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

<sup>7</sup>Tyicuan ta quichahá candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

<sup>8</sup>Ta tuví iñi ra Jesús tuhun candatuhún ra, ta catyí ra chi ra:

—Nyoho, chiin xaan chinó iñi ndo chii. ¿Ñáá tuhun cha catyí ndo vatyí ñahri pan nyisó ndo?

<sup>9</sup>¿Atu ta cutuñi ca iñi ndo? ¿Atu ña nicohón iñi ndo quiví sacachi chi ndi ohon mil rayí chihin ohon tahan ri pan? Ta ¿yoso tahan tica sacutu ndo chihin yiquin cuan?

<sup>10</sup>¿Atu ña nicohón iñi ndo quiví sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan?

<sup>11</sup>¿Yoso caa cha ña tuví iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

12 Tyicuan ta cacutuñi iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

*Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo*  
(Mr. 8.27-30; Lc. 9.18-21)

13 Cuhva cha chaá ra Jesús ityi ñuu Cesarea Filipino, ndaca tuhun ra chi ra cachicá noo chihin ra ta catyí ra:

—¿Ñáá catyí ñáyivi? ¿Yóó ra cuvi Rayi cha quichi nya gloria? —catyí ra.

14 Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyivi cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

15 Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

16 Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

17 Ta nacahan ra Jesús ta catyí ra:

—Si xaan cuví chi yoho, Simón sehe ra Jonás, vatyí ni noo rayi ña sañahá ra chuun tuhun ihya, soco maa Suti ra nyaá andivi sañahá chuun.

18 Ta yuhu catyí chuun tyi yoho cuvún ra Pedro. Ta siqui cava ihya, savahí vehe ñuhi. Ta ma cuvi chasaha tuhun chihi chi chi.

19 Yuhu cuhve ndaha ticu andivi nu nyacá ñaha Nyoo chuun. Ta cha cuhñun ihya siqui ñuhu ñayivi, cha nuhñi saha maa Nyoo nya andivi. Ta

tandihí cha ndachun ihya síqui ñuhu ñayivi, cha ndachi maa Nyoo nya andivi.

<sup>20</sup> Tyicuan ta catyi ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quita nu nyaá Nyoo.

*Nu sacotó ra Jesús tyi cucúvi ra  
(Mr. 8.31—9.1; Lc. 9.22-27)*

<sup>21</sup> Nya ndaha quivi cuan quichaha catyi ra Jesús chi ra cachicá noo chihin ra, vatyí cuñi chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuaha ley vehe ñuhu, cucasanyehe xaan ra tindocho chi ra. Ta catyi tucu ra vatyí cucahñi ra chi ra soco nu cu uñi quivi ta cunandoto ra.

<sup>22</sup> Tyicuan ta quehen ra Pedro chi ra ta quita sin ra chihin ra ta quichaha catyi ra chi ra Jesús vatyí ña vaha cha cahán ra ta catyi ra:

—Ña cuñi Nyoo ta cuvi chuun tyehe caa, Sutú Mañi yuhu.

<sup>23</sup> Soco nanyocava ra Jesús, ta quichaha catyi ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñayivi chicá xiñun —catyi ra.

<sup>24</sup> Tyicuan ta ra Jesús catyi ra chi ra cachicá noo chihin ra:

—Tatu nya nyoho cuñi ndo cunyicon ndo chii, cuñi chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindocho cha cuende vatyí yucuan cuví cruzi cha tahán chi cuiso ndo.

<sup>25</sup> Vatyí nya nyoho ña cuñí ndo nyehe ndo tindocho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayiví ndo cha cuende, cucacu añima ndo.

<sup>26</sup> Vatyí ñáá ri tuhun cha saha ganaa ndo tandihí cha tyayíi cha iyó siqui ñuhu ñayiví tatu cunaa añima ndo. Vatyí ñahri chihin cutiyahvi ndo ta cacu añima ndo.

<sup>27</sup> Vatyí yuhu Rayíi cha quichí nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutiyahvi chí noo noo ndo yoso cuhva sacuví ndo.

<sup>28</sup> Cha ndicha catyí chi ndo, vatyí yihí nyoho cha nyicú ndo ihya cha ma cúvi ñaha ndo nyacua nya nyehe ndo chi yuhu Rayíi cha quichí nya gloria, cunyehe ndo yoso caa vachí cunyaca ñahi chi ndo —catyí ra Jesús.

## 17

*Nu sañahá Nyoo yoso caa ra Jesús noo cha ndicha nu nyacá ñaha ra*

*(Mr. 9.2-13; Lc. 9.28-36)*

<sup>1</sup> Iñu quiví cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra.

<sup>2</sup> Ta yucuan nasamā cuhva caa ra Jesús nuu ra ndihí chihin ra. Ta xiño vavaha nanduví nuu ra tari ñanyii. Ta sahma ra cuichin xaan nanduví tari maa ñuhú cuichin.

<sup>3</sup> Tyicuan ta cananyehe ra chi ra Moisés ta ra Elías, candatuhún ra chihin ra.

<sup>4</sup> Ta quichahā catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chi ra Moisés, ta nonga chi ra Elías —catyí ra Pedro chi ra Jesús.

<sup>5</sup> Cha ni ri ca cha cahán ra Pedro, quichi ri noo vico cha xiño vavaha siqui ra. Ta sahvi cuan chi ra. Ta chichi vico cuan quita noo ndusu cha catyí chi tyehe caa:

—Ican ra ihya cuví Sehi, ta cuñí xain chi ra. Ta sii xaan cuñí chihin ra. Tyasoho ndo tuhun cahán ra —catyí ndusu cuan.

<sup>6</sup> Cha cachiñi ra cachicá noo chihin ra Jesús tuhun cuan, cachicava ra nya ñuhu, ta cayuhvi xaan ra.

<sup>7</sup> Tyicuan ta tuhva ra Jesús nu cayucú ra, ta tiin ra chi ra, ta catyí ra:

—Ndicuita ndo. Ma yuhvi ndo.

<sup>8</sup> Ta cuhva cha cananyehē ra, noo tuhun ri ca ra Jesús nanyaá, ta uvi ca ra cuan, yori ca ra.

<sup>9</sup> Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehē ndo ihya. Cahán ndo tuhun soco nya yaha cúvi ta nandoto yuhu Rayi cha quichi nya gloria —catyí ra.

<sup>10</sup> Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahan chi quichi?

<sup>11</sup> Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandi.

12 Soco yuhu catyí chi ndo vatyi cha yaha quichí ra Elías, soco ña nicohon nuu ñáyiví chi ra, ta casacuví ñu chihin ra tandihí cuhva cuñi maa ñu. Ta tyicuan caa tucu yuhu Rayii cha quichí nya gloria, cusanyehe ñu tindoho chii —catyí ra.

13 Tyicuan ta cacutuñi iñi ra vatyi tuhun ra Juan ra sacondutya cahán ra Jesús.

*Nu sanduvahá ra Jesús chi noo ra tyivaa cha yihí noo tatyí ña vaha chi (Mr. 9.14-29; Lc. 9.37-43)*

14 Cuhva cha cachaá coyo ra nu nyicú ñáyiví, tuhva noo ra ta chicuiñi chiti ra nuu ra Jesús, ta catyí ra chi ra:

15 —Tata, cundahvi cuñi nyehun chi sehi, vatyi yihí noo cuehe chihi tañi chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduvá ra nu ñuhú ta cayú ra, ta nduvá ra nu ndutya ñandihí.

16 Ta quichí nyaque chi ra chi ra cachicá noo chuhun, soco ña cuví sanduvahá ra chi ra —catyí ra.

17 Ta nacahan ra Jesús ta catyí ra:

—¡Nyoho, ñu ña chinó iñi cuví ndo! ¡Ta nicaa ni quiñi iyó ndo! ¿Yoso tahan ca quiví cunyai chihin ndo ta cunyei tisihi ndo nyacua nya cutuhva ndo ta chino iñi ndo chii? Nyaca ndo chi ra tyivaa chiña tyehe —catyí ra.

18 Tyicuan ta tava ñehe ra Jesús chi tatyí ña vaha cuan, ta quitá cuan chi ra tyivaa cuan. Ta caa cuhva ri cuan ta nduvahá ra.

19 Cha yahá cuan ta ndaca tuhun siñ ra chicá noo chihin ra Jesús chi ra ta catyí ra:

—¿Ñáá tuhun cha ña cuv̄i tava nyuhu chi tatyí ña vaha cuan?

<sup>20</sup> Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo ch̄iti mostaza, cuv̄i catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó ñi ndo chii.

<sup>21</sup> Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

*Inga tucu chaha cahán ra Jesús tuhun yoso caa cucahñi ñáyivi chi ra*  
(Mr. 9.30-32; Lc. 9.43-45)

<sup>22</sup> Cha ni ri ca cha ñin ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayñi cha quich̄i nya gloria, cucuhva cuenda ñu chii chichi ndaha ra xaan ñi chii. Ta cucahñi ra chii.

<sup>23</sup> Soco nu cu uñi quivi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

*Nu catyiyahví ra cuenda vehe ñuhu cahnu*

<sup>24</sup> Cuhva cha chaá ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candacá tuhun ra chi ra:

—¿Atu ña tyiyahví ra sacuahá chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

<sup>25</sup> Ta nacahan ra Pedro ta catyí ra:

—Tiyahví ra.

Cuhva cha quihví ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyi tucu yoho vityin Simón? Ra cuví tyiño siqui ñuhu ñayiví ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

<sup>26</sup> Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahan chi tyiyahvi ñu.

<sup>27</sup> Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutiyahvun —catyí ra Jesús chi ra Pedro.

## 18

*Nu sañahá ra Jesús yóó ra cha cahnu ca cucuvi nu nyacá ñaha Nyoo*

*(Mr. 9.33-37; Lc. 9.46-48)*

<sup>1</sup> Quiví cuan catuhvá ra cachicá noo chihin ra Jesús chi ra, ta candacá tuhun ra chi ra:

—¿Nya ndi cahnu ca cuví nu nyacá ñaha Nyoo?

<sup>2</sup> Tyicuan ta ra Jesús caná ra chi noo ra cuehe luhlu, ta chinanyaá ra chi cue mahña ra.

<sup>3</sup> Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví

ndo tari ra cuatyaa, ma cuvi quihvi ndo nu nyacá ñaha Nyoo. Vatyí ra cuatyaa chahá ndotyín cunyaca ñaha sutu ndotyín chi ndotyín, ta tyícuan caa cūhva ndo chi ndo cunyaca ñaha Nyoo chi ndo.

<sup>4</sup> Ta tyícuan caa ra cahnu ca cuví nuu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya.

<sup>5</sup> Ta ñáyivi cha natíin cuenda chihin sívi chi noo ra ña cahnu sahá chi, tari ra cuehe luhlu ihya, chi yuhu natíin cuenda ñu.

*Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha (Mt. 5.29-30; Mr. 9.42-48; Lc. 17.1-2)*

<sup>6</sup> Tatu yóó ñu sanacavá nu cuatyí chi noo ra nachinó iñi chíi ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

<sup>7</sup> ¡Ñana cha ña vaha cha cuenda ñáyivi iyó síqui ñuhu ñayivi, vatyí iyó tuhun cha sacoo ñu cuatyí tahan ñu! Ta tyícuan ri coo tuhun cuan, soco jndahvi ñu ndahvi cha sanacava nu cuatyí chi inga ñu!

<sup>8</sup> Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyí vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhū cha ma ndahva ca maa.

<sup>9</sup> Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti

nuun ta tuchi Nyoo chuun nu cayú ñuhḡ chichi anyaya.

*Nu sañahá ra Jesús tyi tari noo mbee cha cuanaa, tyicuan caa cuvíyo (Lc. 15.3-7)*

<sup>10</sup> Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andiví.

<sup>11</sup> Vatyí yuhu Rayi cha quichí nya gloria, vachi sacaqui chi ñáyiví cha cuanaa chihin cuatyí ñu.

<sup>12</sup> ¿Yoso caa catyí nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra.

<sup>13</sup> Ta tatu nañihi ra chi ti, cha ndicha vatyí cusí ca cuñí ra chihin quití cuan, ta ñima ca chihin cumi xico chahun cumi ca quití cha ña chinaa cuan.

<sup>14</sup> Ta tyicuan caa tucu, Sutu ndo ra nyaá andiví ña cuñí ra cha cunaa ni noo ñu cuví tari noo ra luhlu.

*Yoso caa tahán chi saha yo ticahnu iñi chi tahan yo (Lc. 17.3)*

<sup>15</sup> Tatu ra yañun ta sacuví ra cha ña vaha chuhun, cahan chihin noo tuhun ri maa ra ta catyun chi ra tyi ña vaha cuhva sacuví ra. Ta tatu quichaha ra tuhun cahún, cha sahá ganaun chi ra cuví cuan.

<sup>16</sup> Soco tatu ña quichahá ra chuun, tyicuan ta cañon chi uvi o uñi ra, tacuhva tandihí cha cahun cúcuví ra testigu.

17 Tatu ña quichaha ra ni chi ra cha chahan coyo chuhun cuan, tyicuan ta çahan chihin ra chihin nuu ñáyivi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuví saha ndo tuhun tyi tari noo ra ña chinó iñi chi Nyoo cuví ra, o tari ra catavá xuhun cuenda gobiernu ñuu Roma.

18 Cha ndicha catyí chi ndo, vatyí tandihí cha cuhñi ndo ihya siqui ñuhu ñayivi, ta cha nuhñi saha maa Nyoo nya andivi. Ta tandihí cha ndachi ndo ihya siqui ñuhu ñayivi, cha ndachi maa Nyoo nya andivi.

19 Ta suri catyí tiqui chi ndo, vatyí tatu uvi nyoho ihya siqui ñuhu ñayivi, ndu ñin ri ndo ta cacán tahvi ndo cuenda ñáá noo cha cuñi ndo cacán ndo, Suti, ra nyaá andivi cuhva ra chi ndo.

20 Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

21 Tyicuan ta chahan ra Pedro chindaca tuhun ra chi ra Jesús ta catyí ra:

—Sutu Mañi yuhu, tatu ra tahin ta sacuvi ra ñáá noo cha ña vaha chihin, ¿yoso tahan chaha tahán chi sahi ticahnu iñi chi ra? ¿Atu ucha tahan chaha?

22 Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandihí ri chaha.

*Nu cahan ra Jesús noo cuhva cuenda noo ra cha ña cuñi saha ticahnu iñi*

23 Yucuan chaha cha nyacá ñaha Nyoo aña ñáyivi cuví chi tari noo rey cha nacana chi tandihí musu vatyí cuanyehe ra yoso yosó yica ñu chi ra.

24 Ta cuhva cha quichahā natava ra cuenda, ta quichī nyaca ñu chī noo musu cha cuaha millón pesu yosó yīca chi ra.

25 Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñn cuenda ri chihin ñasihī ra, ta chihin sehe ra ta tandihī cha iyó chi ra tacuhva vatyī chihin xuhun cuan cunatyiyahvi ra cha yosó yīca ra chii.”

26 Tyicuan ta musu cuan chicuiñī chīti ra nuu chitoho ra, ta chacu ndahvi ra nuu ra, ta catyí ra: “Tata, cuātu noo chiin chii, ta tyiyahvi mai tandihī chuun”, catyí ra.

27 Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandihī cha yoso yīca ra, ta saña ra chi ra.

28 Soco cuhva cha quitā musu cuan, nañihī ra chi noo ra tahan ra cha cuví musu tari maa ra. Ta ra cuan yosó yīca ra chiin ri chī ra. Ta tiñ ra chi ra cuan, ta quichahā quitu ra sucun ra, ta catyí ra chi ra: “Tyiyahvi cha yosó yicon chii.”

29 Tyicuan ta chicuiñī chīti ra cuan nuu ra, ta chacu ndahvi ra nuu ra ta catyí ra: “Cuātu noo chiin chii, ta tyiyahvi mai tandihī chuun”, catyí ra.

30 Soco maa ra ña cuñi ra, ta chahan ra ta tyihī ra chi ra vehe caa nyacua nya cha tyiyahvi ra cha yoso yīca ra chi ra.

31 Cha canyehē inga ca musu cha sacuvi ra, uhvi xaan cacuví chi ra, ta chahan coyo ra chinacatyī ra chi chitoho ra cha sacuvi ra cuan.

32 Tyicuan ta chitoho ra cuan tachī ra tyiño na quichi ra ta catyí ra chi ra: “Musu ña vaha cuvún.

Yuhu sahi tıcahnu iñi tandıhi cha yosó yıcon chii, vatyi chacu ndahvun nui.

<sup>33</sup> Tyicuan caa tucu cuñı chi cundahvi cuñun chi ra tahun cuan tari cundahvi cuñı nyehi chuun”, catyı ra chi ra.

<sup>34</sup> Ta cuxaan xaan chitoho ra, ta tachi ra tyiño na tachi tuñi ñu chi ra, nyacua nya cha tyiyahvi ra tandıhi cha yosó yıca ra.

<sup>35</sup> Ta nu ndıhi cahan ra Jesús, ta catyı ra tyehe caa:

—Tyicuan caa tucu cusacuvi Suti, ra nyaá andıvi, chihin ndo tatu ma saha ndo tıcahnu iñi chihin cha tandıhi añima ndo chi tahan ndo.

## 19

*Nu sañahá ra Jesús tyi ña vaha sandoo ñáyıvi chi ñasihi ñu o y# ñu  
(Mr. 10.1-12; Lc. 16.18)*

<sup>1</sup> Cha yaha cha catyı ra Jesús tuhun ihya, ta quitı ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

<sup>2</sup> Cuaha ñáyıvi chinyıcon chi ra, ta yucuan sanduvaha ra chi ñu cuhvi.

<sup>3</sup> Tyicuan ta suhva ra fariseo catuhva ra chi ra Jesús, vatyi cacuñı ra nducu ra cuhva tyaa ra cuatyı sıqui ra. Ta candaca tuhun ra chi ra ta catyı ra:

—¿Atu vaha cha sandoo rayı chi ñasihi ra cha cuenda ñáá ri tısihi luhlu chaha ña chi ra?

<sup>4</sup> Ta nacahan ra ta catyı ra:

—¿Atu ta sacuaḥa ca nyoho nu tutu Nyoo nu catyí chi vatyí ra cha savahaḥa chi ndo nya quívi xihna ri, savahaḥa ra rayíi ta ñaha síhi?

<sup>5</sup> Ta catyí tucu chi tyehe caa: “Tahán chi sandoo rayíi chi sutu ra ta chí síhi ra, ta ndu ñn ri ra chihin ñasíhi ra. Ta chichi cha nĩnduvi ñu, cucuvi ñu tari cha noo ri ñáyívi.”

<sup>6</sup> Yucuan chaha, ñima ca uvi tahan cuví ñu, soco cha nanduví ñu noo ri ñáyívi. Yucuan chaha, cha sandu ñn ri Nyoo ña tahán chi cha sasíin ñáyívi —catyí ra.

<sup>7</sup> Tyicuan ta candacaḥa tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayíi tutu chihin ñasíhi ra ta sandoo ra chí ña?

<sup>8</sup> Ta ra Jesús catyí ra chi ra:

—Cha cuenda cha ndavá aña ndo, yucuan chaha, chahaḥa ra Moisés cha sandoo ra ñasíhi ra. Soco quívi xihna ri ñima tyicuan caa cuví.

<sup>9</sup> Yuhu catyí chi ndo tyehe caa: Ra cha sandoo ñasíhi, ta ñima cha cuenda cha natuví ña chihin inga ra, ta tandahaḥa ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha síhi cha sandoo yíi chí, suri chicoo tucu cuatyí ra cuan —catyí ra.

<sup>10</sup> Tyicuan ta ra cachicá noo chihin ra, cacatyí ra chí ra:

—Tatu tyicuan caa tahán chí coo rayíi chihin ñasíhi ra, vaha taxin ca ma tandaha yo.

<sup>11</sup> Ta ra Jesús catyí ra chí ra:

—Soco ña tandihí ñáyiví cuví cutuñi iñi ñu tuhun ihya. Soco ñu cha chahá Nyoo cha cutuñi iñi, ican ñu cua cutuñi iñi.

<sup>12</sup> Cha ña tandaha ñáyiví, cuaha ri cuenda cuví. Yihí ñu ña quichi cuví iñi ñu tandaha ñu vatyí in caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyiví ñi ñu. Ta yihí ñu ña tandaha ñu cha cuenda cha cuñi ñu sacuvi ñu tyiño nuu Nyoo, na nducuaaha añaima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

*Nu nasocó ra Jesús chi ra cuatyaa  
(Mr. 10.13-16; Lc. 18.15-17)*

<sup>13</sup> Tyicuan ta quichí nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyín, ta cacan tahvi ra chaha ndotyín. Soco ra cachicá noo chihin ra quichahá cacahan ra chi ñu quichí nyaca chi ndotyín.

<sup>14</sup> Soco ra Jesús catyí ra:

—Saña ndo chi ra cuatyaa, na quichi maa ndotyín nu nyaí. Ta ma casi ndo. Vatyí ñu nyacá ñaha Nyoo añaima, cuví ñu tari ra cuatyaa ihya —catyí ra.

<sup>15</sup> Tyicuan ta tyiso ra ndaha ra siqui ndotyín. Yahá cuan ta cuahan ra.

*Nu cahán noo ra tyivaa tyayí chihin ra Jesús  
(Mr. 10.17-31; Lc. 18.18-30)*

<sup>16</sup> Noo ra tyivaa chahan ra chindacá tuhun ra chi ra Jesús ta catyí ra:

—Maestro vaha xaun. ¿Ñáa cha vaha tahán chi sacuvi ta ñihi ñáyiví cha ma naa ca maa coi?

<sup>17</sup> Ta ra Jesús catyí ra chi ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuvi.] Soco tatu cuñún quihvun ñayiví cha ma naa ca maa, sacuvun tandihí tuhun cha tachí Nyoo tyi sacuvi yo —catyí ra chi ra.

18 Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñáyiví. Ma coo inga ñusihí chuun. Ma suhun cha chii ñáyiví. Ma cahun cuendu siqui ñu.

19 Saha ñáyiví chi sutun ta chi sihun. Ta cuñun chi ñáyiví, tari cha cuñún chi maun.

20 Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáá ca cha cumañí chii?

21 Ta ra Jesús catyí ra chi ra:

—Tatu cuñún cuvun noo ra cuiti nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyayí chuun nya gloria —catyí ra.

22 Soco cuhva cha chiñi ra tyivaa cuan cha cahan ra Jesús tyehe caa, cuihya xaan cuanuhu ra vatyí tyayí xaan ra.

23 Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí yí xaan cuhva ra tyayí cha cunyaca ñaha Nyoo añima ra.

24 Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra

tyayii ta cuhva ra chi ra cha cunyaca ñaha Nyoo  
—catyí ra Jesús.

<sup>25</sup> Cha cachiñi ra cachicá noo chihin ra tuhun  
ihya, iyo xaan cacuñi ra, ta quichaha candaca  
tuhun ra chi ra tahan ra, ta cacatyí ra:

—Tu tyicuan caa, ¿yóó cha cuví cacu vii?

<sup>26</sup> Tyicuan ta nanyehē ra Jesús nu nyicú ra ta  
catyí ra:

—Ñáyivi ma cuvi sacuvi ñu tyehe caa, soco  
Nyoo cuví sacuvi ra tandihi.

<sup>27</sup> Tyicuan ta quichaha catyí ra Pedro chi ra:

—Sutu Mañi yuhu, nyuhu tandihi maa cha iyó  
chi ndi sandoo ndi ta nyicón ndi chuun. ¿Ñáá cha  
cuñihi ndi? —catyí ra chi ra.

<sup>28</sup> Ta nacahan ra Jesús ta catyí ra:

—Cha ndicha catyí chi ndo, vatyí quivi cha  
cunduchaa tandihi, yucuan quivi yuhu Rayii cha  
quichi nya gloria cucunyai ta cunyaca ñahi, ta  
nyoho cha nyicón ndo chii, cunyaa tucu nyoho nu  
uchi uvi tahan tyayu tyaqui. Ta cunyaca ñaha ndo  
chi ndi uchi uvi tahan ityi ñáyivi Israel.

<sup>29</sup> Ta tandihi ndo cha sandoo ndo vehe ndo, o  
yañi ndo, o cuhva ndo, o sutu ndo, o sihi ndo, o  
ñasahi ndo o sehe ndo, o ñuhú ndo cha catyí yuhu,  
cunañihi ndo noo cientu ca chaha siqui cuan, ta  
cunañihi tucu ndo ñayivi cha ma naa ca maa coo  
ndo.

<sup>30</sup> Cuaha xaan ñu cuahan ityi nuu vityin, ican  
ñu cuan, cuhun nya nu ndihi. Ta cuaha xaan ñu  
cuahan nu ndihi vityin, ican ñu cuhun ñu ityi nuu.

## 20

### *Nu sañahá ra Jesús noo cuhva cuenda ra casahá tyiño*

<sup>1</sup> Cha nyacá ñaha Nyoo añañima ñáyivi, cuví chi tari noo chitoho chacu yoho tichaha ndivi. Ta chitoho chacu cuan ñaha cuiri quita ra cuanducu ra cuaha ri musu cusaha tyiño nu tyiño saha ra.

<sup>2</sup> Ta sandaḡ ra tyiño chihin musu cuan vatyí cutiyahvi ra yahvi cha tahán chi chi ra cha noo quivi, ta tachí ra chi ra cusaha tyiño ra nu iyó tyiño sahá ra.

<sup>3</sup> Yahá cuan ta quita tucu ra cuhva cha caa ñin cha ñaha ri. Ta nanyehe ra chi suhva ca ra canyicú ri maa nuyahvi cuan.

<sup>4</sup> Ta catyí ra chi ra: “Cuḡhan tucu nyoho cua saha tyiño ndo nu iyó tyiño sahá, ta tyiyahvi mai yahvi cha tahán chí chi ndo.” Tyicuan ta cuahan coyo tucu ra cuan.

<sup>5</sup> Tyicuan ta chitoho chacu cuan quita tucu ra inga chaha cuhva cha ora. Yucuan ta quita tucu ra cuhva cha caa uñi cha cha ñi.

<sup>6</sup> Ta yahá cuan ta quita tucu ra cuhva cha caa ohon cha cha ñi ta nanyehe ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?”

<sup>7</sup> Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuḡhan tucu nyoho cua saha tyiño ndo nu iyó tyiño sahá. Ta tyiyahvi mai chi ndo yoso cuhva cha tahán chí chí ndo”, catyí ra.

<sup>8</sup> Ta cuhva cha cuaa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvı̄ nu ndihi, ta nu ndihi ta tyiyahvun chi ra cha caquihvı̄ cha xihna ri”, catyí ra.

<sup>9</sup> Tyicuan ta chaꞗ coyo ra cha caquihvı̄ cuhva cha caa ohon cha cha iñi cuan. Ta tahan tahan ra quehen ra yahvi naniñi noo quı̄vi.

<sup>10</sup> Yahꞗ cuan, ta cuhva cha tahán chi chi ra cha caquihvı̄ coyo cha xihna ri cuan, cacuñí maa ra vatyi cuaha ca cutiyahvi ra chi ra. Soco suri ñin ri yahvi noo quı̄vi caquehen ra.

<sup>11</sup> Ta cuhva cha caquehen ra, quichahaꞗ cacahan ra chi chitoho tyiño cuan.

<sup>12</sup> Ta catyí ra: “Ra cha cachaaꞗ coyo nu ndihi ihya, noo tuhun hora casahaꞗ tyiño ra. Ta ñin ri cuhva tyiyahvun chi ra chihin nyuhu cha sahaꞗ tyiño ndi nu cahñi ndiyaca”, cacatyí ra.

<sup>13</sup> Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuví chuhun. ¿Atu ñima yahvi cha noo quı̄vi catyı̄ vatyi tyiyahvi chuun?

<sup>14</sup> Quehen yahvun, ta cuꞗnuhu. ¿Atu ñahri ityi iyó chii cha tyiyahvi chi ra cha quihvı̄ nu ndihi ñin ri cuhva cha tyiyahvı̄ chi yoho?

<sup>15</sup> ¿Atu ñahri ityi iyó chii cha sacuvi cha cuñí mai chihin xuhin? ¿Atu quiñi cuñún tyi vaha ñáyı̄vi cuvı̄ chihin inga ra cuan?” catyí ra.

<sup>16</sup> Ta tyicuan caa ñu quihvı̄ nu ndihi, cuhun ñu ityi nuu. Ta ñu cuahan ityi nuu, nya nu ndihi cuhun ñu. Vatyi cuaha xaan ñu nacaná Nyoo chi. Soco chiin xaan ri ñu nacachı̄ ra.

*Inga chaha sacotó ra Jesús yoso caa cucahñi ñáyivi  
chi ra*

(Mr. 10.32-34; Lc. 18.31-34)

<sup>17</sup> Cuhva cha cuñí cahun ra Jesús nya Jerusalén, cana s̄in ra chi ndi uchi uvi ra cachicá noo chihin ra ta catyí ra chi ra:

<sup>18</sup> —Ta cha nyehe maa ndo vatyí cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuvi nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi.

<sup>19</sup> Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahñi ra chii nu cruzi. Soco nu cu uñi quivi cunandote —catyí ra Jesús chi ra.

*Nu chicán sihi ra Jacobo ta ra Juan noo tumañi iñi  
chi ra Jesús*

(Mr. 10.35-45)

<sup>20</sup> Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin n̄induvi sehe ña. Ta chicuiñi chiti ña nuu ra vatyí cacan ña noo tumañi iñi chi ra.

<sup>21</sup> Ta quichaha ndaca tuhun ra Jesús chi ña:

—¿Ñáa cha cuñún?

Ta catyí ña:

—Quivi cha cunyaun nu nyacá ñahun nya andivi, c̄uhva cha cunyaa n̄induvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

<sup>22</sup> Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho t̄indoho cha cunyehe yuhu? ¿Atu

cuví cuhun ndo tuhun chihi tari cuhva cuhun yuhu? —catyí ra.

Ta canacahan ra ta catyí ra:

—Cuví chi ndi.

<sup>23</sup> Ta catyí ra Jesús chi ra:

—Cha ndicha vatyi cunyehe ndo tindocho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyin, ñima yuhu tahan chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

<sup>24</sup> Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan.

<sup>25</sup> Soco cana ra Jesús chi ra ta catyí ra chi ra:

—Cha chitó maa ndo, vatyi ra nyacá ñaha chi ñáyivi iyó siqui ñuhu ñayivi ihya, ñihi xaan nyacá ñaha ra chi ñu tari nyaca ñaha ra musu ra.

<sup>26</sup> Soco ñima tyicuan caa tahan chi sacuvi nyoho. Vatyi ra cha cuñi cucahnu ca nu Nyoo, cuñi chi cuví ra musu tandihi ca ndo.

<sup>27</sup> Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu.

<sup>28</sup> Tari yuhu Rayi cha quichi nya gloria, ña vachi vatyi sacuvi ndo tyiño nui, soco vachi sacuvi tyiño nuu ndo, ta cuhve ñayivi. Vatyi chihin cuan ta cuví sacaqui cuaha ñáyivi.

*Nu sanduvahá ra Jesús chi uvi ra cuaa  
(Mr. 10.46-52; Lc. 18.35-43)*

<sup>29</sup> Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

<sup>30</sup> Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

<sup>31</sup> Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

<sup>32</sup> Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

<sup>33</sup> Ta canacahan ra ta catyí ra:

—Sutu Mañi yuhu, cuñi ndi nyehe ndi.

<sup>34</sup> Tyicuan ta cundahvi cuñi ra Jesús nyehe ra chi ra, ta tin ra chiti nuu ra. Ta caa cuhva ri cuan cananyeha ra, ta cananyicon ra chi ra Jesús.

## 21

*Nu quihvi ra Jesús Jerusalén*  
(Mr. 11.1-11; Lc. 19.28-40; Jn. 12.12-19)

<sup>1</sup> Cuhva cha cua cha coyo ra ñuu Jerusalén, ta cacha ra ñuu Betfagé, yatyin ri nu cuví yucu yutun Olivo. Tyicuan ta tachi ra Jesús tyiño chi uvi ra chicá noo chihin ra.

<sup>2</sup> Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii.

<sup>3</sup> Ta tatu yóo cha catyí ñáa cha catyí chi ndo, catyi ndo chi ñu: “Vatyí chiñuhú ti chi maa ra

nyacá ñaha, soco numi ri quichi nanyaca ndi chi ti”, catyi ndo chi ñu —catyi ra.

<sup>4</sup> Tyehe caa cuvı tacuhva na chino cava tuhun cha catyi ra profeta nu tyaꞗ ra tyehe caa:

<sup>5</sup> Catyi ndo chi ñu ñuu Sión:

“Nyehe ndo, vachi rey maa ndo nu nyaá ndo. Ndahvi ri vachi ra yosó ra noo burru luhlu, sehe noo quitı cha tuhvá nyisó carga”, catyi ra profeta.

<sup>6</sup> Tyicuan ta cuahan coyo ra cachicá noo chihin ra, ta casacuvı ra tari cuhva catyi ra Jesús chi ra.

<sup>7</sup> Caquichı nyaca ra chi ti chihin sihi ti. Ta catyiso ra sahma ra siqui ti, ta ndaa ra Jesús chi ti.

<sup>8</sup> Ta cuaha xaan ñáyıvi candica ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

<sup>9</sup> Ta ñáyıvi cha cuahan ityi nuu ta ityi chata, quichahꞗ cana chaa ñu ta catyi ñu:

—¡Cahnu xaan cuvı ra vachi tata rey David!  
¡Cahnu xaan cuvı ra vachi cuenda Sutu yo Nyoo!  
¡Ta sacahnú xaan yo chi Nyoo nu nyaá ra ityi andıvi! —catyi ñu.

<sup>10</sup> Cuhva cha chaꞗ ra Jesús ñuu Jerusalén cuan, tandıhi maa ñáyıvi ñuu naquıquı, ta cuaha xaan ñu candacá tuhun ñu chi tahan ñu, ta catyi ñu:

—¿Yóó ra cuvı ra ihya?

<sup>11</sup> Ta ñáyıvi catyi ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuvı Galilea cuvı ra —catyi ñu.

*Nu tavá ñehe ra Jesús chi ra caxicó chichi vehe ñuhu cahnu  
(Mr. 11.15-19; Lc. 19.45-48; Jn. 2.13-22)*

<sup>12</sup> Yahā cuan ta quihv̄i ra Jesús chichi vehe ñuhu cahnu Nyoo. Ta tavā ñehe ra chi tandih̄i ra casatá ta ra caxicó yucuan. Ta sanduv̄a ra mesa ra canasamá xuhun chi ñáyiv̄i yucuan. Ta sanduv̄a ra tyayu ra caxicó paloma.

<sup>13</sup> Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahv̄i ñáyiv̄i chii cuv̄i, ta tyicuan caa cucunañi chi. Soco nyoho cha nasah̄a ndo vehe nu nyicú ra suhu” —catyí ra.

<sup>14</sup> Chichi vehe ñuhu cuan catuhv̄a suhva ra cuaa ta ra coxo chi ra Jesús. Ta maā ra sanduvahā ra chi ra.

<sup>15</sup> Soco canyeh̄e ra cacuv̄i nuu chi tata sutu ta ra casacuahá ley vehe ñuhu cuan vatyí savah̄a ra Jesús milagru, ta canachaā ra cuatyaa chichi vehe ñuhu, ta catyí ndotyin:

—¡Cahnu xaan cuv̄i ra vachi tata rey David!  
—catyí ndotyin.

Tyicuan ta cacuxāan tata sutu ta inga ra cuan cha canyeh̄e ra ta cha cachiñ̄i ra.

<sup>16</sup> Ta cacatyí ra chi ra Jesús tyehe caa:

—¿Atu chiñún cha cahán ndotyin?

Ta nacahān ra Jesús ta catyí ra:

—Chiñí. Soco ¿atu ta sacuaha ca ndo nu tutu Nyoo nu catyí chi tyehe caa?

Sutu Mañi yuhu, sacuv̄un vatyí ra cuatyaa nyihi cata ndotyin.

Ta ra cuatyaa lee cha chaxín sacahnú ndotyin chuun, catyí chi, —catyí ra Jesús.

<sup>17</sup> Tyicuan ta sandoō ra chi ra, ta quit̄a ra ñuu cuan ta cuahan ra ñuu Betania. Ta yucuan ndoō ra cha cuaa cuan.

*Nu tyanahá ra Jesús chi tu higo vatyí ñahri higo ñi nuu tun*  
(Mr. 11.12-14, 20-26)

<sup>18</sup> Tuvi inga quivi. Ta cha ñaha ri, cua ndichi ra Jesús nya Jerusalén, ta chaꝓ soco chi ra.

<sup>19</sup> Ta nanyehẽ ra noo tu higo yatyin ri yuhu ityi cuan. Ta tuhva ra nu nanyaá tun, soco ñahri maa nañihi ra nuu tun. Maa maa ri maa numa ri ñi nuu tun. Tyicuan ta catyi ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun.

<sup>20</sup> Ta cha nyehe ra cachicá noo chihin ra cha sacuvi ra, iyo cacuñi ra, ta ndaca tuhun ra chi ra ta catyi ra:

—¿Ñáá tuhun cha numi xaan na ityi tu higo cuan?

<sup>21</sup> Ta nacahan ra Jesús ta catyi ra:

—Cha ndicha catyi chi ndo, vatyí tatu chinó ñi ndo ta ma nacaca uvi ñi ndo, ñima ihya ri cha sacuvi chi tu higo ihya cuví sacuvi ndo, soco cuví catyi ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi.

<sup>22</sup> Ta tandihi cha cacan ndo nu chicán tahvi ndo, tatu chinó ñi ndo tyi cucuhva Nyoo, cuñihi ndo —catyi ra Jesús.

*Nu sañahá chi yóo ra chaha tyiño chi ra Jesús*  
(Mr. 11.27-33; Lc. 20.1-8)

<sup>23</sup> Yahá cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuvi nuu chi tata sutu chi ra, ta ra cacuvi mandoñi ñu ñuu Israel, ta candaca tuhun ra chi ra:

—¿Yóó cha tyaa tyiño vatyí sacuvun tyehe caa, ta yóó cha chaha tyiño cuan chuun?

<sup>24-25</sup> Ta nacahan ra Jesús ta catyí ra:

—Yuhu tucu cua ndaca tuhin noo tuhun chi ndo. ¿Yóó cha tachi chi ra Juan vatyí sacondutya ra chi ñáyivi? ¿Atu Nyoo tachi chi ra, o ñáyivi? Tatu catyí ndo chii, cucatyí tucu yuhu chi ndo yóó cha tyaa tyiño ihya chii —catyí ra Jesús chi ra.

Tyicuan ta quichaha cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachi chi ra, cucatyí ra chi yo: “Tu tyicuan caa, ¿ñáá tuhun ña chinó iñi ndo chi ra?”

<sup>26</sup> Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihi ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

<sup>27</sup> Tyicuan ta quichaha cacatyí ra chi ra Jesús tyehe caa:

—Ña chitó ndi.

Tyicuan ta ra Jesús catyí ra chi ra:

—Ni yuhu, ta ma catyí chi ndo yóó cha tyaa tyiño ihya chii.

*Nu cahan ra Jesús noo cuhva cuenda uvi tahan sehe noo ra*

<sup>28</sup> Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahi.”

<sup>29</sup> Ta nacahan sehe ra ta catyí ra: “¡Ma cuhin!” Soco yaha cuan ta nasama cuhva chicá xiñi ra ta chahan ra chisaha tyiño ra.

<sup>30</sup> Yahā cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra.

<sup>31</sup> Chichi cha ninduvi tahan ra, ¿nya ra sacuví ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho.

<sup>32</sup> Vatyí ra Juan ra sacondutya quichi ra, quichi sañaha ra chi ndo yoso caa tahan chi coo ndo, soco nyoho ña chinqo iñi ndo chi ra, soco ra catavá xuhun ta ñu cata iñi cachinqo iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

*Nu catyí ra Jesús vatyí ra cacahñi chi ra cuví ra tari ra sahá tyiño ña vaha*

*(Mr. 12.1-12; Lc. 20.9-19)*

<sup>33</sup> Tyasoho ndo inga cuhva ihya: Chiyo noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savahā ra noo nu cuhñi ra tichaha ndivi cuan ta tava ra ndutya chi. Ta savahā tucu ra noo vehe sucun tacuhva vatyí cuví saha ra cuenda tandihí.

Yahā cuan ta chahā noo ra ñuhú cuan chi suhva ra casahá tyiño, ta cuahan ra inga ñuu.

<sup>34</sup> Ta cha chaā quiví cha iyó tichaha ndivi cuan, tachí ra chi suhva musu, na cucacan ra chi ra

casahá tyiño cuan, na cuhva ra suhva tichaha ndivi cha tahán chi chi ra.

<sup>35</sup> Soco ra casaha tyiño cuan, catiñ ra chi musu cuan, ta cacañi ra chi noo ra. Ta chi inga ra cachahñi ra, ta catuchi ra yuu chi inga ra.

<sup>36</sup> Tyicuan ta cha inga chaha, cuaha ca musu tachi chitoho chacu cuan ta ñima ca cha xihna ri. Soco tari casacuvi ra chi ra cha xihna ri, sacuvi tucu ra chi ra ihya.

<sup>37</sup> Nu ndihi tachi ra chi maa maa sehe ra, vatyí cuñi maa ra vatyí cusaha ra ñáyivi chi sehe ra.

<sup>38</sup> Soco cuhva cha cananyehe ra casahá tyiño cuan chi sehe ra, catyí ra chi ra tahan ra tyehe caa: “Ican ra ihya cundoo chihin tandihi ihya. Na cahñi yo chi ra tacuhva ndoo maa yo chihin”, cacatyí ra.

<sup>39</sup> Tyicuan ta catiñ ra chi ra, ta catava ra chi ra ityi chata chacu, ta cachahñi ra chi ra —catyí ra Jesús.

<sup>40</sup> Tyicuan ta ndaca tuhun ra Jesús chi ñu:

—Quiivi quichi chitoho ñuhú cuan, ¿ñáá cha cusacuvi ra chihin ra casahá tyiño quiñi iyó cuan?

<sup>41</sup> Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quiivi coo tichaha ndivi, cunacuhva cuenda ra chi chitoho chacu cuan cha tahán chi chi ra.

<sup>42</sup> Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra, ican cuan cuví yuu cha ñiñi ca.

Ican ihya cuví cha sacuví Sutu yo Nyoo.  
Ta tyaquí xaan tuhun cuan cha cuenda chi yo,  
catyí chi.

<sup>43</sup> Yucuan chaha catyí chi ndo vatyí ma cuhva  
ca Nyoo cuhun ndo nu nyacá ñaha ra, ta cucuhva  
ra chi ñu cha ndicha nyacá ñaha ra añima. Vatyí  
maa ñu cunacuhva cuenda ñu cha vaha cha tahán  
chí chí ra.

<sup>44</sup> Ta cha cuenda yuu cuan, yóó ñu cha nduva  
siquí chí, yiquín maa cucuvi ñu. Ta tatu yuu cuan  
ta canacava siquí yóó ñu, cutaxin nyihi maa ñu  
—catyí ra Jesús.

<sup>45</sup> Cuhva cha catuví ñni ra cacuví nuu chí tata  
sutu cuan ta ra fariseo vatyí cuenda ra cahán ra  
Jesús cuhva ihya,

<sup>46</sup> cacuñí ra catiín ra chí ra, soco cayuhvi ra chí  
ñáyivi vatyí ñáyivi, chitó ñu vatyí ra Jesús cuenda  
Nyoo cahán ra.

## 22

*Nu chahá ra Jesús noo cuhva cuenda vico tandaha  
(Lc. 14.15-24)*

<sup>1</sup> Quichahá cahan tucu ra Jesús chihin ñu inga  
chaha chihin cuhva, ta catyí ra:

<sup>2</sup> —Cha nyacá ñaha Nyoo añima ñáyivi cuví chí  
tari noo rey cha savahá noo vico cha cuenda cha  
cua tandaha sehe ra.

<sup>3</sup> Ta tachí ra chí musu ra na cuhun ra cucana ra  
chí ñu cha nacatyí tuhun ra, soco ñu cuan, ña  
cacuñí ñu quichí coyo ñu.

<sup>4</sup> Tachí ra inga chaha chí inga musu, ta catyí ra  
chí ra tyehe caa: “Catyí ndo chí ñu cha nacatyí  
tuhin, vatyí cha yahá chahñi sindiquí sane, ta

inga quití cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra.

<sup>5</sup> Soco ñu nacatyí tuhun ra, ña caquichaha ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu.

<sup>6</sup> Ta inga ñu tiñ ñu chi musu rey cuan ta cañi vavaha ñu chi ra nyacua chahñi ñu chi ra.

<sup>7</sup> Tyicuan ta rey cuan cuxaan vavaha ra, ta tachí ra chi sindaro ra, cucahñi ra chi ra cachahñi cuan, ta cahmi ra ñuu ra.

<sup>8</sup> Tyicuan ta quichaha catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu.

<sup>9</sup> Cuahan ndo tandihí calle ta nacatyí tuhun ndo chi tandihí ri ñu cha nañihi ndo na quichi coyo ñu vico tandaha”, catyí rey cuan.

<sup>10</sup> Musu cuan cuahan coyo ra tandihí calle, ta casandu ñin ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chítu chichi vehe ra chihin ñáyivi.

<sup>11</sup> Tyicuan ta quihví rey cuan cua nyehe ra chi ñáyivi cha canacatyí tuhun musu cuan. Ta nanyehe ra chi noo ra ñohó yucuan, soco ñahri sahma vico tandaha ñihnó ra.

<sup>12</sup> Ta catyí rey chí ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na chahan maa ra.

<sup>13</sup> Tyicuan ta catyí rey cuan chí ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa ñi ityi chata vehe, ta yucuan cucuacu ra, ta cusacahñi ra noho ra”, catyí ra.

14 Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

*Nu candacá tuhun ra cuenda xuhun cha tavá gobiernu*

(Mr. 12.13-17; Lc. 20.20-26)

15 Tyicuan ta catyihí tahanan ra fariseo tuhun chihin tahanan ra vatyí cusacahan ra chí ra Jesús noo cuhva cha ña tahanan chí, vatyí tyicuan caa ta coo cuatyí catyaa ra síqui ra.

16 Ta tachí ra chí suhva ra cuenda ra, ñn ri chihin suhva ra cuenda ra Herodes. Ta cacatyí ra chí ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñn cuendon cuhva caá ri ñu.

17 Catyí chí ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chí yo, o ma tyiyahví yo?

18 Soco tuví iñi ra Jesús vatyí ña vaha cuhva cachicá xiñi ra, ta catyí ra chí ra:

—Nyoho sahá ndo tyi vaha ndo, soco ña ndicha ndo. ¿Ñáá tuhun cha nducu nyehe ndo chí?

19 Sañaha ndo xuhun cha tuhva ndo tyiyahví ndo chí gobiernu —catyí ra.

Ta caquichí nyaca ra noo xuhun cha nañí denariu chí ra.

20 Ta cuhva cha nanyehé ra Jesús, ta quichaha ndaca tuhun ra chí ra:

—¿Yóó chí nuu ta yóó chí sívi nyaá ihya?

21 Ta nacahan ra ta cacatyí ra:

—Chí ra nyacá ñaha.

Tyicuan ta catyí ra Jesús chí ra:

—Cuhva ndo chi ra nyaca ñaha cha tahán chi chi ra, ta cuhva tucu ndo chi Nyoo cha tahán chi chi Nyoo —catyí ra.

<sup>22</sup> Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

*Nu canducu tuhun ra saduceo siqui tuhun cha nandotó ndiyi*  
(Mr. 12.18-27; Lc. 20.27-40)

<sup>23</sup> Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñayivi. Yucuan chaha candaca tuhun ra chi ra Jesús, ta catyí ra:

<sup>24</sup> —Maestro, ra Moisés catyi ra vatyí tatu noo ra tandaha ta chihí ra ta ña chiyo sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

<sup>25</sup> Vaha. Vityin tyehe caa cuvi chi noo ra chiyo ucha tahan ra chihin yañi ra. Ra cha xihna ri tandaha ra. Yaha cuan ta chihí ra. Soco vatyí ña chiyo sehe ra, ndoo ñasihí ra chí yañi cu uvi ra.

<sup>26</sup> Ta suri tyicuan caa cuvi chi yañi ra ra cu uvi. Ta yaha cuan, ta ra cu uñi quehen ra chí ña, ta suri chihí tucu ra. Ta tyicuan caa cuvi chi ndi ucha ra.

<sup>27</sup> Ta cha yaha cuan nu ndihí tuhun chihí ndihí maa ña cuan.

<sup>28</sup> Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihí chí ñaha cuan? ¿Vatyí tandihí ra tandaha ra chihin ña? —cacatyí ra.

<sup>29</sup> Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyi ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

<sup>30</sup> Vatyí quiví cunandoto ndiyí, ni ma tandaha ñu, ta ni ma cuhva ñu sehe ñu tandaha, vatyi tari ángel Nyoo ra nyaá andiví cucuvi ñu.

<sup>31</sup> Soco tuhun cha nandotó ñu ndiyí, ¿atu ta sacuahá ca ndo tuhun cha catyí maa Nyoo chi ndo? Catyí ra tyehe caa:

<sup>32</sup> “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyi canyito añima ra cuan, vasi cha naha chihí ra vatyi Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra —catyí ra.

<sup>33</sup> Iyo cuñí ñáyiví cha chiñi ñu tuhun sañahá ra Jesús.

### *Ley cha niñi ca cha chahá Nyoo* (Mr. 12.28-34)

<sup>34</sup> Cha cachitó ra fariseo vatyi ra Jesús chasí ra yuhu ra saduceo, candu ñin ri ra.

<sup>35</sup> Ta noo ra cha cuví ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

<sup>36</sup> —Maestro, ¿nya mandamiento cha nyaá nu ley cuví cha niñi ca?

<sup>37</sup> Ta catyí ra Jesús chi ra:

—“Cuñun chi Sutu Mañi yo Nyoo chihin cha niñi iñun ta chihin cha tandihí añimon, ta chihin cha tandihí cha chiñi tuñi xiñun.”

<sup>38</sup> Ican ihya mandamiento cha niñi ca, ta cha xihna ri ñandihí.

<sup>39</sup> Ta cha cu uvi cha yatyin ri tyicuan caa, ta catyí chi: “Cuñun chi ñáyiví tahun tari cuñún chi maun.”

<sup>40</sup> Ican uvi tahan mandamiento ihya cuví cha nyisó chi ley cha chahā Nyoo chi ra Moisés ta tandíhi tahun cha casañahā ra profeta Nyoo ta cha naha.

*Ra Cristo quichi ra tata ra David, ta suri cuví ra Sehe Nyoo*

*(Mr. 12.35-37; Lc. 20.41-44)*

<sup>41</sup> Cha ni ri ca cha canyicú ñn ri ca ra fariseo,

<sup>42</sup> ra Jesús ndacā tahun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chi tata vachi ra cuñí maa ndo?

Ta canacahan ra ta catyí ra:

—Tata ra David cuví chi ra.

<sup>43</sup> Tyicuan ta ra Jesús catyí ra chi ra:

—¿Ta yoso caa cha vatyí ra David cuan, maa Tatyí Ii Nyoo chotyíño chi ra? ta catyí ra vatyí ra cuví Cristo, ra nyacá ñaha chi ra cuví ra, vatyí catyí ra tyehe caa:

<sup>44</sup> Cahān Suti Nyoo chihin Suti ra Cristo, ta catyí ra chi ra:

“Cunyyaa chiyo vahi nyacua nya quiví cuhve chi ra xaan iñi chuun vatyí cuaca chahun siqui ra” tyaa ra David.

<sup>45</sup> ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyí ra Cristo Sutu ra cuví chi ra? —catyí ra Jesús.

<sup>46</sup> Ta yori maa cuví nacahan ni noo tahun. Ta nya ndaha quiví cuan, yori ca maa cañā iñi candaca tahun ñáá ca cha candaca tahun chi ra.

## 23

*Nu cahán ra Jesús chi ra sacuahá ley vehe ñuhu ta ra fariseo*

*(Mr. 12.38-40; Lc. 11.37-54; 20.45-47)*

<sup>1</sup> Tyicuan ta ra Jesús catyí ra chi ñáyivi, ta chi ra cachicá noo chihin ra tyehe caa:

<sup>2</sup> —Ra sacuahá ley ta ra fariseo nyicú ra tyiño cha sañahá ra ley cha tyaá ra Moisés.

<sup>3</sup> Ta cha tyicuan caa, quichaha ndo cha cahán ra ta sacuvi ndo tandihi cha cacatyí ra chi ndo. Soco ma quehen ndo cuhva iyó ra, vatyí maa ra, siin cha sañaha ra, ta siin cha sacuví ra.

<sup>4</sup> Vatyí yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan.

<sup>5</sup> Tandihi cha casacuví ra, cha cuñi ra na nyehe ñáyivi. Vatyí tahán iñi ra catyaa ra tuhun Nyoo tyaan ra ta soco ra chihin letra nahnu. Ta tahán iñi ra cacuihno ra sahma chihin adorno nañi.

<sup>6</sup> Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu.

<sup>7</sup> Ta nu chicá noo ra cacuñi ra vatyí cuhva ñáyivi nocumi chi ra chihin cha sahá xaan ñu ñáyivi chi ra. Ta cuñi tucu ra cha catyí ñu chi ra vatyí chito xaan ra.

<sup>8</sup> Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandihi nyoho, yañi ndo cuví. Ta noo ri ra chitó iyó, ta ican ra cuví Cristo.

<sup>9</sup> Ta ma catyí ndo Sutu ndo chi ninoo ra ñuhu ñáyivi ihya, vatyí iyó noo Sutu ndo, ta nyaá ra andivi.

10 Ta ma catyi ndo vatyi ra cuví nuu cuví ndo, vatyi noo ri maa ra Cristo cuví nuu.

11 Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo.

12 Vatyi ra cahnu sahá chii, cunocuee ra. Ta ra ña cahnu sahá chii cucucahnu ra.

13 '¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuvi quihví ñáyívi. Ta ni ri maa ndo ña quihví ndo ta ni ña chahá ndo cha quihví ñáyívi, ñu cuñí quihví.

14 '¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaá ndo vehe ñu chihí yíi, tyi ña cuví tyiyahvi ñu ñáá xuhun tavá ndo síqui ñu. Ta yaha cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindocho cunyehe ndo.

15 'Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyívi chí ndo. Ta tatu cha nandihví ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chí ñu anyaya cha nuu maa ndo.

16 '¡Ndahvi nyoho ra ndahvi! Vatyi cuñí ndo saquehen ityi ndo chí ñáyívi, ¡soco cuaa ndo! Vatyi catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sívi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan

tyanaha ñu, yucuan ndicha, niñi cuñi chi cha sacuvi ñu, catyí ndo.

<sup>17</sup> ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun cuaan cuan, o vehe ñuhu cha sacu ii chi xuhun cuaan cuan?

<sup>18</sup> Ta suri catyí tucu ndo: “Tatu yihí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó siqui arta cuan, yucuan ndicha niñi cuñi chi sacuvi ñu, catyí ndo.”

<sup>19</sup> ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan?

<sup>20</sup> Vatyí ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihi cha yosó nuu ñandihí.

<sup>21</sup> Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyí iyó ra yucuan.

<sup>22</sup> Ta tyicuan caa tucu ñu tyanahá cuenda andivi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

<sup>23</sup> ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyí chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyivi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñi chi sacuvi ndo, ta ma sandihí ndo cha cuhva

ndo diesmo cuan ñandihí.

<sup>24</sup> Nyoho cuñí ndo casaquehen ityi ndo chi ñáyivi, soco cuaa ndo. Vatyí sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

<sup>25</sup> ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyí ityi chata ri vasu ta ityi chata ri coho sanduvií ndo, soco ityi chichi ña sanduvií ndo. Vatyí chichi añima ndo tyitu ñohó cha quiñi caa. Chicá xiñi ndo cha ñihi ndo nu cusuhu ndo, ta ña cuví chasaha ndo cha quiñi caa cha quichi cuvi xaan iñi ndo.

<sup>26</sup> ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

<sup>27</sup> ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa.

<sup>28</sup> Tyicuan caa cuví nyoho. Vatyí ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

<sup>29</sup> ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha.

<sup>30</sup> Ta yucuan ta catyí ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo.

<sup>31</sup> ¡Ma chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo.

<sup>32</sup> ¡Vaha vityin, chaha chi cuhva savaha ndihi ndo cha quiñi caa cha quichaha savaha sutu chahnu ndo!

<sup>33</sup> ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cuhun ndo anyaya? Ma cuvi.

<sup>34</sup> Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu.

<sup>35</sup> Yucuan chaha, siqui ndo cucunyaa cuatyí cha cuenda cha cachiñi tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin nu nyaá arta cha yosó cha chahá cuenda yo chi Nyoo.

<sup>36</sup> Cha ndicha catyí chi ndo, vatyí tandihí cuatyí ihya cucoso siqui ñáyivi cha iyó vityin —catyí ra Jesús chi ra.

*Nu nducuihya iñi ra Jesús nyehe ra chi ñuu  
Jerusalén ta chacu ra  
(Lc. 13.34-35)*

<sup>37</sup> ¡Jerusalén, Jerusalén! ¡Ndahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchi ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti

chi sehe ti, ta naquehén ndahvi ti chi ti chichi ndichin ti, soco ña cuñí ndo.

<sup>38</sup> Nyehe ndo vityin, vatyí cha sandoo ndahvi chi ndo.

<sup>39</sup> Vatyí catyí chi ndo, vatyí ma nyehe ca ndo chii nyacua nya chaa chi quiví cucatyí ndo tyehe caa: “Cahnu xaan ra cuví ra vachi chihin tunyee iñi sivi Sutú yo Nyoo”, cucatyí ndo —catyí ra Jesús.

## 24

*Nu catyí ra Jesús vatyí cutani vehe ñuhu cahnu (Mr. 13.1-2; Lc. 21.5-6)*

<sup>1</sup> Quita ra Jesús chichi vehe ñuhu cahnu cuan, ta cha cuñí cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.

<sup>2</sup> Soco nacahan ra Jesús ta catyí ra:

—¿Atu nyehé ndo tandihi ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandihi ta cutani —catyí ra.

*Nu catyí ra Jesús ñáá ndihi seña cucuvi cha ni cumañi ca naa ñayivi (Mr. 13.3-23; Lc. 21.7-24; 17.22-24)*

<sup>3</sup> Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichi coyo ra ta catyí xehe ra chi ra tyehe caa:

—Cuñí ndi cha catyun chi ndi, ama cucuvi tuhun cuan. ¿Ñáá seña cucuvi cha cuquichun inga chaha ta cha cunaa ñayivi?

<sup>4</sup> Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo.

<sup>5</sup> Vatyí cuaha xaan ra cuquichi, ta cotyiño ra sivi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandavi ñaha ra.

<sup>6</sup> Nyoho cuñihi ndo tuhun tyi iyó cuatyí ta cañí tahan ñáyiví ityi cuan ityi ihya. Soco ma nayuhvi ndo, vatyí tyicuan caa tahán maa chi cuví. Soco ta chaa ca quiví cunaa ñayiví.

<sup>7</sup> Vatyí ñáyiví noo ñuu cahnu, cucañi tahan ñu chihin ñáyiví inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.

<sup>8</sup> Tandihí ihya ta nu cua quichaha ñáyiví nyehe ñu tindocho cuví.

<sup>9</sup> Tyicuan ta cucuhva cuenda ñu chi nyoho vatyí sanyehe ra tindocho chi ndo. Ta cacahñi ra chi ndo. Ta tandihí ñu iyó siqui ñuhu ñayiví cutasi cuñi nyehe ñu chi ndo cha cuenda yuhu.

<sup>10</sup> Quiví cuan cuaha xaan ñu cusandihí ñu cha chino iñi ñu chii, ta cutasi cuñi ñu nyehe ñu chi tahan ñu. Ta cunaxico tuhun ñu chí tahan ñu.

<sup>11</sup> Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyiví cucasandavi ñaha ra.

<sup>12</sup> Ta cuaha xaan cha quiñi caa cucoo. Yucuan chaha cuaha xaan ñu cusandihí ñu cha cuñi ñu chí tahan ñu.

<sup>13</sup> Soco ñu cha ña ndu uvi iñi chino iñi chii nyacua nya nu ndihí, cucacu añima ñu.

<sup>14</sup> Ta cucutya nicahnu ñayiví tuhun vaha cha nyacá ñaha Nyoo añima ndo, tacuhva coto tandihí ñáyiví iyó siqui ñuhu ñayiví, tyicuan ta cunaa ñayiví.

15 Tandihi nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaa ra tuhun noo cha sacuquiñi caa, noo cha sativi. Ta quivi nyehe ndo vatyí chaa ihya Nu Ii,

16 tyicuan ta ñu ñohó Judea, cuñi chi cono ñu ityi yucu.

17 Ta ñu yosó xiñi vehe, noo ñu, soco ma quihvi ñu chichi vehe ñu tava ñu cha iyó chichi vehe cuan.

18 Ta ñu ñohó nu chiqui, ni ma cunuhu ca ñu cunaquehen ñu ni sahma ñu.

19 ¡Ndahvi ñusihi cha cañohó sehe quivi cuan! O tatu iyó sehe ñu cha chaxín, ¡ndahvi ñu cuan!

20 Cacan ndo chi Nyoo tacuhva cha ma tahan chi caca cono ndo quivi vichin, ni quivi nyitatú yo.

21 Vatyí cuaha xaan tindocho cucoo quivi cuan, noo tindocho cha ta coo ca maa nyata chinq ñuhu ñayivi, ta ni ma coo ca cha yaha tuhun cuan.

22 Soco tatu Nyoo, ta ma sanducuiti ra quivi cuan, yori maa cacu. Soco cusanducuiti ra cha cuenda cha cuñi ra chi ñu nacachi maa ra.

23 Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo.

24 Vatyí cuquichi coyo ra casandavi ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandavi ñaha ra. Nyacua nya ñu cha nacachi maa Nyoo ta cusandavi ñaha ra tatu cuví chi ra.

25 Saha ndo cuenda vatyí cha yahá catyí chi nyoho cha ni cumañi ca cuvi.

<sup>26</sup> Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndi cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino iñi ndo.

<sup>27</sup> Vatyí tari noo cha quihvi tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quivi quichi yuhu Rayi cha quichi nya gloria.

<sup>28</sup> Nu caá coño chihj, yucuan cuchaa coyo chii.

*Yoso caa cuquichi ra Cristo inga chaha*  
(Mr. 13.24-37; Lc. 21.25-33; 17.26-30, 34-36)

<sup>29</sup> Ta cha yahá ri cha nyehé ñu tindoho, ta cunduñaa ñanyii, ta yoo ma sacundichin ca chi. Ta tiñoo cucanacoyo ti andivi, ta nyacua nya cha iyó andivi cunacanda.

<sup>30</sup> Tyicuan ta cuquetuvi noo seña ityi andivi nu vachi yuhu Rayi cha quichi nya gloria. Cuquichi nu vico ityi andivi chihin tunyee iñi cahnu ta chihin cha cahnu cuví Nyoo. Ta tandihi ñáyivi iyó siqui ñuhu ñayivi, cucuacu chaa xaan ñu cha nanyehe ñu chii.

<sup>31</sup> Ta cutachi ángel cuende tacuhva vatyí chihin cha ñihí tivi ra cutu ra ta cusandu in ri ra chi ñu nacachi maa Nyoo chi, cuquita ñu nicacahnu nu ñuhu ñayivi, nyacua nya nu ndihi ñuhu ñayivi ta nyacua nya nu ndihi andivi.

<sup>32</sup> Cutuñi iñi ndo noo cuhva yutun cha nañí higo: Tatu cha yutya soco tun, ta caña ndaha tun, nyoho cha chitó ndo vatyí cha vachi vico savi.

<sup>33</sup> Ta suri tyicuan caa, tatu cha nyehé ndo tandihi maa cha cucuvi ihya, coto ndo vatyí cha

cuyatyin quichi. Cha nyañaí yuvehe cuví chi cuan.

<sup>34</sup> Cha ndicha catyí chi ndo vatyí tandihí tuhun ihya, cucuvi cha ní ri ca cha iyó ñáyiví.

<sup>35</sup> Andiví ta ñuhu ñayiví cundihí chi, soco tuhun cahán yuhu, ma ndihí chi. Ta cuchino cava tandihí tuhun cahin chihin ndo ihya.

<sup>36</sup> 'Soco quiví ta cuhva cha cucuvi cuan, yori chitó, ní ángel andiví ta ña chitó ra. Ni yuhu Rayíi cha quichí nya gloria ta ña chité. Noo tuhun ri maa Nyoo Suti chitó ra.

<sup>37</sup> 'Tari cuví quiví chiyó ra Noé, tyicuan caa cucuvi quiví quichi tucu yuhu Rayíi cha quichi nya gloria.

<sup>38</sup> Quiví ta ní cumañi ca coon savi xaan, ñáyiví cuan, chachí ñu, ta chihí ñu, tandahá ñu, ta chahá ñu chi sehe ñu tandaha nyacua nya quiví quihví ra Noé chichi barcu cuan.

<sup>39</sup> Ta sana iñi ñu ta chaḡ savi ta tyañi tandihí ñu. Ta tyicuan caa cucuvi tucu quiví quichi tucu yuhu Rayíi cha quichí nya gloria.

<sup>40</sup> Quiví cuan, tu uvi ra ñohó ra nu chiqui. Noo ra cunaquehin, ta noo ra ndoo ra.

<sup>41</sup> Tu uvi ñusihí nyicó ñu molinu. Noo ña cunaquehin, ta noo ña ndoo ña.

<sup>42</sup> Cuḡtu tuhva vaha ndo vatyí ña chitó ndo ñáá cuhva cuquichi ra nyacá ñaha chi ndo.

<sup>43</sup> Soco coto ndo tuhun ihya vatyí tatu noo chitoho vehe ta chitó ra ñáá cuhva cuquihví ra suhu chichi vehe ra, cuatu tuhva vaha ra ta ma cuhva ra cha quihví ra suhu cuan.

<sup>44</sup> Yucuan chaha nyoho, cuḡtu tuhva ndo. Vatyí sana ri iñi ndo, ta cuquichi yuhu Rayíi cha quichi

nya gloria.

*Ñu cha nyatú tuhva na ndichi ra Cristo, ican ñu  
cuví musu vaha ra  
(Lc. 12.41-48)*

<sup>45</sup> Noo musu cha tyasohó tuhun cahán chitoho, ta tyicuan ri sacuví ra tyiño tyaa ra chi ra, yucuan cuví noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva.

<sup>46</sup> Ta sñi xaan cuví chi musu cuan tatu cuhva cha sahá tyiño ra ta nachaa chitoho ra. Vatyí quichahá ra tandihi cha tahán chi sacuvi ra.

<sup>47</sup> Ta cha ndicha catyí chi ndo, vatyí chitoho ra cunatyaa ra tandihi cha cumí ra ndaha ra, vatyí vaha quichahá ra chihin tyiño sahá ra.

<sup>48</sup> Soco tatu noo musu quiñi iyó ta chicá xiñi ra vatyí naha cuahan chitoho ra,

<sup>49</sup> ta quichaha nyacuvi ra cha ña vaha chihin inga musu cuan, ta quichaha chachi ra ta chihi ra ndixi chihin ra chiñi,

<sup>50</sup> tyicuan ta sana iñi ra ta ndichi chitoho ra quivi cha ña nyatú ra chi ra.

<sup>51</sup> Tyicuan ta chitoho ra ñihi xaan cutachi tuñi ra chi ra chihin ñáyivi quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

## 25

*Nu chahá ra Jesús noo cuhva cuenda uchi tahan ñu  
tyivaa*

<sup>1</sup> Cha nyacá ñaha Nyoo aña ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico

tandaha cua quehen cuenda ñu chi ra cha cua tandaha.

<sup>2</sup> Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu.

<sup>3</sup> Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyí natyíhi ñu chichi lámpara ñu tatu ndíhi.

<sup>4</sup> Soco ñu cachi ñohó iñi cuan, canyisó sñn ñu yutyí acetye chihin lámpara ñu.

<sup>5</sup> Ta vatyí cucuee ca chaa ra cha cua tandaha cuan, catíñ ñumahna chi tandíhi ñu, ta caquixí ñu.

<sup>6</sup> Tyicuan ta ñáá cuhva ñuu, ta chiñi ñu noo ndusu cha catyí tyehe caa: “¡Cha vachi ra cha cua tandaha! ¡Quita ndo, quehen cuenda ndo chi ra!” catyí ndusu cuan.

<sup>7</sup> Tandíhi ñu tyivaa cuan canducuita coyo ñu ta quichaha casanduvaha ñu lámpara ñu.

<sup>8</sup> Tyicuan ta quichaha catyí ohon ñu tondo ñohó iñi cuan chi inga ohon ñu cuan: “Cuhva ndo suhva acetye ndo chi ndi, vatyí cuñí ndahva lámpara ndi”, catyí ñu.

<sup>9</sup> Soco ñu tyivaa cha cachi ñohó iñi cuan nacahan ñu tyehe caa: “Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo.”

<sup>10</sup> Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

<sup>11</sup> Yahá cuan ta cachaa coyo tucu ñu chisata

acetye cuan, ta catyí ñu: “¡Tata! ¡Tata! ¡Nuña yuvehe naquihvi ndi!”

<sup>12</sup> Soco maa ra nacahan ra, ta catyí ra: “Chandicha vatyí ña ñohó nui chi nyoho.”

<sup>13</sup> Tyicuan ta quichaha catyí ra Jesús:

—Cuatu tuhva ri nyoho, vatyí ña chitó ndo nya quivi ta ñáá cuhva cuquichi yuhu Rayi cha quichi Nya gloria.

*Noo cuhva cuenda xuhun*  
(Lc. 19.11-27)

<sup>14</sup> ‘Cha nyacá ñaha Nyoo aña ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

<sup>15</sup> ‘Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra.

<sup>16</sup> Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan.

<sup>17</sup> Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan.

<sup>18</sup> Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehé ra xuhun chitoho ra.

<sup>19</sup> ‘Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra.

<sup>20</sup> Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca

mil siqui cuan, ta catyí ra: “Tata, ohon mil chahun chii, ma inga ohon mil ihya cha saha ganai.”

<sup>21</sup> Ta chitoho ra catyí ra chi ra: “Vaha. Noo musu vaha xaan cuvún. Ta sacuvún tandihí cha catyí. Ta vasi chiin ri xuhun चाहिं chuun soco vaha xaan chotyíñon chi chí. Vityin cuaha ca cucuhva cuende chuun. Quíhví nu vaha ihya, ta cusíi cuñun chihin.”

<sup>22</sup> Yaha cuan ta chaá tucu musu cha quehen cuenda uvi mil xuhun cuan, ta catyí ra: “Tata, uvi mil chahun chii, ma uvi ca mil ihya cha saha ganai siqui.”

<sup>23</sup> Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chiin ri xuhun चाहिं chuun soco vaha xaan chotyíñon chi chí. Vityin cuaha ca cucuhva cuende chuun. Quíhví nu vaha ihya, ta cusíi cuñun chihin”, catyí ra.

<sup>24</sup> Soco cuhva cha chaá musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyí cuvún noo ra xaan ta cuñún naquehún xuhun noo nu ña sahá tyíñon, ta cuñun naquehun cosecha noo nu ña tachun.

<sup>25</sup> Yucuan chaha nayuhví ta चाहिन ta tyihí xehi xuhun chichi ñuhú. Soco ma xuhun ihya cha chahun chii”, catyí ra.

<sup>26</sup> Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyí cuñi naquehín nu ña saha tyíñe, ta quehín cosecha noo nu ña tachí,

<sup>27</sup> ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin

xuhun siqui cha saha ganaa chi”, catyí ra.

<sup>28</sup> Tyicuan ta quichaha catyí ra chi ñu nyicú cuan: “Tinya ndo noo mil xuhun cha nyisó ra, ta cuhva ndo chi ra cha nyisó uchi mil.

<sup>29</sup> Vatyí ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu.

<sup>30</sup> Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahñi ra noho ra chihin cha nyehe ra tindoho.”

### *Nu catyí ra Jesús vatyí cucutuñi chi tandihí ñáyivi*

<sup>31</sup> Quívi cuquichi yuhu Rayí cha quichí nya gloria, cuquichi chihin cuaha ángel cuende, ta cucunyai tyayu tyaquí ta cunyaca ñahi.

<sup>32</sup> Ñáyivi tandihí ri ñuu cundu ñin ri ñu nui. Ta cusasiin chi noo noo ñu, tari ra sahá cumi mbee tavá ñin ra chi mbee ta tava ñin ra ndixihyu.

<sup>33</sup> Ta cucuatyai chi mbee cuan chiyo vahi, ta chi ndixihyu cuan, chiyo satyin.

<sup>34</sup> Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyí nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyí cha cuenda maa ndo chinó ihya nyata quívi savaha Nyoo ñuhu ñáyivi.

<sup>35</sup> Vatyí quívi chisoque, ta nyoho chaha ndo cha cachi. Quívi cu ityi ndutya ta chaha ndo cohi. Ta quívi chica noi tari ra inga ñuu ta nyoho chaha ndo vehe coi.

<sup>36</sup> Qui<sup>v</sup>i cumañi sahme, ta nyoho chaha<sup>h</sup> ndo sahme. Qui<sup>v</sup>i cuhv<sup>i</sup> ta nyoho chahan<sup>h</sup> ndo chinyeh<sup>e</sup> ndo chii. Ta qui<sup>v</sup>i ñoh<sup>i</sup> vehe caa, ta quich<sup>i</sup> nyehe ndo nu ñoh<sup>i</sup>.”

<sup>37</sup> Ta ñu cha vaha cuan cundaca tuhun ñu chii, ta catyi ñu: “Sutu Mañi yuhu, ¿ama nyehe<sup>e</sup> ndi chisocon, ta chaha<sup>h</sup> ndi cha cachun? ¿Ama nyehe<sup>e</sup> ndi ityun ndutya ta chaha<sup>h</sup> ndi cohun?”

<sup>38</sup> ¿Ama nyehe<sup>e</sup> ndi chuun chicá noun tari ra inga ñuu ta chaha<sup>h</sup> ndi vehe coun? ¿Ama cumañi<sup>i</sup> sahmon, ta chaha<sup>h</sup> ndi chuun?

<sup>39</sup> ¿Ama nyehe<sup>e</sup> ndi cuhv<sup>u</sup>n, o ñoh<sup>u</sup>n vehe caa, ta chahan<sup>h</sup> ndi chinyeh<sup>e</sup> ndi chuun?” cucaty<sup>i</sup> ñu.

<sup>40</sup> Ta yuhu cha cuv<sup>i</sup> Rey cucaty<sup>i</sup> chi ñu: “Cha ndicha caty<sup>i</sup> chi ndo, vaty<sup>i</sup> tand<sup>i</sup>hi tumañi iñi sacuv<sup>i</sup> ndo chihin ra ndahvi, ra yañi ihya, chi yuhu sacuv<sup>i</sup> ndo tumañi iñi cuan.” Tyicuan caa cucaty<sup>i</sup> yuhu chi ñu.

<sup>41</sup> Tyicuan ta yuhu cha cuv<sup>i</sup> Rey cucaty<sup>i</sup> tiqui chi ñu nyicú chiyo satyin tyehe caa: “Canyaha ndo nui, nyoho ñu tahán chi cuh<sup>u</sup>n anyaya. Cuahan<sup>h</sup> ndo nu ñuh<sup>u</sup> cha ma ndahva ca maa. Vaty<sup>i</sup> yucuan cuv<sup>i</sup> nu chin<sup>o</sup> cha cuenda cuihna ta cha cuenda taty<sup>i</sup> ña vaha cuenda ra.

<sup>42</sup> Vaty<sup>i</sup> chisoque, ta nyoho ña chaha<sup>h</sup> ndo cha cachi. Cu ity<sup>i</sup> ndutya, ta ña chaha<sup>h</sup> ndo ndutya cohi.

<sup>43</sup> Chicá noi tari chicá noo ra inga ñuu, ta ña chaha<sup>h</sup> ndo nu coi. Cumañi<sup>i</sup> sahme ta ña chaha<sup>h</sup> ndo sahma cuihne. Cuhv<sup>i</sup> ta ñoh<sup>i</sup> vehe caa, soco ña chahan<sup>h</sup> ndo chinyeh<sup>e</sup> ndo chii nu ñoh<sup>i</sup>”, cucaty<sup>i</sup> chi ñu.

<sup>44</sup> Tyicuan ta cucaty<sup>i</sup> ñu chii tyehe caa: “Sutu

Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvun, o ñohun vehe caa, ta ña tyinyee ndi chuun?” cucatyí ñu.

<sup>45</sup> Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihí maa cha ña sacuví ndo chi ñáyiví ndahvi ihya, suri ña sacuví tucu ndo chi yuhu cuví cuan”, cucatyí yuhu chi ñu.

<sup>46</sup> Tyicuan ta ñu cuan cuhun coyo ñu nu cayú ñuhú cha ma ndahva ca maa. Ta ñáyiví vaha cuan cuhun ñu cucoo ñu noo ñayiví cha ma naa ca maa.

## 26

*Nu canducu ra cuhva yoso caa catin ra chi ra Jesús (Mr. 14.1-2; Lc. 22.1-2; Jn. 11.45-53)*

<sup>1</sup> Cuhva cha ndihí catyí ra Jesús tuhun ihya, ta quichahá catyí ra chi ra cachicá noo chihin ra tyehe caa:

<sup>2</sup> —Nyoho chitó ndo vatyí uvi ca quiví ta sanducahnu yo vico pascua. Ta yuhu Rayí cha quichí nya gloria cucuhva cuenda ñu chii vatyí tyaa ñu chii nu cruzi —catyí ra.

<sup>3</sup> Quiví cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu in ri ra nuquehe vehe tyiño ra Caifás, ra cuví nuu chi tata sutu.

<sup>4</sup> Yucuan casandaá ra tyiño yoso caa ta sandavi ñaha ra chi ra Jesús ta catin ra chi ra ta cacahni ra chi ra.

<sup>5</sup> Soco cacatyí ra:

—Ma cahni yo chi ra cha ni ri ca cha chichi vico, tacuhva cha ma naquiqui xaan ñáyiví —catyí ra.

*Nu chosó noo ñaha sihi ndutya vixi chahan xiñi ra Jesús*

*(Mr. 14.3-9; Jn. 12.1-8)*

<sup>6</sup> Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chí, sivi saca ra cuví cuan.

<sup>7</sup> Ta tuhva noo ñaha nu nyaá ra Jesús, nyisó ña noo yutyi tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra.

<sup>8</sup> Cuhva cha cananyehę ra chicá noo chihin ra cacuxaan ra ta quichaha catyi ra:

—¿Ñáá tuhun cha sativi ña ndutya vixi chahan cuan?

<sup>9</sup> Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyí ra.

<sup>10</sup> Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyí cha sacuvi ña chihin, noo cha vaha cuví.

<sup>11</sup> Vatyí ñu ndahvi tyicuan ri cunyaa ñu chihin ndo, soco yuhu, ñima tyicuan ri cua cunyai chihin ndo.

<sup>12</sup> Choso ña ndutya vixi chahan siqui coño ñuhi, vatyí sanduvaha ña cuenda cha cohin chichi ñuhú.

<sup>13</sup> Cha ndicha catyí chi ndo, vatyí tandihi ri nu cahan ñu tuhun Nyoo nicañu ñayivi, cunacatyí tucu ñu cha sacuvi ñaha ihya, tacuhva nicohon iñi ñayivi chi ña —catyí ra Jesús.

*Nu naxico tuhun ra Judas Iscariote chi ra Jesús*

*(Mr. 14.10-11; Lc. 22.3-6)*

<sup>14</sup> Tyicuan ta noo ra chicá noo chihin ra Jesús, ra cha nañí Judas Iscariote, chahan ra chichan ra chihin ra cacuví nuu chi tata sutu.

<sup>15</sup> Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin.

<sup>16</sup> Ta nya cuhva cuan ta quichaha nducu ra Judas ñáá noo cuhva cuvi nacuhva cuenda ra chi ra Jesús chi ra cacuví nuu chi tata sutu cuan.

*Nu cuxiñí ra Jesús chihin ra cachicá noo chihin ra (Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup> Quiví xihna ri cha quichaha vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichaha candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

<sup>18</sup> Ta catyí ra Jesús chi ra:

—Cuhan ndo chichi ñuu ta cha ndo vehe noo ra cuan. Ta catyí ndo chi ra: “Ra Sacuaha catyí ra vatyí cha cuyatyin cua cúvi ra, ta vehun cusanducahnu ndi vico pascua”, catyí ndo chi ra —catyí ra Jesús.

<sup>19</sup> Tyicuan ta casacuví ra tari cuhva catyí ra Jesús chi ra. Yahá cuan ta casanduvaha ra cha cacuxiñi ra cha vico pascua cuan.

<sup>20</sup> Cuhva cha cuaa, chicunyaá ra Jesús nu mesa chihin ndi uchi uvi ra chicá noo chihin ra.

<sup>21</sup> Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

<sup>22</sup> Ta canducuihya xaan iñi ra, ta quichaha candaca tuhun ñin ñin ra chi ra ta cacatyí ra:

—Sutu Mañi yuhu, ¿atu yuhu cuví?

<sup>23</sup> Ta nacahan ra Jesús ta catyí ra:

—Ra cha chachí ñin ri coho chihin, ican ra cuan cua na cuhva cuenda chii.

<sup>24</sup> Yuhu Rayi cha quichi nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

<sup>25</sup> Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

<sup>26</sup> Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yaha tahvi sava ra, ta chaha ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

<sup>27</sup> Yaha cuan ta quehen tucu ra copa, ta nacuhva ra tyahvi nyoo chi Nyoo, ta sayaha ra chi tandihi ra ta catyí ra:

—Coho tandihi ndo ihya.

<sup>28</sup> Vatyí ican ihya cuví niñi. Ta chihin niñi natyihí tahan Nyoo tuhun chaa chihin ndo, vatyí cucati niñi cha catyí cha vaha chi cuaha ñu, vatyí chihin niñi coo tichahnu iñi cuatyí ñu.

<sup>29</sup> Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu

chaa chihin ndo nya nu nyacá ñaha Suti andiví  
—catyí ra.

*Nu catyí ra Jesús vatyi cucatyí ra Pedro vatyi ña ñohó nuu ra chi ra*  
(Mr. 14.26-31; Lc. 22.31-34; Jn. 13.36-38)

<sup>30</sup> Cha yahá cha cachitá ra yaa chi Nyoo, ta cuahan coyo ra yucu yutun Olivo cuan.

<sup>31</sup> Tyicuan ta quichahá catyí ra Jesús chi ra:  
—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyi nu tutu Nyoo catyí chi tyehe caa: “Cucahñi chi ra sahá cumi mbee, ta mbee cuquití cuatyí tí”, catyí chi.

<sup>32</sup> Soco cha yahá nandote, xihna que cuhin Galilea, ican saha nyoho.

<sup>33</sup> Tyicuan ta nacahan ra Pedro ta catyí ra:  
—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

<sup>34</sup> Tyicuan ta quichahá catyí ra Jesús chi ra:  
—Cha ndicha catyí chuun vatyi suri maa cha cuaa ihya, cha ni cumañi ca cuacu loho, yoho cucatyun uñi chaha vatyi ña ñohó nuun chii —catyí ra.

<sup>35</sup> Ta ra Pedro catyí ra:  
—Vasi cúvi chuhun, soco ma catyi cha ña ñohó nui chuun —catyí ra.

Ta suri tyicuan caa catyí tandihí ra chicá noo chihin ra.

*Nu chicán tahvi ra Jesús chi Nyoo nu cuví*  
*Getsemaní*  
(Mr. 14.32-42; Lc. 22.39-46)

<sup>36</sup> Tyicuan ta chaa ra Jesús chihin ra cachicá noo chihin ra noo nu nañí Getsemaní, ta catyí ra chi ra:

—Cunyicu ndo ihya, cha niri ca cha cuahin yucuan, cua cacan tahvi.

<sup>37</sup> Ta quehen ra chi ra Pedro ta chi ni nduvi sehe ra Zebedeo, cuahan coyo chihin ra. Ta quichaha nducuihya cuñi ra, ta tyoño xaan cuñi ra.

<sup>38</sup> Tyicuan ta catyí ra chi ra:

—Cahnu xaan tucuihya iñi nyaá añime. Nyacua cuñi chi cahñi chi chii. Ndo ndo ihya ri ta conyito ndo chihin —catyí ra.

<sup>39</sup> Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chi Nyoo ta catyí ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuvi tari cuhva cha cuñí mai, soco tari cuhva cuñí maun na cuvi —catyí ra.

<sup>40</sup> Tyicuan ta nachaa ra nu nyicú ra cachica noo chihin ra, ta nyehe ra vatyi caquixí ra. Ta catyí ra chi ra Pedro tyehe caa:

—¿Atu ni minoo hora ña cuví conyito ndo chihin?

<sup>41</sup> Conyito ndo, ta cacan tahvi ndo tacuhva cha ma cuvi chasaha cuihna chi ndo. Cha ndicha vatyi añima ndo, cuñí xaan chi nanducu chi Nyoo, soco coño ñuhu ndo vita cuñí chi —catyí ra Jesús chi ra.

<sup>42</sup> Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi t̄indoho ihya, tu tyicuan caa, na cuvi maa cuhva cuñún —catyí ra.

<sup>43</sup> Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñí ra cusu ra.

<sup>44</sup> Tyicuan ta sandoo ra chi ra, ta cuahan ra cha cu uñi chaha cua cacan tahvi ra. Ta catyí ra suri maa tuhun cha yahā cahān ra cha chicān tahvi ra chi Nyoo.

<sup>45</sup> Tyicuan ta nachaa ra nu canyicu ra cachicá noo chihin ra, ta catyí ra chi ra:

—Vityin ndicha, cusu ndo ta nyitatu ndo. Vatyí cha chaa cuhva cha cua nacuhva cuenda ra chii chi ra quiñi iyó, ta Rayi cha quichi nya gloria cuví.

<sup>46</sup> Nd̄icuita ndo, ta coho ndo. Vatyí cha vachi ra cha cunacuhva cuenda chii —catyí ra Jesús.

*Nu catiñ ra xaan iñi chi ra Jesús cuahan ra vehe caa (Mr. 14.43-50; Lc. 22.47-53; Jn. 18.2-11)*

<sup>47</sup> Ni cahán ca ra Jesús tuhun ihya, ta chaa ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chi tata sutu, ta ra cacuví mandoñi ñu Israel, ican tachi chi ra.

<sup>48</sup> Ra Judas, ra cha chahá cuenda chi ra Jesús, cha yahā chahā ra noo seña chi ra cuan, tacuhva coto ra yóo chi t̄iñ ra. Ta catyí ra:

—Ra cha cutyayuhi chi, ican ra cuan cuví. T̄iñ ndo chi ra.

<sup>49</sup> Tyicuan ta tuhva ra chi ra Jesús ta catyí ra:

—Nocumi chuun, Maestro.

Ta tyayuhū ra chi ra.

<sup>50</sup> Tyicuan ta nacahan ra Jesús ta catyí ra chi ra:  
—Amigo, sacuvi ñáá tyiño vachun.

Tyicuan ta catuhva ra ta catiñ ra chi ra Jesús.

<sup>51</sup> Tyicuan ta noo ra ndihí chihin ra Jesús, tava ra mityi ra ta chahnya ra soho noo musu ra cuví nuu chi tata sutu cuan.

<sup>52</sup> Ta catyí ra Jesús chi ra:

—Natyihí mityun chichi vena. Vatyí tandihí ñu cacañi tahan chihin mityi, suri chihin mityi cuví ñu.

<sup>53</sup> ¿Atu ña chitón vatyí tatu yuhu ta cuñí, cuví caquen chi Suti, ta maa ra cutachi ra vityin vityin yaha ca uñi xico uchi mil ángel, ta sacacu ra chii?

<sup>54</sup> Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahán maa chi cuví chi yuhu tyehe caa —catyí ra.

<sup>55</sup> Ta catyí tucu ra Jesús chi ñáyivi:

—¿Atu vachi coyo nyoho vachi tñin ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiqivi chinyaí sañahi nu nyicú ndo chichi vehe ñuhu cahnu, soco ña tñin ndo chii cha cuhin vehe caa.

<sup>56</sup> Vatyí tandihí cha cuví chii vityin, ta chicunyaá nu tutu Nyoo, cha catyaa ra profeta Nyoo ta cha naha.

Tyicuan ta ndiñ ra cachicá noo chihin ra, cachino ra. Noo tuhun ca maa ra Jesús casando ra.

*Nu cutuñí chi ra Jesús nuu ra cacuví tyiño cuenda ñu Israel  
(Mr. 14.53-65; Lc. 22.54-55, 63-71; Jn. 18.12-14, 19-24)*

57 Ta ra cha catiñ chi ra Jesús cuan, chinyaca ra chi ra nuu ra Caifás, ra cuví nuu chi tata sutu. Suri yucuan canyicú ñn ri ra sacuaaha ley vehe ñuhu ta ra cacuví mandoñi.

58 Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quihví ra ta ndoo ra nyaá ra chihin policia cuan, vatyí nyehe ra yoso caa quita tuhun cuan.

59 Ra cacuví nuu chi tata sutu, ta ra cacuví mandoñi, ta tandihí ra cuví tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra.

60 Soco ña cañihí maa ra cuatyí ra, vasi cuaha ñáyivi chahan ñu chicatyi ñu cuendu siqui ra. Soco nu ndihí tuhun, chaá coyo uvi ca testigu cuendu.

61 Ta cacatyí ra:

—Ra ihya, catyi ra vatyí cuví satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —cacatyí ra.

62 Tyicuan ta ra cuví nuu chi tata sutu cuan, ndicuita ra, ta catyi ra chi ra Jesús:

—¿Atu ña nacahun nu cahan ra ihya? ¿Ñáa cha cuví cha cacatyí ra ihya sicun?

63 Soco ra Jesús taxi ri nanyaá ra. Tyicuan ta quichaha catyi ra cuví nuu chi tata sutu cuan chi ra:

—Chihin sivi Nyoo nyitó, catyi chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyi ra.

64 Ta catyi ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichí nya gloria, cunyai chiyo vaha Nyoo ra iyó tandihí tunyee iñi chii, ta cunyehe ndo nu quichi tiqui nu vico ityi andiví —catyí ra.

<sup>65</sup> Tyicuan ta ra cuví nuu chi tata sutu cuan chahnya ra sahma ra tari noo seña tyi cuñí maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahán ra. ¡Nyehe ndo vityin! Ña niñi cha tava yo cha ndaa. Nyoho cha chiñi ndo tuhun ña vaha cahan ra.

<sup>66</sup> ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñí chi cha cúvi ra.

<sup>67</sup> Tyicuan ta catyicusí ra nuu ra ta cacañi ra chi ra. Inga ra cacatu ra nuu ra chihin chiqui ra.

<sup>68</sup> Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

*Nu catyí ra Pedro vatyí ña ñohó nuu ra chi ra Jesús (Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Cha niri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

<sup>70</sup> Ta ra Pedro catyí ra vatyí ña ñohó nuu ra chi ra nuu tandihí ñu nyicú cuan, ta catyí ra:

—Ña chité ñáá tuhun cahún.

<sup>71</sup> Tyicuan ta cuahan ra Pedro ityi yuvehe, ta nyehe inga ña chi ra, ta catyí ña chi ra nyicú cuan:

—Suri chica noo tucu ra ihya chihin ra Jesús, ra ñuu Nazaret cuan —catyí ña.

<sup>72</sup> Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

<sup>73</sup> Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuvi nyacua nya cuhva cahún.

<sup>74</sup> Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacañi Nyoo chii tatu ña ndicha cha cahín —catyí ra.

Ta suri cuhva cuan nacua cuu cha noo loho.

<sup>75</sup> Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quita ra Pedro yucuan, ta chacu vavaha ra cha cuihya iñi ra cha sacuvi ra tyicuan caa.

## 27

*Nu cachahá cuenda ra chi ra Jesús chi ra Pilato (Mr. 15.1; Lc. 23.1-2; Jn. 18.28-32)*

<sup>1</sup> Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús.

<sup>2</sup> Ta nuhñi ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

### *Nu chihí ra Judas*

<sup>3</sup> Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uvi ñni ra cha sacuvi ra, ta nacuhva ra ndi oco uchi xuhun cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan.

<sup>4</sup> Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

<sup>5</sup> Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaá ra chi ra. Ta chihí ra.

<sup>6</sup> Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyí yahvi cha chahñi ñu noo ñáyivi cuví.

<sup>7</sup> Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchi ra chi ñu inga ñuu tu chihí ñu.

<sup>8</sup> Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi.

<sup>9</sup> Ta tyicuan caa chingo cava cha tyaa ra Jeremías profeta Nyoo ta cha naha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra.

<sup>10</sup> Ta chihin cuan, casata ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

*Nu nyehe ra Pilato vatyí ñahri maa cuatyí ra Jesús (Mr. 15.2-5; Lc. 23.3-5; Jn. 18.33-38)*

<sup>11</sup> Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

<sup>12</sup> Ta cuhva cha catyaa ra cacuví nuu chi tata sutu cuan ta mandoñi cuatyí siqui ra, ra Jesús ña nacahan maa ra.

<sup>13</sup> Tyicuan ta quichaha catyí ra Pilato chi ra:

—¿Atu ña chiñún tandihí cha cacahán ra sicun?

<sup>14</sup> Soco ra Jesús ña nacahan ra. Ta nyacua iyo cuñi gobiernu cuan vatyí ña nacahan ra. Ta ña chitó ra ñáá cunyacuvi ra.

*Nu cutuñí chi ra Jesús ta cacatyí ñu vatyí cucúvi ra (Mr. 15.6-20; Lc. 23.13-25; Jn. 18.38—19.16)*

<sup>15</sup> Soco cha vico pascua cuan, iyó noo tuhun chi ñu vatyí tuhva ra gobiernu saña ra noo ra ñohó vehe caa, nya ra cachi maa ñáyivi.

<sup>16</sup> Ta quivi cuan ñohó noo ra cha nañi Barrabás vehe caa. Ta chitó tandihí ñáyivi tuhun ra.

<sup>17</sup> Ta cuhva cha canyicú in ri ñu, ra Pilato ndaca tuhun ra chi ñu, ta catyí ra:

—¿Yóo chi cuñi nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

<sup>18</sup> Vatyí chitó ra vatyí cha cuenda cha tasi cuñi nyehe ñu chi ra Jesús, yucuan cuenda chaha cuenda ñu chi ra.

19 Cha n̄i ri ca cha nyaá ra Pilato nu tyayu ra, nu cuví ra tyiño, tachi ñasihí ra noo tyiño chí ra ta catyí ña: “Ma tyihun chuun chihin ra vaha chiña. Vatyí cuñi tahin noo ñumahna cha cuenda ra. Ta quiñi xaan tahin chihin”, catyí ña.

20 Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chí ñáyivi na cacan ñu cha saña ra Pilato chí ra Barrabás, ta na cúvi ra Jesús.

21 Ta gobiernu cuan caḥan ra chihin ñu inga chaha, ta catyí ra:

—Chichi cha n̄induvi ra, ¿nya ra cuñí ndo cha sañe?

Ta maa ñu nacahān ñu, ta catyí ñu:

—Chí ra Barrabás.

22 Ta ra Pilato ndacā tuhun ra chí ñu, ta catyí ra:

—¿Ta ñáá cha ña vaha sacuvi chihin ra Jesús cha nañí Cristo ihya?

Tandihí ñu nacahān ñu ta catyí ñu:

—¡Na cúvi ra nu cruzi!

23 Tyicuan ta quichahā catyí ra Pilato chí ñu:

—Soco ¿ñáá cha ña vaha sacuvi ra?

Soco maa ñu nacanaḥ chaa tucu ñu inga chaha ta catyí ñu:

—¡Caḥñi chí ra nu cruzi!

24 Cuhva cha nyeheḥ ra Pilato vatyí ñahri maa cha cuví sacuvi ra, vatyí quiñi xaan cacuví ñu, chican ra ndutya, ta nacatyā ra ndaha ra chihin nuu ñáyivi cuan, ta catyí ra:

—Yuhu ñahri cuatyí cha cua cúvi ra ñahri cuatyí ihya. Na ndoo siqui maa ndo.

25 Ta tandihí ñáyivi canacahān ñu, ta catyí ñu:

—Na ndoo chí siqui maa ndi ta siqui sehe ndi.

<sup>26</sup> Tyicuan ta ra Pilato saña ra chi ra Barrabás, ta tach̄i ra na ndoho ra Jesús, ta nacuhv̄a cuenda ra chi ra na cúvi ra nu cruzi.

<sup>27</sup> Tyicuan ta sindaro cuenda gobiernu cuan chinyac̄a ra chi ra Jesús nya vehe tyiño, ta casandu ñ̄n ri ra chi tand̄ih̄i sindaro cuan ñ̄cachico.

<sup>28</sup> Tyicuan ta catav̄a ra sah̄ma ra ta casacuih̄no ra noo sah̄ma cuaha chi ra.

<sup>29</sup> Ta catyih̄i ra noo corona cha chino chihin iñu xiñi ra. Ta chah̄a ra noo yutun na quindaha ra chihin chiyo vaha ra. Tyicuan ta cachicuiñ̄i ch̄iti ra nuu ra, ta cachacu nyaa ra chi ra ta catyí ra:

— ¡Nocumi chuun, yoho Rey cuenda ñu Israel!

<sup>30</sup> Ta catyic̄u sī ra chi ra ñ̄and̄ih̄i. Ta queh̄en ra yutun cuan ta cañ̄i ra xiñi ra.

<sup>31</sup> Cha yah̄a cha cachacu nyaa ra chi ra ta catav̄a ra sah̄ma cuaha cuan chi ra ta sand̄ihv̄i noo tucu ra sah̄ma maa ra chi ra. Tyicuan ta queh̄en ra chi ra cua cah̄ni ra chi ra nu cruzi.

*Nu catyaa ra chi ra Jesús nu cruzi  
(Mr. 15.21-32; Lc. 23.26-43; Jn. 19.17-27)*

<sup>32</sup> Cuhva cha caquit̄a coyo ra yucuan, catahan ra chi noo ra ñ̄uu Cirene, nañi ra Simón. Ta casaniñ̄i ra chi ra na cuiso ra cruzi ra Jesús.

<sup>33</sup> Ta cachaa coyo ra noo nu nañi Gólgota, ta cuñi chi catyí Nu Cuví Yiqui Xiñi Ndiyí.

<sup>34</sup> Ta yucuan cachah̄a ra vinu nasac̄a chihin cava uva coho ra Jesús. Soco cha yah̄a cha chih̄i ra chiin, ña cuñi ca ra coho.

<sup>35</sup> Ta cha yah̄a cha catyaa ra chi ra nu cruzi, tyicuan ta sindaro cuan caqueh̄en ra sah̄ma ra ta chahan ra noo sihva chihin. Ta nya ra saha

ganaa, ñih<sub>i</sub> ra sah<sub>m</sub>a cuan. Ta tyicuan caa ch<sub>i</sub>no cava tuhun cha tyaa<sub>u</sub> noo profeta Nyoo ta cha naha nu catyí ch<sub>i</sub> tyehe caa: “Casach<sub>a</sub> ra sah<sub>m</sub>e chihin cha chah<sub>a</sub>n ra sih<sub>v</sub>a”, catyí ch<sub>i</sub>.

<sup>36</sup> Tyicuan ta cachicunyic<sub>u</sub> ra yucuan vatyi saha cuenda ra ch<sub>i</sub> ra.

<sup>37</sup> Ta ityi xiñi ra catyaa<sub>u</sub> ra noo letra cha catyí ñáá tuhun cua cahñi ra ch<sub>i</sub> ra. Ta catyí ch<sub>i</sub> tyehe caa: “Ican ra ihya cuví ra Jesús, rey cuenda ñu ñuu Israel.”

<sup>38</sup> Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra.

<sup>39</sup> Ta ñu yahá coyo cuan, cacahán ñu ch<sub>i</sub> ra, ta quisi xiñi ñu,

<sup>40</sup> ta catyí ñu ch<sub>i</sub> ra:

—¡Yoho cha caty<sub>u</sub>n tyi cusanduvon vehe ñuhu cahnu, ta chichi cha uñi quiv<sub>i</sub> ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ño nu cruzi chiña! —catyí ñu ch<sub>i</sub> ra.

<sup>41</sup> Ta suri tyicuan caa cachacú nyaa tucu ra cacuví nuu ch<sub>i</sub> tata sutu ch<sub>i</sub> ra, ta ra sacuahá ley vehe ñuhu, ta mandoñi ñuu ñandih<sub>i</sub>. Ta cacatyí ra ch<sub>i</sub> tahan ra tyehe caa:

<sup>42</sup> —Sacac<sub>u</sub> ra ch<sub>i</sub> inga ñu, soco ña cuví sacacu ra ch<sub>i</sub> maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo ch<sub>i</sub> ra.

<sup>43</sup> Itá iñi ra ch<sub>i</sub> Nyoo, vityin na sacacu Nyoo ch<sub>i</sub> ra, tatu ndicha cuñí ra ch<sub>i</sub> ra. Vatyi caty<sub>i</sub> ra ch<sub>i</sub> yo vatyi Sehe Nyoo cuví ch<sub>i</sub> ra.

<sup>44</sup> Ta nyacua nya ra suhu cha tacaá nu cruzi xiin ra ta cacah<sub>a</sub>n ra ch<sub>i</sub> ra ñandih<sub>i</sub>.

*Nu chihí ra Jesús**(Mr. 15.33-41; Lc. 23.44-49; Jn. 19.28-30)*

<sup>45</sup> Tyicuan ta tandihí siquí ñuhu ñayiví nduñaa ñi, nyacua nya ora ta nyacua nya ca uñi cha cha ñi.

<sup>46</sup> Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñí chi catyí: Nyoo Suti, Nyoo Suti, ¿ñáá tuhun cha sandoó ñihnon noo tuhun mai?

<sup>47</sup> Suhva ra canyicú cuan, cachiñi ra cha cahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

<sup>48</sup> Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra.

<sup>49</sup> Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

<sup>50</sup> Inga tucu chaha cana chaa ñihi ra Jesús, tyicuan ta chihí ra.

<sup>51</sup> Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siquí ta nyacua nya yuvi ndata. Ta taan. Ta ndata yuu.

<sup>52</sup> Ta nuña yuhu ñaña. Ta nyacua canandoto cuaha ñu chinó ñi chi Nyoo, ñu cachihí.

<sup>53</sup> Ta cha yaha nandoto ra Jesús caquitá coyo ñu nu ñaña ta quihví coyo ñu chichi ñuu Jerusalén, ta cuaha ñáyiví nyehe chi ñu.

<sup>54</sup> Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha canyehę ra inga ca cha cuvı, ta cacatyı ra:

—Ndicha ndicha cuii, vatyı Sehe Nyoo cuvı chi ra ihya.

<sup>55</sup> Cuaha ñusihı cha chinyicon chi ra Jesús nya Galilea ta tyinyeę ñu chi ra, nyicú ñu canyehé ñu nya sava ri yucuan.

<sup>56</sup> Ta ican suhva ñu ihya cuvı cu María ñaha Magdala, ta cu María sihi ra Jacobo ta ra José, ta sihi sehe ra Zebedeo.

*Nu cua cuchı ra chi ra Jesús  
(Mr. 15.42-47; Lc. 23.50-56; Jn. 19.38-42)*

<sup>57</sup> Cuhva cha cua cuaa, quichi noo ra tyayıi cha nańı José. Ra ñuu Arimatea. Ta suri chinó ińı ra chi ra Jesús.

<sup>58</sup> Ta chahan ra chinyehę ra nu nyaá ra Pilato, ta chican ra cońo ñuhu ra Jesús. Tyicuan ta tyihı ra Pilato tyińo na cuhva ra cońo ñuhu ra chi ra.

<sup>59</sup> Tyicuan ta quehen ra José cońo ñuhu ra, tyihı ra chichi noo sinduhu ndıi.

<sup>60</sup> Ta tyihı ra chi ra chichi noo ñaña nicaa chaa cha cuvı noo yavi yuu cha tyihı ra tyińo cachatya ra. Ta cha yahą cha nacasi ra yuhu ñaña cuan chihin noo yuu cahnu, ta cuahan ra.

<sup>61</sup> Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

*Nu casahá cumi sindaro ñaña ra Jesús*

<sup>62</sup> Ta cha inga quıvi, quıvi nyitatú ñu cuvı, ta ra cacuvı nuu chi tata sutu, ta ra fariseo chahan coyo ra chinyehę ra nu nyaá ra Pilato.

<sup>63</sup> Ta catyí ra chi ra:

—Tata, nicohón iñi ndi vatyí ra cuendu cuan, catyí ra ta nyitó ca ra vatyí cha yaha cha uñi quiví cunandoto ra.

<sup>64</sup> Yucuan chaha tyihi tyiño na casaha cumi vaha ra ñaña cuan, nya yaha cha uñi quiví, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyí ra chi ñáyiví vatyí cha nandoto ra. Ta cha tyicuan caa nu ndihi tuhun ihya, yaha ca cuhva cucuvi —catyí ra.

<sup>65</sup> Ta ra Pilato catyí ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuví saha cumi ndo —catyí ra.

<sup>66</sup> Tyicuan ta cuahan coyo ra, ta casaha cumi vaha ra ñaña cuan, ta catyaa ra noo sellu chata yuu cha chasí cuan. Ta casandoo ra chi sindaro sahá cumi yucuan.

## 28

### *Nu nandoto ra Jesús*

(*Mr. 16.1-8; Lc. 24.1-12; Jn. 20.1-10*)

<sup>1</sup> Cha yaha quiví cha nyitatu ñu, cuhva cha vachi cundichin, nu quichaha vitya cuví. Ta cu María ñaha Magdala cuan, ta inga cu María chahan coyo ñu nu ñaña.

<sup>2</sup> Ta quichi minoo cha taan vatyí quichi ángel Sutú Mañi yo noo ra nya ityi andiví, ta chaa ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siqui.

<sup>3</sup> Ta xiño vavaha ra, tari cha quihvi tacha. Ta sahama ra cuichin vavaha.

<sup>4</sup> Cuhva cha cananyehē sindaro cuan chi ra, canayuhví vavaha ra nyacua nihi ra, ta nyacua coña ra chihin cha yuhví ra.

<sup>5</sup> Tyicuan ta quichaha catyí ángel cuan chi ñusihi cuan:

—Ma yuhvi ndo. Yuhu chité vatyi chi ra Jesús cha chihí nu cruzi nanducú ndo.

<sup>6</sup> Yori ca ra ñohó ihya, vatyi cha nandoto ra, tari catyi ra. Ñaha ndo ta nyehe ndo nu catuvi ra.

<sup>7</sup> Ta cuhun ndo numi ri, ta catyi ndo chi ra cachica noo chihin ra vatyi cha nandoto ra, ta cha cuahan ra Galilea, nyatú ra chi ra yucuan. Ican ihya cuví cha nyaa catyi chi ndo —catyí ángel cuan chi ñu.

<sup>8</sup> Tyicuan ta numi ri quitá coyo ñu nu ñaña cuan. Suhva ri yuhví ñu, ta suhva ri si vavaha cuñí ñu. Ta chinqo vavaha ñu cua catyi ñu chi ra cachica noo chihin ra Jesús.

<sup>9</sup> Ta cuhva cuan tui ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuiñi chiti ñu nuu ra ta casacahnu ñu chi ra, ta suri numi ñu chaha ra.

<sup>10</sup> Ta catyí ra chi ñu:

—Ma yuhvi ndo. Cuahan ndo cua sacoto ndo chi yañi vatyi na cuhun coyo ra Galilea, ta nyicuan cuñihi tahan ndi —catyí ra chi ñu.

### *Tuhun cha canacatyí sindaro*

<sup>11</sup> Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuvi cuan chi ra cacuví nuu chi sutu.

<sup>12</sup> Tyicuan ta ra cacuví nuu cuan chahan coyo ra chichan ra chihin ra mandoñi ñuu vatyi

catyihí tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan.

<sup>13</sup> Ta cacatyí ra chi ra:

—Nyoho, catyi ndo vatyí cha cha cuaa cha ní ri ca cha quixí ndo, chahan coyo ra cachica noo chihin ra Jesús ta chिकासुहु ra coño ñuhu ra.

<sup>14</sup> Ta tatu chito gobiernu tuhun ihya, cua nyehe maa ndi yoso caa catyi ndi chi ra, ta nyoho ma caca ñni ndo. Ñahri cucuvi chi ndo.

<sup>15</sup> Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyí ra chi ra. Ta nya vityin ta tyicuan caa catyí ñáyivi ñuu Israel.

*Nu tyaa ra Jesús tyiño chi ra cachicá tyiño ra (Mr. 16.14-18; Lc. 24.36-49; Jn. 20.19-23)*

<sup>16</sup> Ta tyicuan caa, ndi uchi ñn ra cachica noo chihin ra, cuahan coyo ra nya Galilea nya yucu nu catyi maa ra Jesús chi ra vatyí cuhun coyo ra.

<sup>17</sup> Ta cuhva cha cananyehé ra chi ra Jesús, casacahnü ra chi ra soco suhva ra chica uvi ñni ra.

<sup>18</sup> Tyicuan ta tuhvã ra Jesús chi ra ta catyí ra chi ra:

—Nyoo chaha ra cha cunyaca ñaha yuhu tandihí andivi ta siqui ñuhu ñáyivi.

<sup>19</sup> Yucuan chaha, cuahan ndo tandihí nu nyicú ñáyivi, tandihí ri ñuu, ta catyi ndo chi ñu na nanyicon ñu chii. Ta sacondutya ndo chi ñu chihin sivi Sutu yo Nyoo ta chihin sivi yuhu Sehe Nyoo, ta chihin sivi Tatyí Ii Nyoo.

<sup>20</sup> Ta sañaha ndo chi ñu na naquichaha ñu tandihí cha catyi yuhu tyi sacuvi ñu. Ta coto ndo vatyí yuhu cunyai chihin ndo tandihí quivi

nyacua nya naa ñayiv̄i —catyí ra Jesucristo chi ra  
cachicá tyiño ra.

**Tuhun cha sañahá ra Jesucristo chi yo**  
**New Testament in Mixtec, Jamiltepec**  
**(MX:mxt:Mixtec, Jamiltepec)**

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

**Copyright Information**

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mixtec, Jamiltepec

**© 1983, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Mar 2026 from source  
files dated 29 Jan 2022  
7411d349-0f34-5963-987e-74457a7bad38